



# WANTOK

Niuspepa bilong yumi ol PNG stret!

Wan Wik,

Mas 3 - 9, 2005

NAMBA 1598

K1 tasol



## Pes 2-Orait long lo bilong rausim bebi?



OCEAN BLUE

Tuna in oil  
Rait teist  
yah!



### Insait : Gavamani Sivarai

# Gutpela kopi prais

James Kila i raitim

GUTPELA nius nau i kamap bilong ol kopi fama insait long kantri olsem gutpela prais bilong kopi i stap nau na bai i stap i go long taim liklik.

Dispela toksave i kam long Siaman bilong Kopi Indastri Koporesen (CIC), Pugma Kopi.

Mista Kopi i tok klia olsem wok painim na ol namba i kamaul long CIC iekonomik seksen i soim olsem prais bilong kopi i go antap long wol kopi prais i wok long apim prais bilong kopi insait long PNG na dispela bai helpim ol kopi fama insait long kantri.

Mista Kopi i toktok strong olsem ol fama i mas go bek long ol kopi gaden bilong ol na groim moa kopi bai ol i ken mekim moa mani taim prais i stap long mak em i stap nau.

Em i singaut long ol fama long pikim tasol ol retpela kopi bin long ol kopi diwai bilong ol bai ol i ken

salim gutpela kopi na ol i noken stilim kopi long ol bikpela blok o plantesen.

Nau prais bilong kopi i wok long go antap moa, dispela bai lukim moa wok bisnis i kamap insait long ol taun long Hailans rijon olsem Goroka, Kundiawa na Maunten Hagen.

Planti manmeri long Hailans rijon i save sanap long kopi long bipo yet pastaim long ol bikpela maining projek i kamap insait long kantri. Kopi em i samting we i save helpim ol long stretim ol baset bilong ol samting olsem marit, ol bikpela kaikai bihainim pasin bilong ples na skul fi.

Long mun Februari long dispela yia prais bilong Y-gred grin bin kopi i bin stap namel long K4.80 na K5.90. Pasmem kopi long dua bilong fektori i bin kisim namel long K2.30 na K3.75 long wanwan kilogram.

*I go long pes 2*



**Gutpela taim...** Ol lain manki i save baim kopi long sait bilong rot long Goroka taun i sanap soim prais bilong kopi. Prais nau i wok long go antap moa na dispela bai i go het yet inap long taim liklik. Foto: JAMES KILA



Coleman lamp istap long olgeta Brian Ball stua na Authorised Dealer

### Polis Ripot

#### Isten Hailans:

PAIT namel long tupela wanpisin long Isten Hailans i kamapim dai bilong tripela pipel.

Polis long Isten Hailans i tok tupela meri na wanpela man i bin dai long Komperi Veli long Henganofi bihainim pait namel long lgajuhao na Krigenave wan pisin.

Polis i tokaut long nem bilong tripela daiman olsem Pasto Philip Enoch i gat 32 krismas.

Na tupela meri em long Kaza Soma i gat 39 krismas na Kumari Sevis i gat 35 krismas. Tripela i bilong ples Ikanofi.

Provinsel Polis Komanda long isten Hailans David Seine i tok tupela birua wan pisin i bin wok long pait na birua long tupela yia nau, ol polis i bin toktok wantaim ol long stopim pait na kamapim pasin bilong belkol na sekan.

Em i bin tok ol i sapos long kamapim belkol pasin long dispela mun.

#### Lae, Morobe:

POLIS long Lae i kiism oda long sut long kilim man taim man o raskol grup i holim tu ol gan samting long pait wantaim.

Rijonel polis Komanda Giossi Lab i wokim dispela toktok long ol niuslain taim e mi mekim klia dai bilong 6-pela raskol long Lae long wiken.

Ol bin painim dai bodi bilong 6-pela man long Wara Erap long wiken.

Ol polis ripot i tok ol daiman ya i wok long ronawe long ol pleslain na polis na ol i bungim dai biloing ol taim ol i laik abrusim polis na ol ples lain na kalap i go daun long Wara Erap.

Komanda Labi i tok kriminel o bikhet pasin long Lae siti i wok long go antap na olsem, oda long polis em long sut long kilim man taim ol i stap long denja o birua.

Em i tok stil pasin i stap long top lista olsem eria we planti trabel i kamap long em.

Em bin tok rekot i soim olsem long las mun Februeri tasol, i bin gat 32 keis bilong long ol krait we stil pasin i bin stap antap tru.

Long 6-pela bodi, Mista Lab ii tok ol bin wok long ronawe long ol polis na ples lain bikos ol i laik wokim holap long ol lain man o kampani i laik baim kopi.

Foapela daiman ya i bilong Morobe provins yet na tupela narapela i bilong Wes Papua.

Polis i bin kisim stori long wanpela raskol bilong dispela geng na em i bin tok e em na ol narapela raskol poroman i bin plen long stil long ol lain i baim kopi na ol i bin karim ol gan, naip na ol arapela samting long paitim na kilim man wantaim.

Tasol ol ples lain na polis i bin ronim ol na ol i ronawe na sam long wara na painim dai bilong ol.

### Ol ripot bilong nesanel palamen wantaim Yakam Kelo

# Gavana Wenge laikim lo bilong rausim bebi

Gavana bilong Morobe Luther Wenge i laikim gavman i mas kamapim lo we i oraitim ol meri long rausim nupela bebi long bel taim bebi i wara wara yet.

Mista Wenge i tokim nesanel palamen olsem sios i save egen-sim ol pipel long noken yusim gumi (karamap) taim ol i slip wantaim meri. Tasol dispela i mekim na ol pikinini i wok long kamap planti na gavman i gat hevi long lukautim na sapatim ol long ol sevis na sapat.

Gavana Wenge i tok long sampela ovasis kantri ol i gat lo bilong oraitim ol meri long rausim bebi long bel taim bebi i wara o blut yet. Olsem na em i askim palamen sapos gavman i ken kamapim dispela lo long oraitim ol meri long mekim dispela.

Em i tok namba bilong ol pipel long kantri i wok long gro hari-ap tru bikos sios i no wanbel long ol manmeri i yusim gumi long stopim ol meri long i gat bel. Olsem na namba i wok long go antap yet.

Mista Wenge i askim Helt Minista Melchior Pep long lukluk

insait long dispela toktok bilong em na toktok wantaim ol opisa bilong em long dispela tingting.

Tasol Minista bilong Helt Melchior Pep i tokaut olsem dispela em wanpela bikpela toktok tru we planti manmeri bai toktok long en. Dispela i no liklik toktok na gutpela long dispela kain tingting i mas raun long olgeta hap bilong kantri long olgeta pipel i skelim tingting long en pastaim.

Mista Pep i tok tu olsem PNG i nogat lo bilong oraitim ol meri long rausim nupela bebi long bel bikos long lotu bilong yumi. Planti pipel bilong PNG em ol Kristen na lotu i tambu long dispela pasin. Olsem na dispela toktok i no isi tasol mipela i mas skelim moa tingting na toktok yet wantaim planti pipel pastaim long dispela.

Helt Minista i tok em bai toktok wantaim ol opisa bilong em long dispela toktok bilong Gavana Luther Wenge na wanem tingting ol i kamapim bai em i ken toksave gen long ol lida bilong palamen long bihain taim.

## PNG saveman mas kisim gutpela luksave

GAVANA bilong Is Nu Briten provins Leo Dion i askim gavman long lukluk insait long sampela bikpela ovasis kampani husat i no save bihainim lo bilong Papua Niugini long sait bilong wok wantaim ol wokman bilong PNG stret.

Mista Dion i tok sampela kampani i no save givim spes long ol PNG long kamap long mak bilong kisim ol top posisen.

Na tu sampela PNG i gat bikpela save na eksperiens long holim ol bikpela wok na posisen tasol ol sampela ovasis kampani i no save luksave long dispela. Dispela i wok long daunim ol saveman bilong mipela yet long kantri.

Mista Dion i askim Minista bilong Leba na Emploimen Roy Biyama long lukluk insait long dispela na mekim eksen long dispela kain pasin.

Minista Roy Biyama i bekim olsem em tru i gat planti bikpela ovasis kampani i stap long PNG tasol ol i

mas bihainim lo bilong kantri.

Mista Biyama i tok bai opis bilong em i lukluk insait gen long wok na ron bilong sampela ovasis kampani long skelim na glasim dispela kain pasin.

Tasol Minista i tok em i luksave olsem planti kampani we komplek i save kamap em long ol loging o timba kampani na maining we i save stap insait long ol ples o bus ples.

Na em i save olsem sampela i bihainim gut lo bilong PNG long mekim gut long ol lokal wokman bilong ol na wokim ol haus bilong slip, haus sik na ol arapela sevis moa.

Gavana bilong Galp provins Chris Haiveta i tok long provins bilong em i gat bikpela komplek long timba kampani olsem ol ovasis lain i save mekim wok bilong ol lokal PNG.

Mista Biyama i tok ol opisa bilong em bai lukluk long dispela tasol em i save olsem kampani long Galp provins i wok gut bihainim lo.

## Gutpela kopi prais bai go yet

...I kam long pes 1

Tasol i stat long Tunde long dispela wik, ol kopi baia husat i save baim kopi long sait bilong rot i wok long soim ol prais namel long K3.75 na K3.85.

Mista Kopi i tok dispela strong long prais bilong kopi i kamap bihainim strongpela wok bisnis insait long intanesenel maket na i bin stat taim ol investa o bisnis i putim moa mani i go insait long baim kopi.

Ikonmik seksen bilong CIC i luksave long dispela toksave i kam long wol prais na i tokaut olsem kopi prodaksen bai i go inap long 114 milien bek insait long 2004 na 2005 kopi sisen. Dispela i winim mak bilong 2003 na 2004 we namba bilong ol bek kopi i bin sindaun long 103.39 milien bek. Dispela i daun liklik long mak maket i bin makim bipo. Em bikos mak bilong kopi long wanwan long ol kantri i save groim kopi i bin go daun na bikpela kantri Brazil i kisim hevi long sait bilong ren na san. Long 2005 na 2006 prodaksen bilong Brazil, ol saveman i glasim na tok mak bilong kopi bilong ol bai i go daun liklik inap long 107 milien bek. Laikim bilong kopi insait long wol nau i sanap long 114 milien bek na i tuk olsem bai kopi saplai long wol bai i sot.

## Gavman bai tok klia long K30 milien tok paul

OLGETA bikpela toktok bilong bikpela mani tru i paul long opis bilong Atoni Jenerel em gavman i wok long haitim, memba bilong Makam Andrew Baing i askim ekting Praim Minista Sir Rabbie Namaliu long palamen long dispela wik.

Mista Baing i tok bikpela toktok i bin kamap pinis olsem opis bilong Atoni Jenerel i paulim bikpela mani tru i go long ol hait wok olsem na gavman i mas tokaut klia long wok painimaut bilong dispela hevi na tokim palamen na ol pipel bilong Papua Niugini i mas save.

Mista Baing i tok mak olsem K30 milien i paul tasol nogat man i kisim sas na taim ol liklik man i stil long rot bai ol i dai long han bilong polis o go long kalabus. Tasol ol bikpela traipela stil lain i save raun fri.

Ekting Praim Minista Sir Rabbie Namaliu i tok kabinet i lukluk pinis long dispela toktok na ol i redim pinis wanpela ripot bilong tokaut long Palamen long dispela wik bai ol memba i ken save long dispela samting.



# Katolik Sios sapatim lo bilong rausim poka masin

KATOLIK Sios insait long kantri i sapatim toktok bilong rausim lo bilong ol poka masin na ol arapela masin olsem ol hos resis masin insait long kantri.

Katolik Bisop Konfrens bilong Papua Niugini na Solomon Ailans i tokaut long dispela wik olsem sios i no egensim olgeta pasin bilong mekim bet, tasol ol dispela kain pasin i ken kamap pasin nogut taim em i save bagarapim sindaun bilong famili.

"Insait long skul bilong Katolik Sios (2413) mipela i save lainim olsem ol pilai olsem kas o mekim ol bet i no egensim jastis. Ol i save kamap pasin nogut taim ol i save rausim strong bilong wanwan long lukautim ol yet na ol arapela lain olsem famili bilong ol," ol Katolik Bisop i tok.

"Mipela i bilip olsem pasin bilong pilai poka masin i nogut taim laip na sindaun bilong

famili i bagarap. Mipela i bilip olsem ol dispela samting i no samting i long sait bilong sotim mani tasol. Taim dispela pasin i save stilim taim na wok bilong lukautim manmeri, pikini na famili, em i save kamap pasin nogut. Dispela em i wanpela hevi we mipela i lukim ol dispela poka masin, hos resis masin i ken kamapim."

Ol i tok ol Bisop wantaim ol lida bilong ol arapela sios i bin egensim Gaming Machine Ekt bilong 1993. Namba wan bikpela tingting bilong ol Bisop em ol hevi dispela kain samting i save kamapim long ol famili taim papamama i save lukim dispela kain pasin olsem rot bilong kisim mani.

Ol i tok dispela tingting i stap yet na ol i laikim bai gavman i mas banisim ol manmeri long ol dispela kain birua.

Long 2001, ol bisop wantaim ol arapela

sios lida i bin amamas taim praim minista long dispela taim, Sir Mekere Morauta i bin laik pasim poka masin.


Dispela i no bin kamap na nau dispela gavman i daunim mak bilong takis long ol dispela masin na nau i gat moa masin i wok long kam insait long kantri.

Ol Bisop i tok i nogat wanpela ripot long mani i kam long ol poka masin i kamaut long ples klia yet.

Ol i tok gavman i mas klia olsem dispela lo bilong poka masin i no save givim mani long strongim baset tasol, na ol i mas tingim tu sindaun bilong ol pipel.

"Ol memba biong palamen i mas luksave long ol hevi ol dispela masin i save givim long ol komyniti na famili.

Em i save bagarapim laip bilong ol manmeri."



**Lainim stretpela rot bilong redim solwara kaikai...Long ol ples insait long kantri we i stap long nambis, planti manmeri i save long smukim pis bihainim rot bilong ol tumbuna. Tasol planti i no klia olsem i gat ol arapela bikpela wok we i mas kamap long smukim gut pis bai ol manmeri i ken kaikai na i no inap long sik.**

**Nesene! Fiseris Atoriti nau i wok long go het long strongim wok bilong redim gut ol solwara kaikai. Dispela piksa i soim ol meri i kisim skul long gutpela na stretpela rot bilong redim ol solwara kaikai olsem pis na ol arapela samting. Ol i bin sindaun long wanpela woksop i kamap long Nesene! Fiseris Koles long Kavieng, Nu Ailan. Ritim moa long dispela stori long pes 4. Foto: NESENE! FISERIS ATORITI**

## Wantok Niuspepa na ABC Radio Australia i wanbel long wok bung wantaim nau

**Neville Choi i raitim**

WANPELA nupela wok bung i kamap namel long *Wantok Niuspepa* na *ABC Radio Australia* long strongim Tok Pisin insait long kantri na Pasifik.

Dispela wok bung nau i lukim nius bilong *ABC Radio Australia* bai i kamap insait long *Wantok Niuspepa*.

Stat long dispela wik bai i gat wanpela pes insait long niuspepa we bai i soim nius i kamap long *ABC Radio Australia* Tok Pisin Sevis.

Eksekutiv Produsa bilong *Radio Australia* Tok Pisin Sevis, Pearson Vetuna i bin lusim Melbourne opis bilong em long kam bek long Pot Mosbi long lukim lonsing bilong dispela nupela wok bung.

Hai Komisina bilong Australia long PNG, Michael Potts i lonsim dispela nupela wok bung tete.

Mista Vetuna, husat i wok wantaim *ABC Radio Australia* inap long 20 yia nau i amamas tru long

dispela wok bung wantaim *Wantok Niuspepa*.

"Dispela em i wanpela gutpela samting tru bilong wanem em bai strongim tok pisin insait long kantri na long Pasifik tu. Nau yet tok pisin i save strong long radio na long toktok, tasol long sait bilong raitim na ritim tok pisin, ating *Wantok Niuspepa* tasol i wok long mekim dispela wok.

"Mipela i save olsem planti manmeri i wok long tok pisin, na planti long ol manmeri husat i save tok ples Motu i save tok pisin tu. Tasol ol i save toktok na harim long radio tasol. Nau mipela i laik strongim ol long ritim na raitim. Olsem na taim *Wantok Niuspepa* i askim mipela long mekim dispela wok bung, mipela i wanpela tingting tasol. Dispela bai strongim tok pisin moa yet," Mista Vetuna i tok.

Em i tok *Wantok Niuspepa* em i wanpela hap tasol we i save raitim tok pisin. Nau wantaim dispela wok bung ol manmeri i ken harim nius long *Radio Australia*

na ritim long *Wantok Niuspepa*.

Mista Vetuna i tok wanpela arapela as tingting long dispela wok bung em long bungim olgeta tok pisin insait long kantri bai PNG i ken i gat wanpela kain tok pisin tasol.

Nau yet wanwan hap bilong kantri i gat tok pisin bilong ol yet.

*Radio Australia* i save go long olgeta hap insait long Pasifik na nau yet em i gat wok bung wantaim ol radio stesen long Vanuatu na Solomon Ailan.

Dispela wok bung i namba wan taim wanpela niuspepa insait long kantri i wok bung wantaim wanpela radio stesen olsem.

Mista Vetuna i tok bikpela as tingting bilong *Radio Australia* em long givim gutpela skul na save long ol manmeri bai ol i ken yusim long kamapim gutpela sindaun bilong ol yet. Na nau aninit long dispela wok bung, bai ol i ken yusim helpim bilong *Wantok Niuspepa* long strongim dispela wok bilong helpim ol manmeri.



• Mista Vetuna.

"Planti manmeri insait long kantri i no save long ritim na raitim tok pisin. Na nau em i taim bilong gavman o dipatmen bilong edukesen long luksave long strong bilong tok pisin na helpim ol manmeri long ritim na raitim. Bihain, mipela i ken lukluk long kamapim wanpela Tok Pisin tasol.

"Dispela kain wok bung i no kamap long wanpela arapela hap. Em bai namba wan taim bilong dispela kain samting long kamap."



OL MANMERI long ples, ol i no save bisi long pawa bilong wanem i nogat pawa saplai i go insait long ples tru. Tasol ol lain i stap long bikpela siti olsem Mosbi i save kisim bikpela taim tru ya. Taim wanpela wantok i sindaun long tudak i stap bihain long PNG Power i katim pawa, em i askim - taim i save gat pawa blekaut na planti kaikai bilong mipela i save stap insait long bokis ais na i save bagarap. Olsem wanem, bai PNG Power inap long peim kompensesen long ol dispela samting tu o nogat?

DISPELA hap toktok kompensesen i wok long kamap wanpela hap toktok long maus bilong planti long yumi insait long kantri tete. Taim kar i bamim dok bilong mipela, bai mipela i askim kompensesen. Taim man i paitim mipela, bai mipela i askim long kompensesen. Tasol taim mipela i save dring spak raun long kar na bagarapim wanpela samting long pablik olsem ol rot sain long sait bilong rot, mipela i save tingting long givim kompensesen long NCDC tu o nogat?

Wanpela Wantok i autim tingting bilong em long dispela nupela infomel sekta lo o lo i kamapim na tok oraitim ol manmeri bilong kamapim ol liklik maket bilong ol long sait bilong haus na rot. Em i tok i gutpela olsem dispela lo bai helpim ol liklik manmeri long mekim liklik toea bilong ol, tasol dispela i wok long soim sampela hevi long sait bilong helt bilong ol manmeri taim ol maket i save kamapim ol kain kain pipia nabaut. Ating NCDC i mas wok bung wantaim helt dipatmen long luksave long luksave long ol dispela kain hevi tu.

WANWOK i go lukim lonsing bilong wanpela nupela VCD bilong ol pis na i tok klostu VCD ya i abrus na trip long solwara tu. Ol i redi long lukim nupela VCD na CD i go pas. I go long taim nau na wanpela i sanap baksait i tok - CD i mas skrets ya. Em i orait. Yumi stap long Papua Niugini ya. Sapos mipela i laik lukim pis bai mipela i go galas tasol.

PLANTI long ol rita bilong mipela hia long Wantok i klia tu long *Radio Australia*. Nau bai ol rita bilong mipela i ken ritim nius bilong *Radio Australia* Tok Pisin sevis insait long *Wantok Niuspepa* yet. Aninit long wanpela wok bung namel long *Wantok Niuspepa* na *ABC Radio Australia*, nau bai i gat wanpela pes bilong *Radio Australia* nius long olgeta wik.

## Jumogot tok klia long ol bot bilong pulim pis

PROVINSEL Gavana bilong Manus, Jacob Jumogot i tokaut pinis olsem dispela 20 bot bilong pulim pis we i sindaun long Aotau long Milen Be provins i bin statim wok bilong ol long Manus na i nogat wanpela samting i abrus long en.

Dokta Jumogot i tok ol dispela bot i bin statim ron bilong ol long Manus yet na em i lukim dispela bikpela kros pait i kamap olsem wanpela giaman toktok nating.

"Pastaim long ol bot i bin kamap, Embeseda bilong Saina, Li Zhengjun i bin toktok long pasim bilong wanpela hai skul insait long provins bilong mi. Long dispela raun bilong em em i bin toktok wantaim ol opisa bilong edministresen bilong mi na mi yet. Mipela i bin paitim toktok long wanpela wok traime bilong 20 bot bilong pulim pis i kam long China long pulim pis long Manus na Lombrum.

"Sampela wik bihain ol opisa bilong mi i bin kisim tok-save olsem ol Nesene! Fiseris Atoriti i bin stretim pinis rot bilong dispela 20 bot long wok long Lombrum long traime wanpela nupela rot bilong pulim pis," Dokta Jumogot i tok.

Em i tok long Januari 13, wanpela sinia opisa wantaim NFA i bin go long Manus na paitim toktok wantaim edministreta long toksave olsem ol dispela bot bai kam. Em i tok i bot i kisim pinis laisens long NFA long traime pulim pis inap long 60 mun.

Dokta Jumogot i tok provinsel edministreta i bin salim ol provinsel opia long sekim olgeta dispela sip.

Em i tok olgeta wok glasim i bin kamap long klianm ol dispela bot na ol i bin lusim Lombrum long Januari 18.

Em i tok dispela kain kros pait i ken bagarapim wok bisnis wantaim ol kantri ol Saina long bihain taim.

Hap Hap Nius

Namatanai redi long soim kala

Namatanai distrik long Nu Ailan provins nau i wok long redi long namba mini mask festival we bai i kamap long hap pastaim long bikpela mask festival i kamap long Kokopo long Is Nu Briten long mun Septemba. Long dispela yia, Namatanai bai opim mask festival wantaim liklik mini festival bilong ol yet. Long dispela taim, bai ol i soim tru as ples we ol tubuan long Nu Ailan na Is Nu Briten. Memba bilong Namatanai, Byron Chan i makim pinis K30,000 bilong go long kamapim dispela mini mask festival.

Ol man nogut long Bogenvil mas pasim ai nau

Ol man nogut long Bogenvil husat i save laik bikhet na bagarapim ol arapela i mas was gut long ai bilong ol nau. Provinsel Eksekutyutiv Kaunsel bilong bogenvil i tok orait pinis long polis i ken yusim ol capsicum spre we i ken go insait long ai bilong ol man nogut o stii man na ol bai kisim bikpela pen taim ol i laik mekim pasin nogut. Deputi Gavana bilong Bogenvil, Gerard Sinato i tok orait long polis long Bogenvil long yusim dispela spre long strongim wok lo na oda insait long provins taim ol i wok long redi long kamapim namba wan ileksen bilong otonomas gavman.

Nupela ekting edministreta bilong Wes Nu Briten gen

WES Nu Briten provins i gat wanpela nupela ekting edministreta gen.

Willie Edo, husat em i deputi edministreta bilong polisi na risets i kisim ples bilong man i holim dispela wok, Kingston Jimbade long wik i go pinis.

Dispela senis i bihainim wanpela Provinsel Eksekutyutiv Kaunsel (PEC) disisen bilong rausim Mista Jimbade long mun Julai 2004, na tu wanpela pas i kam long Dipatmen bilong Pesenel Menesmen long Waigani, bilong pinisim wok bilong Mista Jimbade olsem ekting edministreta.

Geset o bikpela pepa bilong givim pawa long dis-

pela senis i bin kamap nau tasol long mun Januari.

Deputi seketeri bilong pesenel menesmen, John kali i bin kam long provins las wik bilong tok klia long dispela senis na tu givim wanpela pas i kam long Gavana Clement Nakmai bilong tokim Mista Jimbade long lusim opis bai Mista Edo i ken kisim ples bilong em.

Tru tumas, planti ol wok manmeri bilong Wes Nu Briten provinsel edministresen i bin kirap nogut tru long dispela senis.

Tasol man husat bai lusim opis, Mista Jimbade, i wanbel long dispela disisen bilong PEC na em i

askim olgeta pablik seven long noken bel nogut long dispela senis, tasol ol i mas go het long givim sevis long ol pipel bilong Wes Nu Briten.

Long wankain taim, man husat bai kamap nupela ekting edministreta i slim tok tenk yu na amamas bilong em i go long Mista Jimbade long ol bikpela wok em i bin mekim olsem long paitim toktok na winim bek gen tras fan bilong provins.

Mista Edo i tok em i luksave long ol wok Mista Jimbade i mekim aninit long hevi bilong mani na politik bilong edministresen na bai skruim dispeta gutpela wok.

Kros pait i pinis na nau wanbel i stap

WOK BISNIS, wok bilong lotu, edukesen bilong ol pikinini na ol arapela sevis moa i ken go het na kamap gut nau, bihainim pinis bilong bel nogut namel long Wulai klen na Kapelugp klen insait long Wod 10 Komyuniti bilong Talasea LLG eria long Wes Nu Briten.

Klostu 4-pela yia olgeta dispela tupela klen o pisin i no bin sindaun wanbel wantaim, bihainim wanpela bikpela kros pait i bin kamap namel long tupela long yia 2000.

Ol haus i bin paia, ol gaden kaikai i bin bagarap na ol diwai bilong mani olsem wel pam, kakao, kokonas na vanilla i bin bagarap tu insait long tupela klen wantaim, taim dispela birua i bin kamap.

Foapela klen memba insait long tupela klen wantaim i bin lusim laip bilong ol insait long dispela trabel pait.

Long Sarere i go pinis, moa long 2000 manmeri na pikinini i bin bung long Dami ples bilong lukim wanbel kaikai we i pinisim tru dispela bikpela birua namel long dispela tupela pisin.

Namba wan mausman bilong dispela bikpela pis o wanbel kaikai em Robert Dau husat i Distrik Edministreta bilong Talasea distrik.

Ol arapela bikman i bin kamap em Provinsel Polis Komanda Superintendent Sylvesta Euga, Vais Presiden bilong Talasea LLG Ben Valuka, Dean bilong Katolik Daiosis long kimbe, Pater Cosmas, NBC Nius manmeri, ol gavman opisa na tu ol pipel bilong ol arapela wod insait long Talasea LLG, we ol i kamap long lukim dispela bikpela bel sori kaikai.

Moa long K30, 000 kes mani, pik, karuka (mat bilong silip), gaden kaikai na sel mani (tambu) i bin senis i go kam long han bilong dispela tupela klen bilong makim olsem sore i kam tru long lewa na long bel bilong ol.

Ol meri skul long stretim kaikai bilong solwara



• Dispela em sampela long ol solwara kaikai olsem pis we ol meri i skul long bihainim gutpela rot long lukautim na smukim. Ol dispela kaikai nau i kam aut long smuk masin na i redi long pekim long plastik. Foto: NESENEL FISERIS ATORITI

LONG mun i go pinis, wanpela ten foa (14) meri bilong ol nambis provins insait long kantri i wok long skul long makim prais bilong ol solwara kaikai.

Dispela woksop program i kamap long Nesenel Fiseris Koles long Kavieng, Nu Ailan.

Wantaim helpim mani i kam long Intanesenel Fainens Koporesen bilong Wol Benk na i kam long opis long Sydney na Pot Mosbi bilong Pasifik Enteprais Developmen Fasiliti dispela trening program i kamap long Kavieng long yusim nupela Sifut Trening na Prosesing Fasiliti long Koles.

Dispela woksop i bin kamap long strongim ol meri bai ol i ken stap insait long sifut na fiseris sekta tu. Ol dispela meri i mekim 4-pela hap bilong program bihainim ol kos bilong Nesenel Fiseris Koles yet long sait bilong sifut bisnis menesmen.

Long namba wan wik, ol i skul long wok wantaim ol kainkain kaikai bilong solwara na stretpela rot bilong wokim. Long namba tu wik ol i kisim skul long kamapim gutpela solwara kaikai. Long pinis bilong namba wan wik, ol i lainim rot bilong kamapim gutpela solwara kaikai.



Ren na win wok long bagarapim ples yet

BIKPELA taim nogut bilong ren na win i wok long hamarim yet not kos bilong Wes Nu Briten.

Bikpela ren i wok long bagarapim ol rot long Hoskins, Bialla na Talasea, taim pret win i pulim solwara, we i mekim na ol manmeri bilong Kove na Giosta i painim hat tru long katim solwara na go long Kimbe.

Ripot i kam long Bialla Distrik Opis i tok ol bikpela wara olsem Tiauru na Ivule i wok long solap nau, na sapos ren i no malolo bai i gat birua bai kamap gen long Bialla haiwe.

Long dispela taim yet, opis bilong disasta i tok lukaut long hevi bilong ren na win.

Major Paul Kaliop, Dairekta bilong Opis bilong Disasta long provins i askim ol pipel long traim long lukautim ol yet taim ol i mekim wok bilong ol.

Wankain tok lukaut em Talasea

Distrik Edministreta Robert Dau i tok olsem ol pipel i mas lukautim ol gut taim ol i stap long solwara o ronim ka i go long ol rot long taim bilong bikpela ren.

I luk olsem Papua Niugini i wok long lukim planti kainkain hevi long ren, win, san na solwara na graun.

Kain ol hevi olsem Manam maunten paia birua long Madang provins, na tu sampela giaman tokwin we i bin kamap i no longtaim i go pinis long Mosbi, Sentral provins, olsem sunami o birua bilong solwara bai i painim ol.

Dispela giaman tok i bin mekim planti tausen manmeri i lusim ol haus bilong ol klostu long nambis na ronawe long bikmoring yet. Tasol nogat birua i bin kamap.

Dispela giaman tok i bin kirap taim mak bilong drai bilong solwara i binn go daun tru.

# Namba bilong ol manmeri long Morobe i ron antap

## Haiveta Kivia i raitim

NAMBA bilong ol manmeri long Morobe provins bai kamap olsem 813,806 long yia 2020 sapos namba bilong ol pikinini i kamap na namba bilong ol dai i ron long mak em i ron long en tude. Dispela em luksave i kam long Populesen Eksen Plen bilong provins.

Ripot i tokaut olsem long yia 2010 bai namba bilong ol manmeri long Morobe provins bai kamap olsem 648,935.

Ripot i tok dispela bai kisim longpela taim liklik long namba bilong ol manmeri long Morobe i stop o kamap long wanpela mak we i ken ron isi. Olsem na dispela bai kamap sapos wok bilong Populesen

Eksen Plen i ron gut na strong wantaim tu gro na level bilong sosio ekonomik developmen insait long provins long 20 yia bihain.

Bikpela tingting insait em sapos Morobe provins i redi long i ken kamapim narapela 500,000 manmeri na surikim namba bilong ol pipel bilong em i go antap na tu surikim laipstail bilong ol pipel i go antap gut o nogat.

Na sapos Morobe i no ken bungim hevi o hat taim long sapatim na givim kaikai long ol dispela 500,000 manmeri.

Tasol Morobe i mas sanap strong long rot bilong karimaut dispela plen bikos long ol sampela samting olsem, Lae em bikpela namba tu siti na indastri senta bilong kantri.

Groa bilong ol pipel long wanpela yia i save antap tru olsem na em i mas balensim gut kamap bilong ol nupela pikinini long olgeta yia.

Planti pikinini moa i kamap na ol lapun tu i stap longpela taim nau bikos long gutpela helt sevis tasol famili plening i wanpela bikpela hevi yet.

Ol mama long Morobe i save kamapim olsem 5-pela pikinini na dispela em mak bilong Morobe nau we namba bilong provins i ron long en.

Narapela senis tu em moa manmeri i save go pulap long Morobe we provins i makim 33,000 manmeri i kam long narapela provins long yia 2000.

Moa manmeri i kam tu long Is Sepik, Isten Hailans na Simbu provins.

## Hap Hap Nius

### Fising bot mekim ron long Siassi

Namba wan fising bot bai ron i go insait long wara bilong Siassi bihain long ol i pasim tok las yia long sampela wok bilong painim pis bai i kamap long hap. Fising bot "Champion 33" bilong Frabella (PNG LTD) wanpela kampani i stap long Lae bai mekim dispela ron bilong em i go olsem long Siassi ailan we i stap namel long Wes Nu Briten na Morobe provins.

### Wenge sutim tok long Post Courier

Gavana bilong Morobe provins, Luther Wenge, i sutim tok long Post Courier niuspepa long i no ripot gut long ol lo na oda hevi long Lae. Em i tok ripot bilong Post Courier olsem lo na oda hevi long Lae i bikpela tru i no stret na bagarapim Morobe provins.

## Sandaun tingim han bilong brata

BRATA i sanap baksait long brata long taim bilong hevi. Dispela em bikpela het tok taim ol pipel bilong Sandaun provins i givim mani mak olsem K14,33.50 i go long helpim ol pipel bilong Manam long Madang provins long dispela wik.

Dispela mani em Siaman bilong Sosel Komiti Mista G. Gubon na Deputi Edministreta na Siaman bilong Provinsal Disasta Komiti, Sunur Atang, i makim ol pipel bilong Sandaun provins na givim i go long han bilong Minista bilong Inta Gavman Rilesens na Rijinol Memba bilong Madang provins Sir Peter Barter long dispela wik.

Sir Peter i kisim toksave olsem K10,000 i kam long provinsal gavman makim ol pipel bilong Sandaun na K4,334.50 em ol pipel bilong Sandaun yet bungim han long kamapim dispela mani na givim i go long ol pipel bilong Manam.

Mista Gubon i tok ol pipel bilong Sandaun i gat dinau i stap long ol pipel bilong Madang provins taim bikpela birua bilong solwara i bagarapim ples na ol pipel long 1998. Olsem na dispela pasin brata i stap na ol i bihainim i kam long helpim ol brata susa i kisim bagarap tude long Manam maunten paia.



**Rot Kruse Bilong Jisas...Dolores na Agustin i soim stori bod, o hap diwai ol man i save katim i kamap olsem piksa we i mekim wanpela stori, ol atis bilong Kambot, Is Sepik provins, i wokim. Stori bod i piksaim rot kruse bilong Jisas.**

Poto: BIG JOE

# Difens balus i helpim Manam

BALUS bilong Papua Niugini Difens Fos (PNGDF) i karim ol kaikai na ol saplai i go long Madang long las wiken long givim ol pipel bilong Manam husat i nogat ples long stap nau bihain long maunten paia i bin bagarapim ples bilong ol long las yia.

Casa balus bilong ami i mekim dispela ron wantaim ol kago na saplai we Red Cross, National AIDS Council na Dipatmen bilong Edukesen long Pot Mosbi na Madang i go pas long en. Ol dispela kago na saplai i bin stap long banis klostu 18 mun olgeta.

Casa balus i karim ol edukesen saplai wantaim ol kago na saplai we Red Cross i bungim i go long Sarere na tu long Sande long las wiken.

Ektim Komanding Opisa bilong PNGDF Air Wing, Meja Chester

Beobero, husat i ronim dispela balus tu, i tok olsem ol i amamas long mekim dispela wok bilong helpim ol pipel i kisim taim long dispela hevi long Manam.

Em i tok ol inap karimaut dispela wok bilong helpim long karim ol kago na saplai i go long ol pipel bilong Manam longtaim yet tasol balus bilong ol i no bin go long sevis inap nau em flai gen nau olsem na mipela i lukluk long mekim moa ron i go long Madang.

Tasol dispela i stap long tok orait o oda bilong hetkota bilong PNG Difens Fos, Meja Beobero i tok.

Opis bilong Disasta i mekim bikpela tok amamas i go long helpim na sevis PNG Difens Fos i givim long helpim ol pipel bilong Manam husat i kisim hevi na stap long bikples Bogia long Madang provins.



## RD TUNA CANNERS, LTD

A tuna processing company based in Madang is in need of:

### REGIONAL SALES MANAGER

Selected candidate will be responsible for the marketing of Diana brand finished goods in the New Guinea Islands and Momase region, established new and maintained current relationships, verifying the buyers credit worthiness and credibility, determining the buyers needs and satisfying those, establishing and maintaining long term relationships with buyers. Desired candidate must have a degree in business or related course with experience in managing marketing program for self stable products preferably canned tuna items, excellent people skills and effective communication skills. Network with target areas is a plus.

### MARKETING MANAGER

Selected candidate shall be responsible for maintaining Diana brand leadership in the PNG market, development and management of promotional activities, and expansion of Diana market.

Desired candidate must have a degree in business or related course with experience in managing marketing program for shelf stable products preferably canned products, experience in a managerial position, excellent people skills and effective communication skills. Position is open to both PNG nationals and non-nationals.

All interested applicants are requested to send their application letter with ID photo, credentials and assessment report to the following address not later than March 15, 2005:

### THE RECRUITMENT OFFICER

Human Resources Department  
RD TUNA CANNERS, LTD  
Portion 1004, North Coast Road, Siar, Madang  
P.O. Box 2113

**Hap Hap Nius**

**Ol memba toktok long Hailans Haiwe**

Hailans Haiwe we i save sevisim ol 5-pela provins insait long hailans provins i bin kamaut long maus bilong ol memba long dispela wik Palamen sindaun. Woks minista Gabriel Kapris i tok bai wok i stat long mendi Nipa dispela yia na tu wok long ol narapela hap bai i mas gat pepa wok pastaim bipo ol i kisim tok orait long wok i stat. Askim i bin kamap long memba bilong Nipa Kutubu Robert Kopaol na Enga Gavana Peter Ipatas. Tupela i bin askim woks minista bai wanem taim wok i stat long Nipa-Mendi rot na wanem taim bai gavman i stretim Wapenamanda Wabag rot. Rot bilong bilong Wanamanda i go long Wabag i save sevim Pogera tu na nau taim i bagarap nogut tru. Mista Ipatas i askim olsem wanem taim bai dispela rot i orait. Na long Mendi Nipa rot minista Kapris i tok dispela em bikpela rot projek na i stap wantaim Asian Development Bank (ADB) progrem blong 5-yia na bai wok i kamap klostu taim nau.

**K3.7 milen noken lus nating**

Tresera bilong Sauten Hailans provins husat i no kisim bek wok bilong em yet i tokaut strong olsem em i laik sevim samting olsem K3.7 milien bilong provins long i noken lus nating long han bilong sampela lain na kampani nabaut. Lawrence Olkoben i tokaut olsem dispela mani i bin redi long benk long Mendi na i redi long go aut long han bilong ol taim taim em i laik go bek long wok bilong em. Tasol em i ting sampela samting i no stret olgeta long dispela mani olsem na em i askim benk long noken mekim eksen long ol sek sapos i kam long benk. Em i tok olsem em i gat rekot pepa bilong 39 nem olgeta bilong ol man na ol bisnis we dispela peimeni bai i go long ol mak long K300,000 i go antap. Mista Olkoben i bin kisim bek wok bilong em bihain long atoriti i lusim em i go stap sait inap i kisim atoriti i go long kot na kot i putim em bek long wok long Februari.

# Namba wan kopi koporetiv kirap long Unggai maunten

**James Kila i raitim**

BIKPELA amamas i bin kamap bihain long Presiden bilong PNG Kopi Groas Federesen, Jon Yogiyo, i givim sia setifiket i go long Siaman bilong Fanowa Kopi Groas Koporetiv, Samuel Fuemba. Dispela setifiket em ol i wokim long Amerika na Mista Yogiyo i karim i kam givim ol eksekutiv bilong Fanowa Kofi Groas Koporetiv long Unggai maunten.

Moa long 3000 manmeri i bin bung long Orumba komyuniti Skul long Unggai, Isten Hailans provins, long lukim lonsing bilong Fanowa Kopi Groas Koporetiv Sosaiti.

Siaman bilong PNG Kopi Groas Federesen (PNGCGF), Mista Yogiyo, i stori long histori bilong kirap federesen na wanem rot dispela kampani i bihainim long salim kopi bilong ol fama i go ovasis long bringim mani na sevis i kam long kantri.

Mista Yogiyo i tok olsem as tingting bilong kirapim federesen long PNG em long senisim laip-stail bilong ol manmeri insait long ol ples na hauslain komyuniti insait long PNG. Ol pipel olsem PNGCGF i mekim wok we i go wantaim polisi bilong nesenel gavman long "Expot Driven Ekonomik Rikavari" polisi.

Ol groa nau i gat wanpela kampani we i rejista pinis long Amerika na nem bilong em i Coffee Pacifica na hetkwata bilong en i stap long Las Vegas, Nevada.

Dispela kampani long Amerika i stap long helpim na salim kopi bilong ol fama na tu wok aninit long lo bitong mekim bisnis long Amerika.

"Yupela ol pipel bilong Fanowa i no ken westim taim bilong yupela. Planim moa kopi na yupela i ken senisim laip bilong yupela," Mista Yogiyo i tok.

Samuel Fuemba, i bin go pas long kirapim Fanowa Kopi Groas Koporetiv i save wok wantaim Kopi Industri Koporesen (CIC) long bipo.



• Mista Yogiyo (lephan) i givim sia setifiket long man Mista Fuemba. Foto: JAMES KILA

"Mi bringim dispela 15 yia ekspirians bilong mi wantaim CIC olsem ekstensen opisa i kam long helpim ol pipel bilong mi long ples na ol i ken luk-save olsem kopi em wanpela bikpela samting tru we i ken senisim laip na sindaun bilong ol long hauslain," Mista Fuemba i tok.

Koporetiv Maketing Kodineta bilong CIC, Bernard Goma, i givim bikpela tok salens i go long ol yangpela manmeri long yusim gut taim bilong ol

long mekim wok.

Em i tok ol yangpela i mas noken westim taim bilong ol long raun nating long Goroka taun na pilai dat na kas.

"Yupela noken guria long lait na kapa sain daun-bilo long Goroka taun na ron i go long taun.

"Putim han bilong yupela long graun na mekim wok na bai yupela i tukim mani i kamap," Mista Goma i tok.

## Rausim laki mesin long PNG

**Maisan Pahun i raitim**

POKIS mesin o laki mesin i bringim planti hevi i kam insait long kantri na gavman i mas rausim bikos planti ol pikinini na mama i kisim taim pinis long dispela mesin nogut.

Olpela memba bilong Tari Pori Sir Matiabe Yuwi i sapotim dispela tingting long rausim pokis taim memba bilong Gumine Mista Nick Kuman i tokaut long Palamen las wik.

Sir Matiabe i wanbel long dispela tingting long rausim pokis na i tok planti pikinini i stap hangre, nogat kaikai na papa i dring tumas na save givim blek ai long mama tumas. Dispela i save mekim famili i stap long pret olgeta taim. "Sampela taim papa i lusim olgeta samting long poka mesin na i nogat mani long baim kaikai bilong famili."

Sir Matiabe i tok tu olsem Bihain bai em i go dinau long blek maket (ol i sasim 50 %) na dispela i kamapim wanpela bikpela sosol hevi insait long kantri.

Gavman i save kisim takis mani long pokis mani

tasol i no save olsem ol pipel i kisim taim i stap. Planti manmeri i no inap stap nating long wanpela wik na dispela i save mekim sampela ol meri na mama mekim pasin pamuk long kisim mani na helpim famili.

Sir Matiabe i tok tu olsem sampela memba bilong palamen i save pulapim ol nait klab long pilai pokis na ol i no save olsem pokis i save bagarapim ol famili nating.

"Mi laikim ol i save mekim disisen long tingim nogut sait bilong pokis. Pokis i tanim planti naispela man i go kamap raskol, ol i laikim mani long pilai pokis na wanpela wei tasol em long stail," Sir Matiabe i tok.

Olsem na olgeta lida long komyuniti, sios na ol palamen memba i mas wok hat long dispela pasin nogut we i laik bagarapim kantri bilong yumi. Planti pokis plaia i no save win oltaim na i save lus tumas. Win bilong pokis em mani tasol na lus bilong em save bagarapim famili, wok na fainensel laip bilong ol pipel.

"Pokis mas i stop," Sir Matiabe i tok.

## Ol Patete fama kisim helpim

**Maisan Pahun i raitim**

OL PATETE fama insait long Isten Hailans provins (EHP) nau bai gat sans long kirapim ol patete bisnis i go bikpela bihain long Isten Hailans provins Agrikalsa na Netsurel Risios Komiti (EHPAC) i kisim K60, 000.

Dispela mani i bin kam anninit long EHP 2005 baset we bai i go long stopim sik bilong patete insait long EHP.

Fresh Produce Development Company (FPDC) bai i makim maus bilong olgeta fama na bai saplaim patete sids i go long ol fama insait long provins.

Dispela K60, 000 i bruk i go 5-pela hap long helpim trenim ol patete groa, patete sids prodaksen, wokim ol sid inspeksen na setifiket, wokim ol weahaus bilong ol patete sid na trenim.

Ol FPDC i nau traim long karim aut wk projek insait long ol wanwan distrik na eria. Nambawan tingting bilong ol em long Isten Hailans i mas kamapim ol patete sid bilong ol yet na tu saplaim ol gutpela na liklik prais patete i go long ol kastoma bilong em.

Provinsel dipatmen bilong praimer i industri i givim tu wanpela sto haus bilong ol i go long FPDC long yusim na bungim ol patete sid i kam long ol fama na bai ol i menesim bihain bai salim i go nambaut.

FPDC i save olsem planti fama insait long EHP i gat liklik save na ekspirians long groim patete. Ol bai i givim save olsem sapot na bai raun i go lukim ol groas long kamap gutpela fama.

Dispela ol sid skim bai i stap insait long 4-pela distrik: Daulo, Goroka, Henganofi na Kainantu. Bihain bai ol narapela distrik i kisim sevis sapos rot bilong ka i orait.

Dispela ol kain progrem i gutpela long helpim ol lain long ples long developim ol gaden kaikai bilong ol na helpim tu sindaun bilong ol.

## EHP 'Mipela yet Progrem'

ISTEN Hailans provins (EHP) in au pait hat long stopim sik AIDS insait long provins. Long soim olsem ol i wok strong long paitim AIDS, provinsol gavman i putim K300, 000 stap sait long 2005 baset long karim aweanes bilong HIV AIDS long provins.

Gavana Mal Smith Kela husat i go pas long dispela muv i tok gavman bilong em i tok promis long lukim dispela sik nogut i no go aut long narapela hap insait provins.

"HIV AIDS i no wanpela helt isiu moa tasol em i wanpela developmen isiu long provins," Mista Smith Kela i tok.

Em i tok tu olsem dispela i wanpela bikpela samting insait long kantri na provins tu i painim long dispela taim nogut.

"Yumi i tok olsem sios grup na provinsel gavman

i mas karim aut toktok i go long ol komyuniti lida long kamap namba wan stiaman insait long ol ples," em i tok.

Provinsel gavman i rejistaim wanpela progrem ol i kolim Mipela yet progrem long wokk paitim HIV AIDS na narapela sik insait long provins.

Ol i putim narapela K10,000 long halivim provinsol HIV AIDS komiti.

Mista Smith i tok dispela i wanpela bikpela wari taim EHP i gat 1 pesen (%) bilong olgeta manmeri i gat AIDS insait long kantri.

Na dispela i mas wok long stopim dispela sik nogut bipo em i go bikpela insait long provins, em i tok.

Dispela kain wok Mista Smith Kela i mekim i gutpela, na bai helpim long strongim pait agensim dispela sik nogut.

# Oposisen laikim pawa bilong Motu Koitabu pipel

OPOSISEN i bilip ol pipel bilong Motu Koitabu i nogat gutpela luksave long gavman taim em i wok long go het na kirapim Mosbi siti o Nesenel Kapitel Distrik.

Lida Peter O'Neill i tokaut olsem ol bikpela developmen na senis i wok long kamap long NCD na karamapim ol pipel bilong Motu Koitabu we ol i lusim graun na gutpela sindaun bilong ol.

Maski bikpela toktok yumi save tok Pot Mosbi em siti bilong olgeta pipel bilong Papua Niugini, olgeta samting olsem developmen ol senis we i kamap i wok long kamap antap long olgeta liklik kona na graun bilong ol Papua pipel, Mista O'Neill i tok.

Mista O'Neill i tokaut olsem kain pasin olsem taim ol pipel i save lusim graun na olgeta samting bilong ol i go long narapela lain, ol bai skelim na glasim i go inap wanpela taim bai ol i kros na paif egensim wanem samting i stap long graun bilong ol. Dispela kain pasin i save stap long planti hap bilong graun pinis, em i tok.

Dispela em wanpela kain birua na trabel mipela i mas traim long abrusim nau. Olsem na politikal ripot Oposisen i laik kamapim long NCDC i sut long dispela kain luksave na i no long mekim NCD i wankain wantaim ol arapela PNG tasol, em i tok.

Dispela em long kamapim developmen na laik

bilong ol Motu Koitabu pipel i stap insait. Long liklik hap tu em ol pipel bilong Koiari i mas stap insait tu, Mista O'Neill i tok.

Bikpela samting nau em long kamapim gutpela na stretpela sistem bilong politiks we i stret long ol asples bilong dispela graun we ol tu i mas tokaut long sait bilong ol na tu luksave long ol rait na sindaun bilong ol arapela pipel bilong PNG husat tu i stap long Mosbi siti, em i tok.

Wanpela bikpela plen Oposisen i lukluk long en em long kamapim ilektoret bilong Motu Koitabu na Koiari yet aninit long nupela provinsal gavman sistem.

## Nogat sevis long Kaintiba - lida man

### Maisan Pahun i raitim

SIR Michael Somare i bin go long Kaintiba long 1975 taim Papua Niugini i laik kisim independens long Australia na tu dispela taim gavman sevis i save go long kaintiba. Bihain long dispela taim inap long nau nogat wanpela sevis o lida man i save long long dispela naispela ples.

"North West Airlines balus tasol long Lae i save kam long Mande, Trinde na Fraide na narapela samting gen bikos bikpela maunten i pasim mipela," bosman bilong Kaintiba ples balus Yameo Wapi i stori wantaim Wantok Niuspepa long las wik.

Yameo Wapi em papagraun bilong Kaintiba ples balus na em i autim bel hevi bilong em bikos nogat wanpela gutpela sevis i save go long ples bilong em na ol pipel long hap i stap yet long taim bipo.

"Mipela i abrusim gavman sevis pinis, planti gavman sevis i kam long sampela hap ples na go pinis na mipela i stap olsem tasol," Mista Wapi i tok.

Kaintiba em wanpela liklik stesen i stap insait long Galp provins, planti ol manmeri i stap long pasin bilong bifo yet we ol i wokim gaden na painim abus long bus.

I gat kopi gaden na nau ol manmeri i stat long planim vanilla tasol maket bilong em i stap we.

"Mipela i painim hat long salim ol kofi bilong mipela long baim sol, suga na sop nambaut.

Na tu mipela i painim hat long peim skul fi bilong ol pikinini bilong mipela bikos sait long kisim mani em hat tru," Mista Wapi.

Olsem na turangu sampela pikinini long Kaintiba i no save go long skul.

"I no gat nid long ol i go skul olsem na mipela yet i trenim ol long mekim gaden na painim abus long bus," wanpela papa i tok.

Ol lain long Kaintiba i save harim olsem ovasis AID mani i save kam long kantri tasol long hap nogat wanpela kain senis i go insait.

Nau askim bilong ol i go long rijinet memba bilong Galp, Chris Haiveta, na open memba Ekis Ropenu long tingim ol pipel long long ples tu.

"Yutupela aipas na baset save kam insait long Galp i stap we," Mista Wapi i tok long tupela memba bilong ol.

"Sampela pablik seven long Kerema taun i save kisim olgeta gutpela sevis na sevim famili bilong ol yet na ol pablik seven long ples nambaut i kisim taim bikos nogat rot na narapela sevis nambaut i go insait."

Em i tok tu olsem sampela memba bilong narapela provins i save mekim wok long elektoret na eria bilong ol tasol long Galp ol memba i save stap long Mosbi tasol na no tingim ol pipel bilong ol.



**Bungim Sir Paulias...Ol yangpela boi skaut na gel gaidis i bung long Mosbi long las wiken long makim bikpela de bilong wok bilong ol insait long PNG na wol tu. Long las wiken ol i bung long banis bilong Salvation Army long Hohola long luksave long patron bilong ol Gavana Jenerel (GG) bilong Papua Niugin Sir Paulius Matane.**

Foto: YAKAM KELO

## Oresi laikim nupela wel pam faktori long Oro

Memba bilong Sohe long Oro provins Peter Oresi i askim Minista bilong Agrikalsa na Laipstok long hariap lukluk insait long wel pam projek long provins bilong em.

Mista Oresi i tok dispela wok em i nogat gutpela luksave na han bilong gavman long strongim insait long kantri na ol pipel i no save kisim sapot bilong gavman long dispela.

Olsem na em i askim Mista Oresi long lukluk insait long strongim wan-

pela bod bilong wel pam bod bilong harim na karim hevi bilong ol pipel bilong ples husat i save planim oil pam na kisim strong long en.

Mista Oresi i tok gavman i wok long lukluk long ol bikpela faktori o plentesen wel pam long kantri na as bilong en em ol liklik pipel husat i save groim na kamapim dispela olsem na sapot na rot bilong i mas klia. Dispela bai helpim sindaun bilong ol pipel.

## Hap Hap Nius

### NEC makim nupela siti menesa

Eking Prait Minista Sir Rabbie Namaliu i tokim Nesenel Eksekutiv Kaunsel (NEC) long nupela makim bilong Misis Iva Kola olsem nupela ekting siti menesa bilong Nesenel Kapitel Distrik Komiti (NCDC). Sir Rabbie i tok Misis Kola em wanpela loya we i gat gutpela rekod long wok bilong em wantaim Nesenel Kapitel Distrik Komisen (NCD) Misis Kola bai stap ekting siti menesa long 3-pela mun na bihain bai NEC i makim nupela siti menesa. Em i kisim ples bilong olpela siti menesa Bernard Kipit we taim bilong i pinis long wok em i hofim wantaim NCDC longpela taim i kam.

### Lida amamas long polis patrol

Lida bilong palamen i amamas long lukim olsem wok bilong ol Australia polis wantaim PNG polis i kamap gut taim ol i wok long wokabaut patrol long ol strit na setelmen insait long Mosbi siti. Dispela tok amamas i kamap long palamen long dispela wik olsem ol i amamas long lukim patrol i kamap long ol strit na setelmen we dispela i no save kamap long bipo na ol i amamas long dispela wok bilong polis. Minista bilong Polis Bire Kimisopa i tok gutpela long harim kain ripot olsem.

# PNG's Top Selling 4x4 Wagon

## Land Cruiser

10 Seater 4x4 Troop Carrier

### After Sales Backup

- Biggest Vehicle Parts Supply in country
- Largest Service Backup in PNG
- PNG's Only Quality Assured\* Motor Dealer

Visit our Website: [www.elamotors.com.pg](http://www.elamotors.com.pg)

\*QUALITY ASSURED AS/NZS ISO 9001 : 2000



**Ela Motors**

TOYOTA TSUSHO (PNG) LTD

✓ 15 BRANCHES NATIONWIDE ✓ 41 YEARS TOYOTA EXPERIENCE IN PNG ✓ TOYOTA HISTORY DURABILITY, RELIABILITY AND RESALE VALUE

# Stadi bilong dainaso kamap long Siassi

**O**L saintis nau i wok long stadi long wanpela kain wel abus o enimol bilong bipo bipo taim tru insait long Siassi long Morobe provins.


Planti bilong ol dispela enimol o wel abus i dai pinis tasol ol saintis i ting wanpela o tupela i stap laip yet long dispela hap bilong wol hia long Papua Niugini.

Dispela taim ol saintis i kolim Jurassic Period na ol dispela enimol i stap long dispela taim em ol "Dainoso o Dinosaur" we wanwan bilong ol i gat nem. Sapos yu lukim pinis muvi "Jurassic Park" bai yu save pinis long wanem samting mi laik stori.

Tasol wanem as dispela ol traipela enimol i dai na i pinis olgeta na yumi i no save.

Nau ol saintis i save painim tasol ol bun na mak bilong ol i pas insait long ol hap ston na graun na ol i save stadi moa yet i go insait long ol dispela samting.

Planti wok painimaut o stadi long dispela



• Nau ol kaving yumi lukim i soim tru olsem ol tumbuna i lukim pinis dispela plai bokis.

samting i save kamap long ovasis tasol nau i kamap insait long Papua Niugini stret long liklik ailan bilong Siassi long Morobe provins.

Planti lain insait long sait bilong wok bilong saiens i laik save olsem nogut liklik Siassi ailan bai inap long helpim ol long stadi bilong ol i go insait long dispela taim bilong bipo na ol samting i stap long graun long dispela taim.

Wanpela bilong dispela ol lain em Jonathan Whitcomb, wanpela forensik vidio-grapa bilong Amerika husat i kamap long Siassi long stadi long "Ropen" wanpela enimol ol i bilip i wanpela bilong ol dispela enimol bilong bipo we i dai na pinis. Ol i bilip dispela em i laspela enimol husat i stap long taim bilong bipo yet i kam nau.

Mista Whitcomb i bin stap long Umboi ailan we em i bikpela ailan bilong ol Siassi ailan na i wok long traim na kisim piksa bilong dispela enimol wantaim TV kamera.

Mista Whitcomb nau i kamap wanpela bilong planti ol lain saintis husat ol i bin kamap long ailan long wokim wankain stadi long dispela enimol taim ol ripot i kamap long ol man olsem ol i save lukim wanpela kain samting olsem. Nem ol saintis i givim long dispela enimol em Rhamphorhynchus (rem-for-ing-kas).

Dispela em i wanpela kain enimol we i stap long femili nem bilong pterosaur we ol i bin stap taim ol dainoso i stap long graun.

"Ropen" em nem long tokples Kowai bilong Siassi yet we ol i givim long dispela enimol na em i wankain nem ol saintis na ol lain i save stadi long paleontology o wok bilong stadi long ol makmak bilong ol samting i dai pinis we i save pas insait long ol ston na diwai.

Inap olsem Sevenpela yia i go pinis wanpela grup bilong ol saintis bilong wanpela yunivesiti long Amerika i bin stap long Siassi ailan we ol i stadi tu long dispela enimol.

Mista Whitcomb i bin toktok wantaim Post Courier niuspepa (Tunde Oktoba 12, 2004) long ol stadi bilong em long dispela animol.

Em i tok ol stori bilong ol man long ples long dispela enimol i no giaman tasol i kamap long ol lain husat ol i lukim tru na em i stap long hap long traim long kisim dispela enimol long TV kamera bilong em.

Mista Whitcomb i tok lukluk bilong dispela enimol em i olsem wanpela traipela mama bilong ol bilak bokis. Maus bilong en i olsem bilong pukpuk na wing bilong em i longpela olsem seven mita.

Em i tok planti bilong ol lain long ailan i lukim pinis na em i go long hap bihain long em i harim dispela.

Ol asples i save stori olsem wanpela traipela samting we i gat laik long bodi bilong en i save palai i kamaut long nait na i go daun olsem long nambis na em i save laik kaikaim bodi bilong ol daiman.

Wanpela websait o stadi ples bai yu inap painim long kompyuta, ol i kolim genesispark.org we ol i save wokim stadi long dispela ol enimol i tok tok tu long Ropen na ol i tok ol lukluk bilong dispela enimol i wankain stret olsem ol pterosaur.

Dispela websait i tok tu olsem wanpela man Carl E. Bough husat i bin save wok wantaim Creation Evidence Museum, i bin go tupela taim long Niugini na em i bin lukim dispela enimol wantaim wanpela spesol glas bilong lukluk long nait na em i kisim piksa bilong wanpela narapela kain lek mak i pas long wasan long moning.

"Ropen em inap tru olsem pterosaur i stap yet na i no dai," narapela websait, angelfire.com i tok na long wankain taim i

soim tu piksa bilong Ropen wanpela atis i droim bihainim toktok na stori bilong ol lain long Siassi.

Websait BBC.co.uk i tok ol fosil o makmak bilong Rhamphorhynchus em ol i bin painim long graun malumalu aninit long wara long sauten Ingran tasol i gat sam-pela gutpela piksa bilong en em ol i painim long wanpela hap ol i digim graun na ston long Bavaria long sauten Jemeni.

### Profail


**N e m :** Rhamphorhynchus.  
**Mining bilong nem:** Bikpela longpela nus na maus.  
**Wanem kain animol:** Pterosaur.  
**Taim em i stap:** Let "Jurassic Period."  
**Kaikai bilong en:** Mit, pis, ol binatang.  
**Sala:** wing bilong en i ken i go i nap 2 mita.  
**Bodi bilong en i ken i go i nap 1 mita.**  
**Hevi:** i ken i go i nap 20kg.  
**We ol i painim ol mak bilong en:** United Kingdom, Germany na Tanzania.

**Woken bagarapim ol piksinim!**

En i rok bilong ol piksinim olsem yumi oten painim ol.

Na em i wok bilong yumi long i kaban porotim ol narapela.

**WANTOK** i go pas long dispela kempen.



• Sampela poto bilong bipo taim dispela plai bokis i stap raun long en.



Singaut long gavman i givim moa sapot long klos bisnis

.....PNG mas kamapim klos lo

Veronica Hatutasi i raitim



• Ol dispela klos we ol meri long WTTC i wokim em bai ol lain i makim PNG long Wol Ekspo long Japan bai werim.

BIKPELA singaut long ol meri greduet bilong Wimens Tekstail Trening Senta (WTTC) em long gavman i givim moa sapot long sait bilong fanding.

Naum Kailou i bin wokim dispela toktok long makim ol meri long namba 7 greduesen bilong ol las Fraide long Pot Mosbi. Moa long 30 meri i kam long ol kain grup olsem ol grasrut meri yet, ol sios grup na ol meri i wok tasol ol i laik skruim save long soma pi bin greduet bihain long ol i pinisim tripela mun skul bilong somap long WTTC insait long Godons Industri eleria.

Taim em i tok tenkyu long Nesanel Gavman na WTTC long kirapim dispela liklik tasol bikpela trening senta we i gat strong long kamapim bikpela mani long PNG na tu, strongim ol meri na yut long kisim save na helpim ol yet na komyuniti, Mis Kailou i bin makim maus bilong ol greduen na tokaut long tripela samting we ol i laikim gavman long lukluk long en na mekim.

"Gavman i mas apgredim trening, skruim taim na kisim trening i go aut long ol provins.

Putim moa mani long sapotim trening bikos klos bisnis o tekstail bisnis i ken kamapim bikpela mani long kantri na kamapim gut trening senta long ol sumatin na tisa i ken sindaun long gutpela ples na kisim trening," Mis Kailou i bin tok.

Long wankain taim tu, Minista bilong Tred na Industri Paul Tienstein i bin tok gavman i mas muv i go fowed long mekim kolos bisnis i kamap bikpela na kisim man i kam insait olsem maining, fising na ptrolium industri.

Em bin tok sapos ol i sapotim gut dispela bisnis, em i ken winim ol arapela bisnis long putim man ii kam insait long PNG.

Em bin tok PNG i mas kirapim wanpela Nesanel Polisi long klos bisnis we bai stiaim ol wok long dispela bisnis i bihainim long en.

# PNG lusim wanpela bikmeri....Dame Rose Kekedo i dai

Veronica Hatutasi i raitim

BIKMERI husat i bin mekim bikpela wok long developmen bilong edukesen na gavman na kamap olsem rol modul o gutpela piksa bilong ol meri long PNG i dai.

Dame Rose Kekedo i bin dai long las Fraide apinun, Februari 18 long haus bilong em long Boroko, Pot Mosbi bihain long e mi bin sik longpela taim wantaim sik ataraitis o bun i pen.

Leit Dame Rose i kamap long wanpela famili i gat bikpela nem long kantri we tripela memba i bin givim bikpela kontribusen.

Mama bilong em leit Dame Mary Kekedo i bin kisim bikpela luksave na em bin kisim awod long Dame long kontribusen bilong em long wok bilong edukesen na ol meri. Olsem tasol na Dame Rose i bin statim wok olsem skul tisa na wok hat long kamapim nem bilong



• Leit Dame Rose Kekedo i kamap long wanpela famili i gat bikpela nem long kantri we tripela memba i bin givim bikpela kontribusen.

em na ol meri long PNG. Em bin skul long Angliken skul long Dogura na bihain long Australia bipo e mi kam bek long PNG na go long Madang Tisa trening kolis. Em bin save mekim gut long wok bioong em na em bin kamap olsem namba wan meri long kamap bos long wanpela gavman di p a t m e n . Kontribusen bilong

em long edukesen em pro sansela long Yunivesiti ov PNG na Yunitek long Lae. Em bin kirapim tu Komyuniti na Failimi Laip Sevis na long 1980, em bin bosim dispela dipatmen. Em bin stap insait long wok bilong developim ol arapela eria olsem ol meri, pilai spot na ol arapela grup we i save helpim pipel long en.

Susa bilong em tu Jean Kekedo e mi wanpela bikmenr husat nau i makim PNG taim e mi holim wok olsem Hai Komisina long London.

Dame Rose i namba tu long 10-pela pikinini. Papa bilong em Walter Kekedo i bilong Milen Be na mama i bilong Yule Ailan long Sentrel provins.

Dame Rose i no bin marit tasol e mi gat 4-pela pikinini bioong ol brata na susa bilong em we em bin kisim ol na lukautim olsem bilong em yet.

Ol bai planim leit Dame Rose long 9 Mail matmat long Mosbi. Funerel lotu bilong em bai kamap tumora, Fraide.

Meriwantok i makim ol grasrut meri na salim tok sori long lusim wanpela meri lida na gutpela piksa bilong ol meri long PNG. God i ken givim yu gutpela malolo.

Laipstori bilong em bai kamap long neks wik.

## Lo bilong lukautim ol pikinini



Ol mak bilong luksave long "Physical Child Abuse" o bagarapim pikinini i kamap.

- 1- Ol mak long bodi o sampela hap bodi i bruk long ha we i paitim pikinini long en.
- 2- Pikinini i putim longpela han klos long hotpela de long haitim ol mak olsem
- 3- Soim olsem em i pret long papamaam na i no laik go long haus.
- 4- Pikinini bai laik poroman gut stret wantaim ol strenja o narapela lain.

I gat ol arapela pasin bilong bagarapim pikinini we i no bikpela tumas tasol em i ken kamapim hevi olsem ol arapela. Em long "emotional abuse", o bagarapim tingting na piling. Dispela i kamap taim yu tromoi o wokim toktok i no gutpela long pikinini, i no wari o i no bisi long pikinini na larim em i stap em yet.

Mak long i no wari long pikinini em yu no givim pikinini ol samting e mi nidim long sindaun olsem kaikai, klos, ples bilong slip na stap gut long en. Sot long ol dispela o sapos papamama i no bisi i ken bagarapim helt na gutpela kamap bilong pikinini long gro na lingting.

Moa long neks wik. ....

Sapos yu laik save moa long dispela lo na ol arapela samting i sut long famili, meri na pikinini hevi, go long ol dispela lain:

Ringim PACE (People Against Child Exploitation) PNG long Telipon Namba 3203375 o 3203376. Salim feks long 3214738 o yu ken rait i kam long ol long PO Box 5872, Boroko, NCD. Yu ken kisim ol tu long email etres: hausruth@hotmail.net.pg

Narapela em long UNICEF opis long Pot Mosbi. Ringim ol long telipon namba 321300. Yu ken rait long ol long dispela etres: UNICEF, PO Box 472, Port Moresby, PNG.

Narapela em long Family's Sexual Violence Action Committee. Yu ken kisim ol long telipon namba 3211714 o 320328 o salim feks long 3217223 o email:pngfvac@daltron.com.pg.

## Sotpela Tok Lukaut:

Skruiim tok long Obesity

OLSEM yumi mekim kila long las wik, Obesity em man i fatpela bikos em i fatpela abrusim mak long hait (height o tolpela bilong em) na mak long fat we e mi karim long en.

Mak long pipel i "obese" o fatpela i wok long go anyap. Insait long las 20 yias, mak bilong ol pikinini i kamap "obese" o fatpela i go dabel.

Bodi i no inap long storim ol protein o kaikai bilong bildim bodi na ol kaikai bilong givim strong (carbohydrates) na bodi i tainim ol dispela kaikai i go kamap ol fat o gris na storim insait long bodi. Em dispela i mekim man i kamap obese o fatpela abrusim mak.

Wanem samting i kamapim man i obese o fatpela abrusim mak?

Kaikaim moa kaikai abrusim mak bodi i ken yusim. Kisim planti alkohol o strongpela dring na kain laipstail we man i no wokim eksasais samting.

Moa long neks wik.

## Raun lukim ol meri na pikinini long PNG




• Ol CSN Sister long Chabai, Buka kisim malolo long bung. Foto: ALOYSIOUS LAUKAI



• Gutpela kaikai ya we dispela mama wantaim tupela pikinini bilong em i salim long Piam maket, Enga provins. Foto: FR PHIL GIBBS svd



• Hap wok ya bilong ol PNG mama! Mama ya i karim paiawut long kuk long famili. Foto: FR PHIL GIBBS SVD



• Dog em gutpela pren bilong man. Kas bilong tripela pikinini long Madang wantaim feveret dog bilong ol. Foto: SR ZELIA ssp

**Kuk Kona wantaim MERI WANTOK**

### Sago Dumplings

- Yu mas i gat:**
- Mau banana
  - Saksak pauda
  - 1-pela kokonas bilong kokonas milk sol
  - Kiinpela banana lip
- We long Kukim:**
- 1-Miksim banana na saksak pauda wantaim han. Rolim i go olsem bal.
  - 2- Hitim lip banana antap long paia long mekim i go sot
  - 3-Putim ol rol saksak long lip banana.
  - 4-Boilim kokonas milk na putim sol na saksak pasel.
  - 5- Kukim inap long 15 minit.
  - 6-Rausim wara na karamap bilong ol rol saksak
  - 7- Sevim wantaim pis.
- Bai i nais stret sapos ol i kol na yu kaikaim.

TOKTOK NATING Wantaim Fr. Paul Liwun SVD



FR. Ben San Luis, SVD - wanpela Pater bilong lain SVD bilong kantri Philippines - I bin wokim wanpela stori - long tripela boi bilong wanpela haikul long Philippines. Taim ol I save I gat test bilong matematik, tripela I bin kam leit long skul, bikos ol o pret long test na ol I no bin redi yet long wokim test.

Bihain long taim bilong test I pinis, tripela boy ya I bin kamap long kias rum na tokim tisa bilong ol: "Mipela I leit bikos Jeepney (olsem PMV long Philippines) bilong mipela I gat flet taia. Tripela I amamas tru taim ol I lukim tisa bilong ol I smail long ol. Na tisa I tokim ol: "OK, bois. Yupela I bin no stap long taim bilong test, tasol nau yupela I ken wokim test bilong yupela".

Tisa I bin tokim ol wan wan I sindaun long wan wan kona bilong klas rum na tokim ol wan wan: "Nau mi givim yu wanpela askim, nay u mas bekim wanpela ansa bilong em tu. Askim bilong mi I olsem: "wanem hap taia bilong jeepney I bin flet?"

Taim tisa I kolektim bekim bilong ol long pepa, em I bin painim aut I gat tripela bekim bilong tripela boi. Namba wan boi I bekim, fran rait sait, namba tu I bekim rait sait bilong bek sait taia, na namba tri boi I bekim left taia bilong beksait bilong jeepney. Olgeta I bin givim bekim bilong ol I narakain narakain. Bihain long cekim ol pepa wok bilong ol, tisa I bin tokim ol: "YUPELA I GIAMAN OLSEM JEEPNEY BILONG YUPELA I GAT FLET TAIA."

Stori bilong Pater Ben Sal I klostu wankain long stori bilong Gutrius yumi ritim long Sande namba tri bilong Len. Stori bilong wanpela meri bilong Samaria I bungim na toktok wantaim Jisas long wel bilong Jacob. (Jo 9: 1-41). Long taim eem I toktok wantaim Jisas, meri bilong Samaria I no bin givim stretpela bekim long Jisas. Em I haidim sampela hap bilong stori bilong laip bilong em. Taim Jisas I askim em go na kisim man bilong em I kam, meri ya I bekim: "Mi nogat man".

Jisas I bin strongim dispela tok bilong meri: "Yu tok tru. Bikos yu bin maritime 5-pela man na man, nau yu stap wantaim em, em I no trupela man bilong yu (Jo. 4: 7). Marit laip bilong meri bilong samaria I no stret. Tasol Jisa I no bin kondemim em o rausim em o daunim em.

Stori bilong Jisas wantaim meri bilong Samaria I soim olsem wanpela sol I bin pait hat tru long kirap long laip nogut bilong em. Jisas I bin mekim em I bin kirap nogut long luksave long laip bilong em yet.

I nogat wanpela man o meri bait ok nogat sapos mi tok olsem laip bilong yumi wan wan I olsem laip bilong meri bilong Samaria. I gat lait dan tudak, tupela I stap insait long laip bilong yumi. Yumi bin mekim hat long laip bilong yumi, bikos yumi haitim sampela experience bilong yumi long ol narapela manmeri bikos yumi pret, nogut ol manmeri I lusim yumi o tingting nogut long yumi.

Wanpela samting yumi tingim gut - maski yumi haitim ol pasin nogut bilong yumi long tudak sait bilong laip bilong yumi, tasol -Got I save olgeta-samting. Ples tudak bilong yumi bai kamap ples klia olsem tripela boi bilong stori I bin stap antap, o tripela boi bilong hais skul.

Nau yumi stap long namba tri wik bilong Len. Len em I wanpela gutpela taim bilong yumi long lukluk na luksave long pasin bilong yumi yet, tudak pasin bilong yumi, na stat gen wantaim nupela spirit.

Maski yumi giamanim ol narapela manmeri olsem tripela hais skul mangki - tasol tingim gut, yu no inap giamanim Got. Got I save pinis olgeta samting insait long bel bilong yumi, maski yumi yet I no save gut.

Lotu sevis long tok tenkyu na pasim sunami na manam apil

Veronica Hatutasi i raitim

TOK Tenkyu lotu sevis we ol Intafeit lain i bin hoim i bin pasim ol wok we kantri, ol pipel na ol wan wn grup i bin wokim long resim mani na ol arapela samting bilong helpim ol Esia sunami na Manam maunten paia birua lain.

Long dispela sevis, ol lotu olsem Budis, Islam o Muslim, Sikhisim, Jewisim, Bahai, na ol Kristen Sios olsem Katolik, Angliken, Luteran, Yunaitet na Salvesen Ami i bin bung wantaim gen long ofaim prea long tok tenkyu long Bikman long laip we yum ii gat

na putim pipel na olgeta samting i kamap long dispela graun long han na lukaut bilong em.

Samting olsem 100 pipel i bin bung long Stone Kami Memoriel Sios long Gordons long stap insait long dispela preia sevis long selebretim taim bilong hiling o kamap orait, kisim nupela laip na hop. Ol lain i makim wan wan sios ya i bin sanap long fran na wan wan long ol

i bin ritim preia we i sut long dispela tok tenkyu lotu sevis.

Na long pinis bilong sevis, olgeta wan wan sios i bin kapsaitim glas wara i go long wanpela bikipela han bilong klam sel long makim bung na wok wantaim bilong ol sios ya.

Long dispela bung tu, Dokta Puka Temu husat i makim Nesenel Kodineting Komiti (NCC) bilong Saut us Esia sunami na Manam Volkeno Apil na lain lain komiti memba bilong e mi bin kamap na wokim toktok makim maus bilong gavman.

Ol arapela bikman i bin stap tu long dispela sios sevis em long NCC komiti memba Sir Brian Bell, Sir William Skate, Ambaseda bilong Indonesia Johannes Djopari na ol sios lida.

Em bin namba wan taim long Intafeit grup i bung insait long wanpela Kristen Sios.

Doka Temu taim em i tok tenkyu long ol sios long kamapim dispela bung i bin tok "dispela em i narakain samting stret tai mol sios lida bilong Intafeit i bung wantaim long wanpela



• Ol lain i makim wan wan sios i sanap long ritim ol preia. Hia yumi iukim yangpela man i makim lotu Jewisim i ritim preia. Meri i makim Sikh lotu i redi long ritim preia bilong em.

Kristen sios (long PNG). Em i soim gutpela mak bilong bung wantaim long ol sios," Dokta Temu i bin tok.

Em bin luksave long bikipela wok we ol

Kristen sios i mekim long PNG insait long las 30 yias, moa yet long sait bilong givim sevis na helpim kantri na pipel long ol wok divelopmen.

Dokta Temu i bin tok ol fan resing wok long helpim ol sunami na volkeno birua i bin pinis long dispela Mande Februari 28.

PNG kamapim K3.6 milien bilong Esia sunami na Manam volkeno .....Dokta Temu luksave long Intafeit grup

Veronica Hatutasi i raitim

MANI MAK bilong helpim ol Esia sunami birua na Manam Volkeno we i stap pinis long beng akaun em K3.6 milien. Dispela manimak i bin stap long beng akaun we Nesenel Kodineting Komiti i gat long en.

Siaman bilong Nesenel Kodineting Komiti (NCC) Dokta Puka Temu i bin tokaut

long manimak ya long Intafiet lotu sevis i bin kamap long las Sande bilong pasim fan resing na tok tenkyu long God long olgeta helpim PNG i givim i go long ol lain long Esia na Manam Ailan is tap long bikipela hevi we netja yet i kamapim.

Dokta Temu it ok i gat dinau yet is tap ol provinsel gavman, ol Nesenel Dipatmen na fan resing bilong las Fraide na manimak

long dispela em K1.4 milien. Na sapos ol i putim dispela mani wantaim, em bai abrusim K5 milien taget we gavman i bin ting em bai resim.

Dokta Temu i bin tokaut long manimak long 6-pela long tras akaun we pablik i gat pablik luksave long ol is tap pinis long en. Na ol dispela mani wantaim ol arapela i kamapim manimak long K3.6 milien.

Namba wan tras akaun em dispela we MP bilong Nesenel Kapitel Distrik Rijinel Sir William Skate na Embaseda bilong Indonesia i bin kirapim na em i bin kamapim K179,620.2- PNG Red Cross- K165,335.25. 3- Sri Lankan Komyuniti K108,027.27, 4- Caritas PNG- K90,728.60, 5- National Government Tras Akaun-K2,960,02.04

Dokta Temu it ok long dispela wik, ol bai askim ol lain i wokim promis long luksave long promis bilong ol na ol i ken bungim wantaim na givim i go long tupela sunami na volkeno birua lain.

Ol dispela wok bai i mas pinis insait long dispela wik.

Em bin tok Komiti bai redim opisel ripot long ol dispela mani na givim i go long Nesenel Gavman we bai skelim hap long go long sunami na hap i go long Manam Volkeno apil.

Dokta Temu i bin tok amamas long ol pipel bilong PNG long mekim samting kwik tru long helpim ol trangu brata susa long Esia na long kantri bilong yumi yet.

"Olsem nesenel kodineta, mi amamas tru long helpim we pipel bilong yumi we i

karamapim ol lain i nogat wok, ol wan wan grup maski ol i bilong lotu lain, ol spot klab o o bikipela kampani na gavman, ol pipel yet i bin givim long lewa bilong ol na wokim ol fan resing. Dispela i autim long ples klia pasin tumbuna bilong yumi long helpim wanpela narapela long taim bilong hevi," Dokta Temu i bin tok.

Em bin tok dispela Intafeit lotu toktok na wok wantaim i bin kamap gut, maski ol wan wan sios i gat ol narakain we long mekim samting, tasol pasin bilong wok bung wantaim na helpim ol narapela is tap long bikipela hevi i kamap.

Em bin tok wanpela samting yumi olsem kantri i lainim long nesenel rispons o we kantri i mekim samting long helpim ol arapela i kisim bikipela hevi em long kisim i kam insait ol dispela lesan long wei yumi wokim bisnis taim yumi gat ol dispela bikipela hevi.

Em bin tok PNG na wol bai bunigm ol bikipela birua yet na dispela helpim we wol na yumi i givim long rijinei na nesenel level bai helpim yumi long redi gut long ol dispela kain hevi.



"Ol Kristen i mas wokabaut long nupela pasin"

Sapos bel bilong yupela i hat, orait yupela lukaut. Nogut yupela i mekim sin. Nogut yupela i belhat yet i stap na san i go daun. Nogut yupela i opim dua long Satan. Ol stilman i no ken stil moa. Nogat. Nau ol i mas wok. Ol i mas mekim gutpela wok long han bilong yet, na ol bai i kisim planti samting, inap long ol i ken helpim ol man i sot long ol samting. Yupela i no ken tarim ol kainkain tok nogut i kamap, inap long strongim ol man i slek. Dispela kain tok i save bringim marimari bilong God i kam long ol man i harim. Yupela i no ken givim bel hevi long Holi Spirit bilong God. God i givim Holi Spirit long yupela olsem mak bilong yupela i stap ol manmeri bilong em stret, na bilong soim yupela olsem em i makim taim bilong kisim bek yupela na mekim yupela i kamap fri tru. Yupela i mas rausim olgeta pasin bilong bel nogut na kros na belhat na bikmaus na tok bilas, na olgeta kain pasin nogut. Yupela i mas mekim gutpela pasin long ol arapela Kristen na givim bel bilong yupela long ol. Yupela i mas lusim sin bilong yupela long nem bilong Kraus.

Efesus 4: 26-32

Stori bilong Blessed John Mazzucconi, Matir na Santu bilong Woodlark Ailan, Milen Be provins.

LONG mun Septemba bilong dispela yia, Katolik Sios bai selebretim 100 yias long dai bilong Blesset John Mazzucconi PIME em wanpela yangpela Katolik misinari pater husat i bin kisim lotu i go long Woodlark Ailan insait long Milen Be long leit 1800.

Tasol wanpela bikman husat i birua bilong ol misinari bilong ailan yet i bin kilim em i dai. Belssed John Mazzucconi i bin gat 29 kris-mas tasol taim em i kamap matir bilong Katolik Sios. Em i bilong kantri Itali. Wok long mekim John i kamap Santu i bin stat long Milan long 1959 na long Janueri 1983, Pop John Paul 2 i bin wokim lotu long luksave long Pater John na



mekim em i kamap santu we ol i kolim em Blessed John Mazzucconi. Nem bilong buk we stori i kam long en em: "Mazzucconi of Woodlark-Priest and Martyr" by Nicholas Maestrini PIME na Catholic Truth Society & PIME of Detroit-USA i pablisim o kamapim dispela buk. Stat long dispela wik, bai sotpela stori long laip na wok bilong em bai kamap long Wantok. Moa stori long neks wik.

**Glasm tok wantaim  
Bisop Peter Fox**

NOGAT man i bin save monsta i kam we. Ol no bin save em i luk olsem wanem. Sampela kain animal i wok long hait long bik-bus na kilim ol pipel i lus long rot. Em brukim bus na hait i go long gaden na stilim ol kaikai. Em i go long haus na poisinim ol pikinini.



moa yet.

Ol bikman long ples i holim bung na singautim olgeta ples lain long go. Ol i pasim tok olsem ol bai kisim olgeta samting long paitim dispela monsta wantaim. Na ol meri na pikinini i pulim lain tu i go paitim dispela samting nogut long bus.

Ol i salim toktok i go long narapela ples klostu. Ol i tok yum ii save birua tasol nau, i gat strongpela moa birua i kamap. Mipela i mas helpim wanpela narapela na kilim dispela birua animal na ples bilong mipela bai stap gut.

Dispela em i trupela stori? Yes, em i tru. Yumi save long dispela monsta nau. Nem bilong en em HIV AIDS. Yumi i no inap lukim tasol yumi save olsem em i wok long kilim dai planti pipel, ol pikinini tu. Em i bagarapim kantri bilong yumi na ol pipel we yumi laikim.

Yumi mas putim han wantaim na rausim dispela monsta ol i kolim HIV AIDS olsem

em i wanpela birua animal long ples bilong yumi. Yumi mas wok wantaim bikos yumi yet i no strong. Masi yumi no wanpela tok-ples husat i save birua long bipo taim yet i mas lusim tingting long dispela. Strongpela na nogut birua tru i stap we bai bagarapim ol pipel bilong yumi sapos yumi no helpim wanpela arapela.

Esia sunami na Manam mauntain paia birua i bungim yumi na yumi wok wantaim long helpim ol famili long ol lain i bungim hevi na bagarap.

Yumi no wari wanem ples yumi kam long em, wanem sios bilong yumi na wanem tokples bilong yumi. Yumi bin save olsem yumi mas givim helpim.

Sunami i bagarapim planti pipel we mak bilong ol is tap long tausen. Bikipela sori tru long lusim planti lain. Tasol HIV AIDS i nogut

Planti milien pipel i dai long HIV AIDS long wol na bai i gat moa dai i kamap.

Yumi mas lusim ol kain politiks bilong yumi bihain na wok bung wantaim.

Vilis bilong yumi i stap long hevi. Ol neiba bilong yumi long narapela viles i stap long hevi.

Yumi nogat taim long tok kros namel long yumi tasol yumi mas putim han wantaim na pait egensim dispela monsta sapos yumi laikim ol pikinini bilong yumi i stap laip.

Ol samting bilong pait we yumi yusim i no ol bunaro, tasol laik pasin na pasin bilong sori long ol siklain na tu, lukautim gut bodi bilong yumi na bilong narapela.

Yumi noken ting olsem dispela em wari bilong narapela. Em i hevi bilong yumi olgeta na yumi olgeta i ken kamapim sampela senis.

Sapos yu no save hau bai yu stat, orait, go na toktok wantaim ol komyuniti lida, long ol bikman, ol sios lida na pasto. Yu ken askim ol olsem" yumi mekim wanem long pait egensim HIV AIDS? Komyuniti i wokim wanem na sios bilong yumi i wokim wanem? Mi ken wokim wanem samting?"

Tok lukaut long ol pikinini bilong yu long birua. Lukautim yu yet gut na monsta i noken kisim yu. Helpim ol pipel i kisim bagarap pinis. Yumi wantaim i ken winim em.

Mi save olsem yu les pinis long harim ol tok-tok long HIV AIDS. Mi wok long toktok wantaim wanpela man Zimbabwe las wik husat i les long planim ol lain poroman bilong em i wok long dai.

Monsta bai i no inap long lus o pinis sapos yumi no bisi o i no wokim samting long en.

# Risain bilong Pop i hatpela samting

POP i risain o makim krismas we ol Pop i mas ritata o pinis wok em ol toktok i kamap insait long Katolik Sios nau taim Pop John Paul 2 i wok long sik.

Long ol toktok, em i hat long Pop long karimaut wok bilong em taim em i sik tru olsem na i moabeta long givim wok long narapela.

Ol ripot i kam long Vatiken i tok dispela askim na toktok long Pop i risain em i samting we ol i lusim long han bilong Pop yet.

"Risain bilong Pop em samting we moabeta yumi lusim long tingting bilong Pop John Paul 2," Vatiken i tok.

Dispela toktok i kirapim toktok gen we i wok long kamap isi long planti krismas. Kenon Lo bilong Katolik Sios i tok Pop i ken risain tasol dispela i mas kamap long tingting na laik bilong em yet. Tasol nogat man o lain long Vatiken i tokaut long pablik long risain bilong Pop.

Katolik sios i save givim luksave long Pop olsem het bilong sios na i no save

askim tumas risain o ritual krismas bilong Pop.

Tasol long ol ripot, Pop bai holim wok olsem het bilong Katolik Sios long graun inap long dai bilong em.

Planti pipel i gat bikpela luksave long Pop John Paul 2 olsem wanpela strongpela man husat i save tingim ol sios mamba bilong em long wol.

Em i bin gat operesen long nek bilong em long Gemeli Haus sik long Rom las Fonde bikos em bin gat sik long nek na em bin painim hat long pulim win na tok-tok. Planti Katolik pipel long wol i bin wari na pre long en long dispela taim Pop i no stap gut. Tasol em i orait gen na i go bek pinis long haus.

Pop John Paul 2 i gat 84 krismas na em i wok long sik.planti. Em i wok long no strong tumas nau. Tasol em i i go het long karimaut wok bilong em olsem het bilong Katolik Sios long wol.

Pop John Paul 2 em i holim wok olsem lida bilong Katolik Sios long 26 krismas



• Pop i sik tasol em i givim blesing yet long ol pipel.

na em i namba tri Pop long holim wok long longpela taim. Las mun, em bin sik na stap long haus sik long 10-pela de. Namba tu bilong em, Kadinel Angelo Sodano i bin go pas long ol wok taim Pop i sik.



**Ol Musik Man...Ol dispela lain trampet pilaia em ol mamba bilong Papua Distrik Luteran Sios. Ol bai gat wanpela bung bilong ol long Kainantu, Isten Hailans provins long mun Jun. Musik Ministri bilong sios i save strongim ol yut na ol narapela long pilaim ol kain musik instramen. Foto: PAULUS TALI**

## Sios Kaunsel rausim Amerika na Kanada

*...Wari long sios i bruk long manman marit*

ANGLIKEN Sios long wol i bungim hevi long sios long Amerika na Kanada inap long bruk.

Dispela i bihainim manman i marit we sios long Amerika na Kanada i makim dispela kain man long kisim wok olsem bisop. Ol i kolim ol dispela kain man long Homosexual o Gay long Tok Inglis.

Bung bilong ol Angliken Bisop long wol ol bin holim long Noten Ailan las wik i bin wokim disisen long rausim sios long Amerika na Kanada long Sios Kaunsel.

Het bilong Angliken Sios long wol Asbisop bilong Kenteburi, Asbisop Dokta Rowan Williams, i luksave long dispela hevi long sios long manman i marit na dispela i wok long laik brukim 70 milien Angliken Sios mamba long wol.

Em bin tok ol lain i wokim dispela disisen i no bin tingting planti long hevi em bai kamapim long sios long wol.

Praimet bilong Ailan Robin Eames husat i bin siaman bilong bikpela Angliken Sios bung it ok i moabeta long Amerika na Kanada i lusim Sios Kaunsel long laik bilong ol yet long traime stretim hevi.

Planti Angliken sios mamba long Afrika na Yurop tu i egensim stret dispela pasin bilong manman i marit i holim wok long sios.

Long wankain taim tu, ol gay Kristen grup i no wanbel long ol Praimet long sutim tok long sios long Amerika. Ol i tok hevi i bin stap moa long 30 krismas na na ol sios lida i no bin bisi long lukluk na stretim hevi.

## Asdaiosis na Katolik Sios lusim gutpela wokman

KATOLIK Bisops Konferens (CBC) i autim bikpela tok tenkyu long wanpela yangpela pater bilong Filipins husat i go bek long wok long kantri bilong em las wik Trinde Februari 24.

Pater Vester (Reveren Sylvester Cassaclang) husat i mamba bilong Salesien ov Don Bosco misinari oda i kisim singaut long oda bilong em long wok long Manila.


Jenerel Seketeri bilong CBC Lawrence Stevens i tok Katolik Sios i sori long lusim Pater Vester husat i gat planti save, karimaut planti kain kain wok long planti eria long sios na em i save redi long givim helpim na em i gat planti gutpela poroman.

Aninit long pater Vester, Katolik Yut Ministri i bin go gut. Na em bin mekim bikpela wok long Jenerel Asembli, Mista Stephens i bin tok.

"I luk olsem long sampela yia nau, Pater Vester i wanpela man wantaim planti save long ol kainkain eria, karimaut planti wok, poroman na em i gutpela poroman long planti. Mipela i lukim em i karimaut wok long planti eria na em bai hat long no lukim em i kam kamap na givim helpim bilong em. Taim CBC i bungim hrvi long mani sot, Pater Vester i bin kam na karimaut gutpela wok na em i mekim wok nating, nogat pe long en," em i tok.

# Nius Bilong HIV AIDS

Tok Lukaut



wantaim David Ephraim

LONG dispela wik long bai mi toktok long wanpela kibung we Youth Against Corruption Association (YACA) i bin holim long Jubilee Sekonderi Skul long Hohola, Pot Mosbi. YACA em wanpela Asosiesen we Pater John M. Glynn i bin kamapim wantaim ol sumatin bilong Jubilee Sekonderi Skul.

Bikpela as tingting bilong dispela grup em long traim long daunim pasin korapsen insait long kantri. YACA i kisim bikpela sapot i kam long Transparency International long wokim ol wok bilong ol. Long Sarere, Februari 10, YACA i bin holim namba foa kibung bilong ol we i lukim planti yangpela i bin kamap long kibung. Pater Jude bilong Simon of Cyrene i bin givim HIV AIDS aweanes na bihain long aweanes ol yangpela i bin bruk i go insait long 12 grup na traim long kamap wantaim as tingting bilong ol long HIV AIDS insait long kantri.

Mi bin stap insait long wanpela grup we ol i toktok strong long mas i gat moa aweanes i go insait long komyuniti. Wanpela grup i bin tok olsem pasin bilong pret i wokim hat moa long helpim long daunim na abrusim sik HIV AIDS.

Theresa Kapera, Kila Kila, Ageline Asimi, Ali Aribu, Rachel na Claire Henry bilong Jubilee Sekonderi i bin wanpela grup we i tok i mas gat planti aweanes long toktok long maus long lainim ol manmeri long HIV AIDS bikos planti manmeri i no save long rit na rait.

Ol i tok strong tu olsem i mas i gat kristen aweanes long kirap bilong HIV AIDS.

Bikpela samting ol i tok strong long i mas gat planti sapot long helpim ol sumatin long lainim ol kain bikpela hevi we i laik bagarapim laip bilong ol.

Sapos yu laik save moa long Youth Against Corruption yu ken rait i go long:

Fr. John M. Glynn  
Jubilee Catholic Secondary School  
PO Box 1099, Boroko, NCD  
Ph: 311 2300 (school) o 323 5667 (home)  
Fax: 323 7044  
E m a i l : jonmglyn@global.net.pg

### Tok Lukaut

PLANTI taim yumi toktok tumas long ol rait bilong ol pikinini, ol meri na yangpela lain tasol na yumi no save toktok tumas long ol lapun bilong yumi. Long kirap bilong HIV AIDS insait long kantri planti ol lapun tu i kisim bikpela hevi long harim na lukim ol pikinini bilong ol i dai long HIV AIDS. Sapos ol tu i kisim planti manmeri i wok long tok olsem "em lapun ya taim bilong em pinis lusim em i dai."

Dispela em sampela kain pasin we i wok long bagarapim planti manmeri insait long kantri bilong yumi pinis. Long dispela taim yumi stap we yumi gat ol nupela kain teknologi sistem long yusim.

Planti ol lapun i no klia tumas long ol infomesen tru long nau teknologi i wokim planti i popaia long givim tok skul long ol pipel bilong ol.

Dispela em sampela samting yumi mas luk-save na traim long kamap wantaim ol gutpela rot long helpim ol lapun bilong yumi long dispela rot bai ol i ken givim gutpela stia tok-tok bilong kastom long helpim yumi long lukautim yumi yet. Noken ting olsem pasin stail bilong waitman bai helpim yumi. Yu mas save olsem yumi PNG na pasin kastom bilong yumi tasol i ken wokim yu luk tru olsem man meri bilong PNG stret.

Long kirap bilong HIV AIDS planti i wok long sut long tingting long traim daunim na rausim dispela birua. Sapos yumi no pasim rot bilong helpim ol lapun bilong yumi tete.

Bai olgeta kastom pasin bai dai wantaim ol na yumi bai kamap olsem trip manmeri tasol.

# Baim pastaim na greduet - UPNG

### Maisan Pahun i raitim

OL SUMATIN long Yunivesiti bilong Papua Niugini (UPNG) husat bai greduet long dispela yia i mas baim pastaim gown na hood, em klos bilong werim long taim bilong greduesen.

Sapos yu no baim bai yu no greduet. Na tu, yunivesiti tambu long ol sumatin long yusim klos bilong narapela lain husat i greduet bipo. Ol lain i baim gown na hood long UPNG tasol bai greduet na sumatin i no baim bai kisim hap pepa bilong ol bihain long ol narapela i kisim.

Long wanpela toksave i go aut, rejista bilong UPNG, Vicent Malaibe, i tok olsem bukstoa long UPNG tasol bai salim dispela hood na gown na i no narapela stoa o hap nabaut.

Ol sumatin bilong greduet mas baim long dispela hap tasol na greduet bikos long greduesen taim, bai sumatin i mas soim risit bilong we i soim olsem ol i baim gown na hood long yunivesiti bukstoa, em i tok.

Dispela i mekim planti sumatin na ol papamama bel kros na i no amamas bikos

long ol yia bipo i kam inap long las greduesen bilong las yia 2004, UPNG i save putim ol greduesen gown na hood long rent na tu ol sumatin i ken yusim long narapela na bihain bekim. Tasol long dispela yia UPNG i tok ol i mas baim na noken dinau o rentim.

Dispela em i bikpela mani tru long ol planti sumatin insait long kantri we i no painim wok yet na bai greduet long dispela yia.

Wantok Niuspepa i traim long toktok long opis bilong rejista long mun Disemba yet i kam nau na em i nogat bekim i kamap long askim wanem as na em i putim dispela strongpela toktok long tambuim long yusim greduesen klos bilong sampela poroman o famili memba i greduet pinis o i rentim long yunivesiti yet.

Tasol long ol toktok i go raun em olsem long bipo, sampela sumatin i no save bekim bek ol gown na hood we ol i rentim long yunivesiti.

Wanpela sumatin bilong Sains Fakalti i bin autim bel hevi bilong wanem em bai greduet na em i no painim yet wok na raun nating i stap long Mosbi.

"Mi bai werim olpela gown na hood bilong susa bilong mi tasol sapos ol i laikim mi long baim nupela gown, lusim, mi no gat mani long baim nupela gown," dispela sumatin, Eddie, i tok.

Ol sumatin nau i mas painim K360 sapos ol bai kisim diploma long greduesen bilong ol, na ol digri lain bai peim K469 long greduet. Na ol lain husat bai kisim mastas bilong ol bai baim K819 long hood na gown bilong greduet.

"Dispela kain samting i bilong wan de tasol na i kostim bikpela mani tumas, maski kain olsem, go kisim pepa tasol na lus tingting long stap insait long greduesen," wanpela narapela sumatin i bin tok bihain long em i kisim dispela toksave.

Wanpela meri husat i save wok long yunivesiti bukstoa i tok nogat sumatin i go baim gown na hood bilong greduet yet bikos planti nem bilong ol sumatin bilong greduet i no kam aut yet. Namba 24 greduesen bilong UPNG bai kamap long April 8, 2005.

"Yupela kam baim gown na hood long hia na karim risit long soim taim yupela laik greduet," dispela meri i tok.



**Strongim Yangpela Laip...Strongpela toktok bilong Gavana Jenerel Sir Paulias Matane i go long ol skul sumatin na yangpela long joinim Girl Guides na Boy Scout muvmen long PNG. Ol skul na yangpela pipel long kantri i kisim strongpela askim long kamap ol Scout manmeri bikos dispela bai skulim ol gutpela pasin long stiaim gut laip bilong ol. Long poto ol skul pikinini meri long Nesenel Kapitel Distrik i joinim Girl Guides Asosiesen bilong PNG. Poto: YAKAM KELO**

## Ol gret 10 sumatin mas wokim gret 11 - EHP

### Maisan Pahun i raitim

OLGETA gret 10 sumatin bilong yia 2004 long Isten Hailans Provins (EHP) husat i bin wokim gut long tes bilong ol bai nau wokim gret 11 long ol Sekonderi skul insait long provins long dispela yia. I no olsem long las yia we 276 sumatin husat inap go wokim gret 11 i no kisim wanpela spes na bin go back long ples.

Dispela em i nambawan taim insait long provins bihain long EHP Edukesen komiti aninit long provinsel gavman i givim K50, 000 i go long helpim ol dispela sumatin long go wokim gret 11.

Dispela K50, 000 em blong kamapim tupela gret 11 klas we 3-pela Sekonderi skul insait long provins bai i skelim ol sumatin i go i kam long skul. Kabiufa Sekonderi skul bai i kisim 37 sumatin, Bena Bena 35 na Henganofi 17.

Provinsel Asisten Opisa, Peter Oiyato, i tok dis-

pela K50, 000 bai i go long ol dispela skul na tu em i salim nem bilong ol sumatin i go pinis long Edukesen Seketeri long kamapim tok orait pastaim.

Prinsipol bilong Kabiufa Sekonderi Skul, Joe Ponduk, i tok em i lukim nid bilong gret 11 spes long las yia na i bin raitim pas i go long Provinsel Edukesen na askim Provinsel Gavman long helpim wantaim kos bilong kamapim nupela gret 11.

Isten Hailans provins i kam namba tu long Nesenel Kapitel Distrik we i gat nid long kamapim ol gret 11 bikos planti gret 10 sumatin i save pinis wantaim gutpela mak long go wokim gret 12.

Dispela i bin kamap long wanpela tingting bilong Education Advisory Committee we polisi i tok long 'Transition to Upper Secondary Education'.

Olgeta gret 10 sumatin wantaim gutpela mak i mas go yet long wokim gret 11 long bihain taim polisi i tok.

## Rotari givim 32 desk bilong skul

ROTARY International PNG (RIPNG) bai i kisim 32 desk bilong ol sumatin i kam long Australia bihain long neks mun.

Dispela em i nambawan helpim i kamap long dispela yia na tu sampela moa long wankain helpim bai i kam long namel long yia samting. Dispela 32 stap long kontena na bai kam long PNG klostu taim nau.

Man husat i save salim ol kontena kago i kam long PNG, Robi Jeffrey, i tok dispela em nambawan kontena bilong dispela yia. "Olgeta yia mipela i save salim ol skul samting na haus sik marasin insait long kontena i kam long PNG long helpim ol liklik pikinini," Mista Jeffrey i tok.

Long makim 100 yia bilong sariti wok insait long kantri, Rotary i kamapim wanpela bikpela bung long haus Palamen long las wiken we i lukim moa long 500 RIPNG memba i kam.

Mista Jeffery em ol i save kolim em 'kontena man' bikos taim olgeta kontena i kam long PNG em i save salim i kam. "Yu givim wanpela buk long wanpela pikinini long developing kantri na helpim em save long wol, em i tok."

- Maisan Pahun

# Gavman bai peim skul fi bilong Manam

MICHAEL NOVINGU i raitim

LAS wik ol opisa bilong Edukesen Dipatmen long Pot Mosbi i lukluk raun long ol kea senta long Bogia. Ol i tokim ol pipel bilong Manam we ol i kisim bagarap long maunten bai peim skul fi bilong ol pikinini bilong ol long yia 2005. Dispela tok orait i bin i kam long gavman long peim skul fi bilong ol pikinini bihain long ol i painimaut olsem i hat long ol Manam pipel long painim mani long peim skul fi.

Fes asisten seketeri bilong Edukesen Dipatmen Mista Pala Wari i tokim Wantok long Asuramba Kea Senta gavman bai peim skul fi long ol pikinini i stap long elementari i go long gret 10, 11, 12,

yunivesiti na ol arapela koles tu. Dispela helpim em i bilong ol pikinini we maunten paia i bin bagarapim ol. Ol arapela Manam pipel i stap long ol arapela hap bilong dispela kantri gavman i no inap long peim skul fi bilong ol. Mista Pala i go moa na i tok gavman bai givim ol samting bilong skul olsem buk, pen, pensil na ol arapela samting bilong skul. Na tu gavman bai wokim haus skul bilong ol pikinini bilong ol lain i stap long kea senta. Long wankain taim provinsel helt edvaisa Mista Marcus Kachau tu i lukluk raun long ol kea senta. Em i bungim ol pipel na i tokim ol olsem gavman bai wokim ol eidpos bilong ol insait long wanwan kea senta. Dispela ol eidpos em

gavman bilong Australia (AusAID) yet bai putim mani i kam insait na bai ol i wokim. Em i tok tu olsem dispela em i wok bilong helt dipatmen long helpim ol pipel bilong Manam long kisim gutpela helt servis long lukautim sindaun bilong ol long ol kea senta.



• Hap sik long wet long go insait long benk long olgeta moning. Hia long poto ol kastoma bilong BSP Benk long Waigani i sanap ausait long benk. Sapos yu kam leit, sori tru, yu em lasman tru.

# Amamas wantaim ol sik manmeri rausim pret pasin long ol AIDS lain

Veronica Hatutasi i raitim

WOKABAUT i go long lukim, toktok na prea wantaim ol lain i gat sik HIV/AIDS i daunim pasin pret na rabisim ol, Pater Paul Liwun bilong Sen Peter Chanel Peris Erima insait long Nesenel Kapitil Provins i tok. Em it ok olsem bihain long wanpela bikpela grup long peris bilong e mi raun lukim ol sik lain long Wod 4A, 4B na 4D long Pot Mosbi Jenerel haus sik las Sarere moning. Peris i wok long bihainim Lent Progem bilong Katolik Asdaiosis bilong Pot Mosbi we i sut long helpim ol manmeri i gat sik HIV/AIDS na ol yut. Planti Erima Katolik peris memba i bin bungim ol presen olsem toilet pepa, sop, ol kaikai, klos na ol arapela samting we ol siklain i laikim na givim ol. Ol bin statim wokabaut bilong ol long 6 kilok moning yet. Taim ol i go long haus sik, ol bin gat taim long toktok, givim presen na prea wantaim ol sik manmeri bilong ol kain lotu. Pater Paul i tok long nau, program bilong Lent we Asdaiosis i gat long en long ol peris i karimaut em bilong karimaut aweanes long lukautim ol manmeri i gat HIV/AIDS. Dispela em i nupela samting na Erima Peris i no stap isi tasol bihain long opim bilong program long Sande long Februeri 10, planti perisina bilong Erima i bungim ol presen samting na go long haus sik long bungim ol sikman na stori, singsing na prea wantaim ol. Pater i tok em i belgut long lukim olsem bihain long ol perisi na i prea wantaim ol dispela sik manmeri. ol i no moa pret long ol. "Mi lukim olsem bihain long preia wantaim ol sik AIDS lain, ol pipel i no pret. Mi lukim olsem ol i kisim laik long lukautim ol na i no moa pret," Pater Paul i tok. Em i tok ol siklain tu i bin amamas tru long ol Erima Perisina i mekim dispela wokabaut i go long ol na ol i prea na toktok wantaim ol na ol i givim presen i go long ol. Em i tok long olgeta Fraide bihain long Rot bilong Kruse long apinun 5.30pm, ol bai mekim prea bilong ol siklain long Erima Sios.

## Best Brand... Liklik Prais!

**SWITCH ON TO**

**SEIVIM K100**

**LONG FOTNAIT KES K32** \$695

**DIPOSIT K1.00**

**SEIVIM K604**

**LONG FOTNAIT KES K52** \$1,195

**DIPOSIT K1.00**

**LONG FOTNAIT KES K19** \$349

**DIPOSIT K1.00**

**SEIVIM K50**

**LONG FOTNAIT KES K14** \$225

**DIPOSIT K1.00**

**SEIVIM K74**

**LONG FOTNAIT KES K11** \$175

**DIPOSIT K1.00**

**SEIVIM K54**

**FREE TREADLE Sewing Machine** with every purchase **Over K1,499**

**Gold Ras Driman Prais**

**WIN**

- NESA PNG FOAM 6 SITA LAUNS SIA
- RURAL POWER SUPPLIES PLES KANAKA SOLA PAWA LAIT
- BOROKO MOTORS HONDA KADEN TOOLS
- COURTS - K5,000.00 KES MONI
- MADANG RESORT HOTEL WIKEN TRIP BILONG TUPELA
- SVS - SO KLIN DETESEN PAKET VALU LONG K500
- CONXIONS - MOBILE PHONE + START UP KITS
- COURTS - K10,000.00 SHOPPING VOUCHER
- BOROKO MOTORS HONDA GENERATA SET
- PNG RAAG - MIKS KOLOS BEIL VALU K1,000.00
- COURTS - 21 FT BANANA BOAT + JOHNSON 40HP MOTA
- COURTS - NISSAN URVAN BUS

**ENZER ETV29-148N** 29" Kala TV #103794  
• NTSC pilai bek  
• igat 255 chanol memori  
Bipo Kes K799 - Dinau Prais K799

**ENZER ETV29-148N** 29" Kala TV #103794  
• NTSC pilai bek  
• igat 255 chanol memori  
Bipo Kes K1,299 - Dinau Prais K1,375

**ATA DVD5148** DVD Plea #114851  
• pilaim DVD, DVD-R, DVD-RW, VCD, SVCD, CD, MP3-CD, CD-R, CD-RW  
Bipo Kes K389 - Dinau Prais K399

**ENZER GA1408BB #224784** CD Redio Kaset Rekoda  
• CD/RW - 2-wei spika  
• 4-spika wantaim stronpela pawa  
Bipo Kes K225 - Dinau Prais K195

**ENZER GA1418 #224787** CD Redio Kaset Rekoda  
• CD/RW - 2-wei spika - blu-pela pawa lait - 4-spika wantaim stronpela pawa  
Bipo Kes K295 - Dinau Prais K255

**COURTS**

*Adding value EVERY day!*

**SWITCH ON TO**

**POWERHOUSE**

STIMULATE YOUR SENSES

\*Ol prais bilong mipela iken senis eni taim, baim nogat toksave, dispela kago stap long dispela edvetismen em ibin stap long taim bilong mekim kamap dispela edvetismen. Luksave olsem sampela taim dispela kago bai ino inap stap long olgeta stoa bilong mipela. Pliis go na askim long Courts stoa klostu long yu.



Salim pas i kam long  
WANTOK  
Niuspepa  
P.O. Box 1982,  
Boroko, PNG

## Gavman i no daunim pasin pamuk

**Dia Edita**

Mi bilong Maunt Tawa insait long Erave distrik long Sauten Hailens provins tasol nau mi go stap long Pot Mosbi siti.

Olsem na nau mi laik autim belhevi bilong mi i go long Wantok Niuspepa na ol pablik i ken lukim.

Mi laik bai gavman mas lukluk i go insait long hevi bilong sik AIDS long dispela kantri bikos planti hap long siti i gat planti disko haus klab na planti ol pamuk haus i pulap tru.

Na ol pamuk manmeri i save go long dispela kain haus na mekim dispela pasin long kisim mani na sapotim ol yet long baim kaikai na ol samting bilong lukautim laip bilong ol.

Olsem na sik AIDS em i go bikpela tru long Papua Niugini.

Sapos gavman i no kukim ol dispela kain haus na bagarapim bai i nogat populesen long bihain taim na dispela kantri bai pundaun.

Mi laik bai ol manmeri husat i gat mani long en tasol ol i ken i go long ol bikpela hotel na slip wantaim meri na dring bia long laik bilong ol.

Bilong wanem na mi

tok olsem? PNG em kristen kantri na olgeta hap long wol ol save pinis tasol yumi yet lukim em i no gutpela tumas bikos olgeta taim ol man nogut save kilim manmeri bagarapim meri, mekim pasin pamuk na ol sampela pasin nogut moa stap yet olsem na nau long dispela taim yumi noken tok PNG em kristen kantri.

Nogat sem long yumi long kolim dispela.

Narapela samting mi laik tok klia long ol pablik olsem gavman i no laik long rausim dispela kain disko haus na ol wok long kisim takis yet long kain disko bisnis we i save kirapim pasin pamuk na dispela mani ol yusim long ronim kantri.

Sori tru tumas mi tokim yupela stret kantri bilong yumi bai i no inap ron gut.

Em tasol long wari bilong mi na yu husat brata o susa laik sapotim o egensim yu welkam tasol.

**STANLEY KEWA  
POT MOSBI  
NCD**

## Pamuk pasin i kamap bikpela long kantri

**Dia Edita**

Mi wanpela mangi Morobe nau mi i stap long Lae ples bilong mi yet.

Mi pestaim stret long mi raitim dispela pas i go long Wantok Niuspepa long kantri bilong yumi PNG.

Pasin pamuk i kamap bikpela long PNG manmeri yupela harim gut kantri bilong yumi bagarap long pasin pamuk, kilim man i dai, holim ol man wantaim samting bilong pait, bagarapim meri, hambak pasin kamap bikpela long kantri PNG.

Dispela kain pasin i gat spia bilong en i stap. Dispela spia em dai tasol. Tasol Buk Baibel tok long Rom 3:26 em tok olsem "pe bilong sin em dai tasol". Na tu pasin pamuk em bikpela pinis.

Yumi save harim long redio na lukim long niuspepa. Dokta Malau save tok slip wantaim wanpela manmeri tasol.

I no ken kalap kalap olsem bataflai sindaun antap long flaua na bihain i go long narapela flaua. Husat manmeri save

kamap olsem bataflai kalap kalap i go kam em i gat spia bilong en i stap we dispela spia em ol kolim AIDS.

Dispela AIDS em pe bilong pasin pamuk. Yu wokim pasin pamuk spia nogut AIDS i stap pinis long kilim lam bilong yu i dai. Em tasol husat man o meri sapotim dispela pas welkam tasol na mi lukim.

**GAREX NAUM  
LAE  
MOROBE PROVINS**



**Em scout salut o?... Ol pikinini scout i amamas tru na subim pinga bilong ol. Scout ona em yu mas putim yupela pinga bilong yu long bros o yu mas salut. Dispela em narapela kain salut o?**

## PNG Tisas Sevings na Lons Sosaiti i no wok gut

**Dia Edita**

Ol tisa bilong PNG i no amamas na wanbel tru long ol Bod ov Dairektas i kisim ol narapela pablik sevans i kam long joinim dispela sosaiti ol i kolim TSSL (Tisas Sevings na Lons Sosaiti).

Olsem wanpela ol tisa i no kontribut inap na ol Bod i larim ol narapela seksen bilong wok i kam na joinim. Bihain taim nogut ol i stap we?

Nau taim TSSL i wokim moa profit o win mani ol i seksek na guria long join.

Mi wanpela tisa yet na mi i no pilim gut

long dispela rot.

Long wankain taim ol menesmen long TSSL i taitim tru planti ol samting we i no gutpela. Bilong wanem na ol tisas i peim (1) K5 long stetmen, (2) peim K25 long sek lon fi, (3) K50 long kenselim sek na peim K20 gen long rausim olgeta?

Plis em i no mani bilong yupela ol Bod ov Dairektas. Sem bilong yupela. Plis ol tisa inap yumi lusim o nogat?

**MATT DEDEBOH  
HOLEYAH  
BANZ  
ISTEN HAIENS**

## Pasin bilong salim bodi long mani i bikpela long Pot Mosbi

**Dia Edita**

Mi laik tokaut long Wantok Niuspepa olsem Pot Mosbi nau i wok long tenis hariap tru long kain stail bilong wokim mani.

Nau ol papamama o brata susa i wok long salim ol liklik susa long kisim mani long ol bisnisman long Pot Mosbi.

Plantim taim mi witnessim stret long tupela ai bilong mi long baksait long Boroko Pos Ofis we sampela manmeri i wok long stopim ol dak glas kar na salim ol yangpela meri long kalap.

Nau dispela kain pasin em i as bilong dispela sik ol kolim HIV/AIDS.

Mi no save bilong

wanem tru na ol polis i no wokim wanpela samting long traim stopim dispela kain pasin.

Dispela pasin i wok long kamap klostu tru long Boroko Polis Stesin na yet nogat wanpela polis o meri i traim stopim.

Ol planti pablik manmeri i witnessim tasol ol tu i no bisi. Mi tu mi no bisi tumas tasol nau mi wok long lukim planti manmeri i wok long kisim dispela sik nogut na bel bilong mi i hevi liklik.

Olsem na plis mi laikim bai ol niuspepa na EMTV long go hait long hap na kisim piksa bilong dispela kain pasin.

Bihain putim aut long

pablik na bai yumi ken luksave long ol.

Mi ken luksave olsem ol meri ya planti bilong ol meri Papua na Kerema. Na ol man bilong pikap em ol traipela traipela lapun Hailens man husat ol i gat pikinini na bubu tu.

Na bai yumi tok wanem, ol i gat mani na ol dispela yangpela ya i dai long mani tasol.

Em tasol na sapos wanpela brata o susa i laik sapot o agensim, mi tok welkam tasol long Wantok Niuspepa, niuspepa bilong yumi stret.

**MAKET BOI  
BOROKO  
NCD**

## Olgeta Kabwum lusim ples na pulap long Lae siti

**Dia Edita**

Mi wanpela boi Yalumet long Deyamoi LLG eria long Kabwum Morobe provins. Mi lukim olgeta manmeri pikinini i wok long lusim ples. Na planti pulap long Wasu Bris.

Na planti go olsem long Nabak rot. Na kam kamap long Lae nogat kaikai nogat haus, i kam long Lae painim bikpela hevi gen na ol Kabwum manmeri bai go wea nau? Dispela em i bikpela askim.

Sapos yu wanpela man o meri yu laik agensim dispela pas yu stadi gut bipo yu bekim pas na agensim. Na kam kamap long Wasu nogat sip na painim hevi nogat kaikai na ples bilong slip olsem pikinini nogat papa. Nau mi askim tupela mama na papa.

Dispela Kabwum ples em wanpela naispela ples na pulap long kainkain kumu kaikai. Na Kabwum i no sot long wanpela samting, olgeta samting em i gat.

Na bilong wanem Kabwum i wok long lusim ples? Lukim Kabwum i gat moa kofi, vanilla, kumu, kaikai i pulap tru, Kabwum i no sot. Nau yet lusim ples em i gat as.

Nogat gutpela maket bilong kofi, kaikai, kumu, skul fi wok long go antap, pei bilong tinpis, rais, sol, driping, sop go antap dispela em i wanem kain tru ya!

Apim pei na i no stretim rot bilong maket bilong maketim ol samting go long kain kain maket. Ol lida bilong Kabwum na Morobe ai pas tru. Traim na opim ai liklik, ating 4-pela kaunsol presiden Yus LLG, Deyamoi LLG, Selepet LLG, Komba LLG presiden i go lukim Lae siti na lusim tingting long pasindia bilong yupela. Man yupela yet pulap na amamas i kilim yupela gut tru na kaikai gut na yupela kisim win na ol manmeri pulap long sotwin tasol na kaikai nogat.

**BEKOCNE HAPETAC  
KABWUM  
MOROBE PROVINS**

## Plantim pasin pamuk i wok long kamap long Wewak

**Dia Edita**

Mi laik raitim dispela pas i go long Wantok Niuspepana toktok long planti ol pasin pamuk i wok long kamap long ol yangpela skul meri na meri husat krismas bilong ol i aninit olsem 14, 15, 16 na 17 ya long Wewak taun.

Dispela pasin i kamap bikos planti ol bisnisman na ol sinia pablik sevans i laik paulim ol skul meri long mani, kar, ol bilas na rum long hotel.

Ol dispela meri i paol bikos planti meri i bagarapim laip bilong ol na ol i go wantaim dispela ol bik bos na salim ol skin bilong ol long mekim ol pasin pamuk.

Long Wewak taun ol dispela kain pasin long ol hotel i bagarapim gut nem bilong Sepik na mekim ol ovasis turis i les long kam lukim Is Sepik provins.

Mi pilim sem tru long lukim ol pablik seven i mekim nabaut long gavman mani, kar na taim long paolim ol skul meri long wokim ol pasin pamuk na dispela i mas stop nau.

Long tingting bilong mi Provinsel Edministreta mas rausim dispela kain gavman ofisa na kisim nupela hariap tasol. Mi no amamas long dispela doti na sting pasin bilong sin i wok long bagarapim Wewak taun na ol lida mas toktok nau long stopim.

**JOHN KRISAKI  
WEWAK  
IS SEPIK PROVINS**

**Toksave:** Sampela ol pas mipela i kisim i longpela tumas na i no givim spes long ol arapela pas. Inap yupela i sotim pas bilong yupela nogut edita katim pas long inapim spes. -Edita

# WANTOK KOMENTRI

## Lo bilong rausim bebi i orait o?

Toktok bilong kamapim lo bilong ol meri i ken rausim liklik bebi tru taim em i wara yet long bel em ol lida i tokaut long palamen long dispela wik.

Dispela em wanpela samting we planti pipel i no inap tok yesa long em hariap bikos yumi i pulap pinis long toktok bilong Kristen pasin na kastom pasin bilong yumi tu i tambu long dispela pasin. Yumi bilip olsem em pasin bilong kilim man na em bikpela sin.

Tasol Gavana bilong Morobe i tok lo i mas kamap long oraitim ol meri i ken rausim ol wara wara bebi yet long laik bilong ol. Dispela em i sut long ol man na meri i nogat tingting long kamapim bebi tasol bebi i kamap nating na meri i ken mekim dispela. Napela toktok tu em planti pikinini i kamap nating nating we ol i nogat gutpela sapot long go long skul na kisim arapela gutpela helpim. Narapela toktok Gavana i tok sios i no sapotim kondom olsem ol pikinini i kamap nating na kamapim moa namba we gavman i no redi long sapotim ol.

Dispela pasin bilong ol meri i rausim ol wara wara bebi yet i gat lo i oraitim long ol arapela kantri tasol i no long PNG. Bikpela samting bai i gat bikpela toktok i kamap long dispela. Sios, ol pipel, famili, ol save-manmeri na ol yangpela tu bai kamapim olgeta kainkain tingting bilong ol long dispela samting. Bikpela samting em yumi save olsem sapos wanpela man na meri i slip wantaim bai tupela inap kamapim bebi. Olsem na hevi i nogat bilong dispela pasin em man na meri i save pinis pastaim long tupela i holim pas. Olsem na bikpela wok bilong tok stia na tok skul i mas sanap long dispela poin taim tupela i laik kam bung long en.

Long toktok bilong meri i ken rausim wara wara bebi long bel bilong em sapos em i laik, em bikpela toktok. Tasol wanpela samting em yumi mas save olsem meri yet em bos long bodi bilong em. Wanem samting i stap long het, tingting, bel, blut na bodi bilong em, em samting bilong meri yet. Nogat man i bosim blut, mit na bun bilong em. Wanem samting em i kaikai i go insait long bodi bilong em em samting bilong em. Sapos em laik trautim wanpela kaikai we i pait long bel bilong em, nogat man i save stopim dispela laik bilong meri. Olsem na taim yumi laik skelim dispela toktok bilong rausim bebi long bel, yumi mas skelim tu long dispela poin.

### Gutpela nius bilong kopi prais

GUTPELA nius long lukim prais bilong kopi i go antap long kantri. Dispela em wanpela bun tru bilong ol pipel bilong Papua Niugini. Planti em long hailans na long Morobe, Popondeta, Sentrel na sampela long Sepik.

Nau em hatpela taim stret long ol pipel bikos prais bilong planti samting i go antap tru na ol pipel i traim long baim ol samting ol i laikim long helpim laip na sindaun bilong ol na famili bilong ol.

Planti papamama i sot yet long skul fi olsem na dispela gutpela nius i kam olsem presen bilong helpim ol pipel i stap long hevi.

Plis ol manmeri i mas yusim gut dispela presen long gutpela rot bilong helpim laip na sindaun bilong ol long famili na komyniti.

Bikpela toktok em, sevim gut mani bilong baim ol samting bilong lukautim famili bilong yu o i laik mekim liklik wok bisnis na bikpela tru em sapos pikinini i skul, orait stretim gut skul fi bilong em taim dispela gutpela sans i kamap.

Mipela i mas senisim pasin bilong mipela we taim yumi lukim mani long han, yumi stat driman long ol naispela samting bilong bilasim skin tasol na soim skin tasol long ai bilong arapela manmeri olsem yumi smalpela lain wantaim mani long poket. Lusim dispela kain pasin na mekim samting we i stret we ol man wantaim het na tingting i save mekim.

Kopi i no save redi olgeta taim long sevim laip na sindaun bilong yu. Kopi i save kam long wanwan taim tasol na olsem yu sevim gut kaikai bilong kopi bikos narapela mun bihain bai yu sot.

Wok bilong kopi tu i no liklik o isipela wok. Em i hatpela wok tru ya. Klinim as bilong gaden, katim han nogut, pikim na karim long bek i go long masin na rausim skin, wasim na draim gut inap em i drai gut long mak bilong salim. Bikpela hatwok bilong em. Olsem na sapos yu yusim gut dispela hatwok bilong yu rot bilong sanapim memori bilong dispela hatwok, oltaim bai yu sindaun wantaim amamas na famili tu bai sindaun wantaim amamas na olgeta pipel bilong ples na komyniti tu bai gat rispek long yu long pasin na save bilong yu.



JADA 3/03/05

## Inap yu yusim K50 olsem pepa nating?

Wanpela samting i kamap bikpela long yumi nau em mani. Sapos yu gat mani bai yu gat kaikai na kolos long haus. Sapos yu gat mani bai yu kalap long PMV kar o kisim balus i go long ples yu laik go long en. Sapos yu nogat mani, sori o, em bai hat liklik.

Planti bilong yumi long Papua Niugini, mani em wanpela nupela samting long laip bilong yumi.

Taim mama i karim yumi, em i no karim yumi wantaim mani. Mani bilong yumi, Kina na Toea i no hap bilong kalsa bilong yumi. Tasol taim i senis na long dispela nupela kalsa bilong graun, mani i ronim laip bilong yumi.

Mi yet, mi bikpela long ples. Long ples na famili mi kam long en, mani i no laip bilong mipela. Taim mipela i laikim kaikai, gaden i stap. Taim mipela i laikim kolos, malo na purpur i stap. Taim mipela i laikim abus, pik i stap long kilim o painim ol kapul long bikbus.



**TOK PISIN**  
wantaim  
**PETER MAIME**

Nau mi wok na stap long Pot Mosbi. Sapos mi laikim rais o tin pis mi mas gat mani. Sapos mi laikim lemflaps o kwikkai kakaruk long plastik, mi mas gat mani. Sapos mi nogat mani, mi wantaim famili bilong mi bai i dai. Mi i no inap tanim ol waitpela karanas ston arere long siti olsem rais o bret.

Mani pawa i kisim planti manmeri. Mani i holim pawa bilong ol manmeri long ples, long taun, ol wok manmeri, ol bisnis manmeri na ol politisen.

Fifti Kina (K50) note bilong yumi em wanpela hap pepa. Yumi ken yusim olsem pepa nating. Tasol mipela i no inap long yusim olsem toilet pepa bikos dispela hap pepa, yu ken yusim long baim sampela

gutpela samting yu gat laik long en. Dispela hap pepa i gat veliu (pawa) bilong em.

Nau yumi mas gat inap mani long stap long taun o siti. Yumi mas i gat mani long salim ol pikinini i go long skul.

Na tu yumi mas i gat mani long wokim wanpela gutpela haus long stap. Mani i kamap ansa bilong planti wari na hevi bilong ol manmeri.

Toktok long bikpela buk i tok olsem, taim Bikpela i wokim man na meri, em putim ol insait long gaden. Tasol nau i luk olsem dispela taim, dispela graun i putim yumi insait long mani.

Yumi mas painim sampela rot long painim sampela as o gutpela minin long laip bilong yumi engensim dispela pawa bilong mani.

Mi nogat isi ansa. Yu gat wanem kain tingting long pawa bilong mani na long wok bilong en.

## Kristen manmeri mas kamap lida



**Ol prinsipol bilong gutpela lida wantaim Pastor na Evangelist OLUWALE TABORI**

Wok bilong lukautim manmeri em wok bilong God olsem na yupela Lida manmeri i mas tingting gut pastaim. Bihain mekim wok bilong manmeri insait long kantri bilong yumi. Wanpela bikpela wok bilong ol Lida bilong sios i bilong strongim ol arapela kristen bai bodi bilong Krai i ken mekim wok bilong God i go stret.

Olsem na kristen Lida i no ken ting long mekim wok tasol. Nogat, em i mas ting long mekim gutpela wok bai ol arapela kristen i ken kamap strongpela na wok wantaim. Lida bai i wok long kirapim kristen long mekim gutpela wok wantaim presen bilong Holi Spirit (Ef 4:11-13). Banabas i win tru long dispela pasin long kirapim ol arapela kristen long mekim wok (Ap 9:26-29, 11:22-26). Pasin bilong lida long mekim wok bilong helpim ol arapela man

em i bikpela tok long buk Baibel. Dispela pasin em i bihainim pasin bilong Jisas Krai. Jisas Krai em i God tru, tasol em i no tingting long holimpas dispela pasin bilong i stap wankain olsem God. Nogat, em i lusim dispela pasin na i kamap man na i kisim pasin olsem wokboi nating. Ol man i lukim em i stap man tru. Em i daunim em yet na i bihainim tok bilong God inap long i dai long diwai kros (Fl 2:6-8).

Jisas Krai i kamap olsem wokboi tru bilong soim yuki pasin bilong kristen Lida. (Jon 13:1-17) i soim yumi olsem: Jisas Krai yet em i wanpela gutpela Lida na yumi olgeta i ken luksave long em na bihainim em. Em i Lida bilong olgeta lida. Em yet i tok wanem? Long Buk Baibel i gat tok bilong em i go long ol lain Lida husat i bin wok wantaim em long taim em stap long graun. Yumi save kolim ol lain disaipel bilong em (Jon 13:15) i tok "mi soim pasin long yupela, na yupela tu i mas mekim wankain pasin olsem nau mi

mekim long yupela..." Dispela em i bikpela tok bilong nambawan Lida tru bilong yumi. Pasin em soim yumi em yumi mas bihainim pasin bilong em na bai yumi tu i ken soim wankain pasin long ol arapela long bihainim yumi. Narapela bikman na wanpela papa bilong yumi long bilip - Aposel Pol. Aposel Pol i mekim strongpela tok long ol manmeri husat laik stap lida tru.

Em yet em i wanpela Lida tru long wok bilong Jisas Krai (misin) na planti we na stail bilong em long wok i stap pinis long Baibel we yumi ken ritim na bihainim. Long 1 Korin 11:1 em i tok: "yupela mas bihainim pasin bilong Krai na wokabaut." Nau husat namel long yumi ol lida bilong Papua Niugini inap o fit long tokim ol arapela manmeri long bihainim pasin bilong yumi.

Mi ting em i wanpela bikpela tok tru long yumi ol Lida man na meri long wanem Lida em i man o meri i go pas na ol arapela manmeri bai bihain-

im em. Papua Niugini em i kristen kantri olsem na kristen manmeri i mas kamap lida bilong kantri. (Ol prinsipol bilong gut-

pela lida long *Wantok Komentri* i laik tokim yumi olsem gutpela tingting na save em i kam long God wanpela tasol).

# WANTOK

Published Weekly, Wednesday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: 325 2500  
Fax: 325 2579  
Email: [word@global.net.pg](mailto:word@global.net.pg)  
Pe bilong wanpela yia  
52 niuspepa

<b>Ples:</b>	<b>Air:</b>
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager  
Justin Hansu Kili  
  
Editor  
Yakam Kelo

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea- Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Maisan Pahun i raitim stori long sin-daun bilong graun nau i no gut tumas...

# Ples graun i senis narakain

## Maisan Pahun i raitim

YUPELA sampela bilong ol nambis ples bai lukim olsem solwara i solap kam abrusim bipo mak bilong em. Na tu antap long sampela hailans ples bai yupela i lukim olsem san i save hot nogut tru na i no olsem bipo.

Dispela pret bilong sunami we i bin kamap long Pot Mosbi long sampela wik i go pinis na tu bikpela ren long sampela hap long kantri i soim olsem ples graun i wok long senis. Dispela em ol sain bilong 'Global Warming' we hot bilong ples graun i moa yet ino olsem bipo. Na tu 'Greenhouse Effect' we planti kantri long Saut Amerika na ol tropiks kantri olsem PNG i katim diwai na bus bilong ol long we i save kamapim gutpela win i go long ol samtin bilong ples graun. Olsem na yumi mas klia long wanem em ol dispela samting na kisim was na stap.

Dispela kain samting i kamap bikos insait long wol tudei planti bikpela kantri olsem United States ov America (USA) na ol yuropian kantri i save kukim kainkain smok nogut long ol faktori bilong ol. Dispela ol smok i save go antap long skai na bagarapim blanket we i save karamapim ples graun ol i kolim 'Ozone Layer'. Sampela i pundaun olsem ren ol saintis i save kolim 'Acid Rain'.

Klostu long 144 kantri insait long wol i kam aninit long wanpela wol envaronmen lo ol i kolim 'Kyoto Protocol' long Trinde namba 16 dei long mun Februari 2005. Dispela lo em ol kantri i mas katim sais bilong ol smok nogut we i save kamapim global warming. Ol dispela smok nogut em greenhouse ges na 'carbon dioxide'. Long paitim bek global warming

na greenhouse ges em ol kantri i mas planim bek ol diwai na bus ol i save katim na tu isi long kukim ol ges nogut i go anatp long skai.

## Kemikol we i bagarapim Ozone layer

Long yia 1928 sampela saintis i kamapim wanpela kemikol na ol i bilip olsem dispela kemikol i gutpela long yusim. Dispela kemikol em yumi save yusim insait long ol spre, friza o bokis ais, na ol samting olsem air kondisen blong haus na kar.

Nem bilong kemikol em Chlorofluorocarbons - ol i save kolim tu olsem CFC's. Dispela kemikol em taim yu laikim wanpela kol dring long bokis ais em dispela kemikol i save mekim em kol. Ol dispela kemikol i no gutpela long zone layer olsem ol i stap aninit long wanpela grup ol i save kolim 'ozone depleting substances' (ODS).

Bikos long yia 1974 ol envaronmen saintis i painimaut olsem dispela kemikol i nogut na bai i bagarapim ples graun. Saintis i painim olsem CFC's wok long wokim hul antap long skai (depleting protective ozone layer) na ol laif i stap long ples graun i wok long kisim bagarap long strong-

**"Ol kantri i mas katim sais bilong ol smok nogut we i save kamapim global warming. Ol dispela smok nogut em greenhouse ges na 'carbon dioxide'".**


pela lait bilong san (harmful ultraviolet radiation). Long tok inglis bai yumi tok UV-B radiation from the sun.

Ai bilong ol bikman na saveman bilong ples graun i op na ol i sainim wanpela wanbel long Vienna, Switzerland long ol develop kantri mas isi long yusim CFC na ol narapela kemikol we i ken bagarapim 'ozone hole.' Ol i bin kolim dispela wanbel Vienna Konvensen.

Tupela yia bihain long 1987 'Montrea Protocol on Substances that Deplete the Ozone layer' i bin kamap long Montreal siti long Canada. Dispela miting em ol kantri i bin bung na wokim wanpela lo long kontrolim ol smok na ges nogut we bai bagarapim blanket raunim ples graun. Moa long 180 kantri i sainim dispela wanbel we ol i tok bai wanwan kantri i mas lainim nau long daunim long yusim ODS kemikol. Hap bilong dispela wanbel em ol i putim US\$1.6 bilien long helpim ol develop-ing kantri daunim dispela hevi tu.

## Wok daunim ODS insait long PNG

Papua Niugini i no bikpela kantri olsem USA, o ol yuropian kantri nambaut we i save yusim planti ODS na greenhouse ges long bagarapim envaronmen. Insait long ol dispela intanesenol lo PNG i stap olsem wanpela memba stet bilong dispela Kyoto protocol na ol narapela intanesenol konvensen. Olsem na em i mas bihainim sampela lo we i stap insait long ol dispela intanesenol konvensen na wanbel.



• 'Bihain long yia 2000' .....piksa i soim sem maunten Toboggan tasol ais i melt pinis na ol diwai i gro. Dispela em soim klia sain bilong 'Global Warming'. (POTO. US Geological Survey)

Ol lida na saveman bilong envaronmen bilong wol i kamapim dispela tingting bilong lukautim envaronmen long wanpela konvensen long Argentina long yia 1992. Dispela Rio Convention 1992 i

long kantri kisim trening long senisim ol ges nogut bilong kar na putim gutpela ges i go insait. Dispela em wanpela wok bilong Ozone Unit insait long dipatmen ov Environment na Conservation wantaim German Association of Technical Cooperation (GTZ).

Dispela Ozone unit tu em German Development service (GDS) i sapotim aninit long dispela bikpela tingting bilong lukautim ol bus, diwai na wara bilong wol long nau na bihain taim tu. Na noken yusim ol samting (kemikol) we bai i bagarapim ples graun.

## Ol samting em yu mas save long em;

- Montreal Protocol - Intanesenol wanbel we bai kontrolim na putim mak bilong ol Ozone depleting samting olsem CFC ges.
- Kyoto Protocol - Intanesenol wanbel we i laikim ol kantri long katim namba bilong ol smok na greenhouse ges i go daun long 5.2% bifo long yia 2012.
- Ozone layer - Dispela em wanpela kain blanket we i karamapim ples graun (earth) na was long strong bilong sun i no inap long abrusim na kam kukim ol samting long graun. Sapos spes i kamap long dispela blanket bai ples garun i bagarap na ol man i dai.
- Green house gas - Em ol smok o ges i save kamap taim kukim ol petrol, disol na ol narapela fuel nambaut.
- Global Warming - Em ol senis we i kamap long temperature bilong ples graun, ol saintis i tok bikos planti manmeri i kukim greenhouse ges i go long spes na dispela i bagarapim hot na kol bilong olgeta samting.
- Multilateral Fund - Em ol mani aninit long ol ovasis wanbel na protocol ol i putim bilong ol developin kantri i yusim long katim daun hevi bilong bagarapim ples graun.

'Nuklia pawa' ... Piksa i soim wanpela nuklia pawa plent long Switzerland. I gat planti kain pawa plent we i save kukim ol nogut smok kamapim pawa insait long US na ol Yurope kantri. (POTO. bigfoot)







RADIO TOK PISIN PROGRAM TUNE IN: 101.9 FM

RADIO AUSTRALIA PACIFIC BEAT PROGRAM

• SOLOMON IS: Polis arestim ol stilman I laik brukim musium Man husat i stilim Mona Lisa long 1911 i bin hait insait long musium long nait na rausim handel bilong dua long ronawe. Na ol stil man husat i kisim Saliera bilong Cellini long 2003 i bin brukim tasol haus na stilim na ronawe antap long ol hap palang. Tasol ol stil man husat i bin rausim olgeta samting insait long Solomon Ailans Musium i no bin gat dispela kain ol hevi. Long Pacific Beat program ol i toktok wantaim bosman bilong musium na polis long dispela bikpela stil pasin i kamap.

• COOK IS: Klin ap wok bihain long Saikion Percy i go het Ol pipel bilong Cook Ailans na Tokelau i wok long mekim bikpela wok klinap na kandim ol samting i bagarap taim bikpela raun win Percy i go raun long ol allan. Planti haus na gaden kaikai i bin bagarap na nau wok i go het long givim ol saplai i go long ol lain i kisim bagarap.

• TONGA: Singaut bilong wanpela mamba bilong palamen long Australia long bihainim New Zealand i kirapim bikpela tok kros Ol politisen long New Zealand i wok long tok welkam long ol singaut bilong wanpela mamba bilong palamen bilong Australia husat i singaut long bikpela politiks senis i mnas kamap long Tonga. Bob Sercombe, mausman bilong Australia Labour Pati i tok gavman bilong Australia i mas bihainim Wellington na toktok strong long Tonga i mas kamapim moa wok senis. Planti manmeri husat i laikim demokrasi i wok long singaut long senisim politikel sistem bilong kantri. Nau yet olgeta wok politiks i stap aninit long lukaut bilong King bilong Tonga.

• SOLOMON IS: Polis holim tupela moa man long stilim mani. Long Solomon Ailans, tupela moa biknem man i bin kisim mekimsave long polis long paulim 5 milien Solomon Allan Dola. Tupela man polis i holim em bipo Malaita Eagle Force lida Jeremy Rua na Sinia Royal Solomon Ailans Polis opisa Leslie Ofu, husat i bin wanpela mamba bilong MEF. Tupela man i sanap long kot long Honiara long ol sas i karamapim stilim mani. Dispela 5 milien dola ol i bin makim olsem kompensesen peimen we dispela tupela man i bin yusim long strongim Malaita Eagle Fos insait long dispela 4-yia pait. Long stat long dispela wik, tupela bipo lida bilong MEF, Andrew Nori na Leslie Kwaiga i bin sanap long kot long Honiara long ol wankain sas.

HARIM NUIS LONG AUSTRALIA TOK PISIN SEVIS...

Prince Charles i lukluk raun long Australia

PRINS BILONG Wales i statim namba wan bikpela lukluk raun bilong en i go long Australia long dispela wik bihain long em i bin i go kamap long Perth, wanpela siti bihain long em i bin i go kamap long Perth aste nait. Karen McPherson i ripot olsem balus bilong Prince Charles i bin i go pundaun long Perth Intanesenel Ples balus long ai bilong planti ol nius manmeri. Taim em i go pudaun em i bin sikhwan wantaim sampela ol biknem manmeri na lida long hap olsem Gavana bilong Westen Australia, Lieutenant General John Sanderson pastaim long ol i kisim em i go long Government House insait long siti. Namba wan hap Prince i bin go long en em long burns unit long Royal Perth Haus Sik, em wok ples bilong Australian of the Year, Fiona Wood na tritmen senta bilong planti ol turangu i kisim bagarap long ol bom i bin pairap long Bali long Indonesia. Prince i bin lusim Perth na i go long Alice Springs.



Ol lapun long Pasifik askim Britain long nukliakompensesen

MINISTRI bilong difens long Britain i bin tokaut klia olsem ol lapun soldia i bin tok kros long nuklia testing long Pasifik na putim wanpela askim long kisim kompensaisen long en. Sampela ol lapun soldia bilong New Zealand, Fiji na Britain yet i bin lukim nuklia-bom test i bin kamap long Kiribati na Malden ailan long Kiribati yet long 1957 i go inap long 1958. Wanpela mausman bilong Difens Ministri bilong Britain i bin tok dispela em samting ol bai mekim nau long bihainim dispela askim bilong ol lapun. Em i bin tok tu olsem i no bin gat ol samting long tok klia long ol kain sik i bin kamap long ol dispela grup bilong ol lapun soldia, em ol i tok dispela ol nuklia bom test i bin kamapim, o sampela kain poisin bilong ol pipia bilong nuklia bom i bin givim ol kain sik ol i wok long i gat nau.

WOL NUIS

Amerika sutim tok long China na Russia long bagarapim ol manmeri

AMERIKA i sutim tok long China na Russia long bagarapim ol manmeri na i sutim tok long wanpela bigpela poroman kantri bilong tupela, Saudi Arabia long brukim lo bilong lukautim ol manmeri o long tok Inglis ol i kolim human raits lo.

Insait long enuel ripot bilong en long human raits raun long olgeta hap bilong world, Stet Dipatmen bilong Amerika i tok - Saudi Arabia or Riyadh i bin stat mekim sampela senis insait long demokratik sistem bilong em, tasol long sait bilong lukautim ol rait bilong ol manmeri i kam inap nau em i go bagrap nogut olgeta.

Despela ripot i tok human raits rekod bilong China i bin nogut tru taim em i bin wok long i go het long kalabusim ol lain manmeri bilong em yet husat i traim long toktok or mekim ol samting agensim gavman.

Em sutim tok long Russia long strongpela lo bilong en insait long Kremlin, ol strongpela lo bilong kontrolim media na pasin politiks i go insait long lo sistem bilong ol.

Car bom kilim planti pipol long Iraq

WANPELA traipela bom i bin pairap insait long wanpela taun long Sauten hap bilong bikpela siti bilong Irak, Baghdad na i kilim indai 110 manmeri na givim bagarap long planti handet arapela manmeri.

Ol i tok dispela i wanpela bikpela bagarap tru em wanpela suasait boma o man i



pairapim bom long kilim em yet tu i bin kamapim stat long taim edministresen bilong Saddam Hussein i bin pudaun tupela yia i go pinis.

Niusman insait long Midel Is Matt Brown i ripot olsem - wanpela ka bom i bin pairap long hap pas 9 kilok long morning long hap insait long wanpela ples we planti manmeri i save mekim wok bisnis insait long wanpela distrik taun bilong Hilla, long saut sait bilong Baghdad.

Dispela suasait boma i bin makim stret long wanpela hap we planti manmeri i bin bung bai ol dokta i sekim ol pastaim long ol i kisim wok wantaim gavman bilong Irak.

Ol dispela lain i dai long dispela birua na ol lain husat i bin kisim bagarap long en i bin pulap tru long wanpela lokol haus sik long hap.

Sikispela (6) arapela manmeri wantaim sampela soldia bilong Amerika na Irak na sampela manmeri nating i bin indai insait long wanpela pait long Baghdad na long noten sait bilong Irak.

MANDE Morning 6AM Stesen Op - Nius na Karen Afeas 6.30AM Ol Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Spots Musik na Karen Afeas 8PM Hetaim Musik 8.15PM NUIS Musik/Spots 8.30PM NUIS Spots Riplei 8.40PM Musik 8.55PM Musik Stesen Pas 9PM

TUNDE Morning 6AM Stesen Op - Nius na Karen Afeas 6.30AM Nius Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Musik na Chat-Chat Nius na Karen Afeas 8PM Mama Graun Musik/Spots 8.15PM NUIS Musik/Spots 8.30PM NUIS Hetaim Riplei 8.40PM Musik 8.55PM Musik Stesen Pas 9PM

TRINDE Morning 6AM Stesen Op - Nius na Karen Afeas 6.30AM Ol Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Musik na Chat-Chat Nius na Karen Afeas 8PM Focus Musik/Spots 8.15PM NUIS Musik/Spots 8.30PM NUIS Mama Graun Riplei 8.40PM Musik 8.55PM Musik Stesen Pas 9PM

FONDE Morning 6AM Stesen Op - Nius na Karen Afeas 6.30AM Ol Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Musik na Chat-Chat Nius na Karen Afeas 8PM Youth Musik/Spots 8.15PM NUIS Musik/Spots 8.30PM NUIS Focus Riplei 8.40PM Musik 8.55PM Musik Stesen Pas 9PM

FRAIDE Morning 6AM Stesen Op - Nius na Karen Afeas 6.30AM Ol Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Musik na Chat-Chat Nius na Karen Afeas 8PM Wantok Musik 8.15PM NUIS Musik 8.30PM NUIS Youth Riplei 8.40PM Musik 8.55PM Musik Stesen Pas 9PM

SARERE Morning 6AM Stesen Op - Nius na Karen Afeas 6.30AM Ol Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Musik na Chat-Chat Nius na Karen Afeas 8PM Serah / Famili bilong Serah Musik 8.15PM NUIS Musik na Chat-Chat 8.30PM NUIS Musik 8.40PM Musik na Chat-Chat 8.55PM Musik Stesen Pas 9PM

SANDE Morning 6AM Stesen Op - Nius na Karen Afeas 6.30AM Ol Hetaim - Musik na Chat 6.55AM Hetaim na Musik 7AM Stesen Pas 7PM Nait 7.01PM Stesen Op 7.15PM Ol Hetaim na Program Priviu 7.30PM Musik na Chat-Chat Nius na Karen Afeas 8PM Rivi Musik 8.15PM NUIS Musik na Chat-Chat 8.30PM NUIS Musik 8.40PM Musik na Chat-Chat 8.55PM Musik Stesen Pas 9PM

TOKSAVE, YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK.

Luksave long mipela husat i wok long ABC Radio Australia...



John Papik Provisin bilong John em long West Sepik o Sandaun, we emi skelim boda wantaim Papua Provisin bilong Indonesia. Kenya Kala Kenya i kam long Central Province. Em i wanpela meri mamba tasol bilong Tok Pisin sevis. Paulus Kombo Paulus ikam long Southern Highlands Province bilong Papua New Guinea. Nem bilong en i bigpela long Redio Australia long we em i save presentim "Tubuna Story".

Pearson Vetuna Pearson emi Executive Producer bilong Redio Australia Tok Pisin Service. Pearson ikam long East New Britain Province bilong Papua New Guinea. Pius Bonjui Pius i kam long East Sepik provins, na ino long laim igo pinis i produsim gavanes sinis "Taim Bilong Toktok". Em nau lukautim niupela "Yul Forum". Warium Benson Warium, husat i kam long East New Britain Provisin, i wanpela long ol pipel husat i bin statim PNG sevis bilong Radio Australia long 1974.

Douglas Gabb Doug, husat i bilong Madang Provisin long Papua New Guinea, i save produsim na presentim wanpela program bilong sustenabol developmen oli kolim "Mama Graun". Peter Jonah Peter i kam long Rabaul long East New Britain provins. Em i save wokim program "Wantok Long Australia", we em i save toktok wantaim ol wantok bilong PNG.



ABC RADIO AUSTRALIA TOK PISIN

# Ol mangi nogut bilong Tolai Rok



Cynthia Buckley-Igua (CHM) i raitim

OL i lusim Rabaul na kam kamap long Pot Mosbi pinis. Na nau ol i redi long kirapim das long POM Country Club long Fraide na Sarere nait long dispela wik.

Em ol manki nogut bilong Tolai Rok, Leonard na Uralom Kania na ol manki bilong Junior Kopex ben.

I no Video Hits Live Konset tasol, tasol na ol i kam stap long Mosbi. Nogut. Ol i kam long stretim nupela albam bilong ol wantaim CHM Supersound Studios.

Dispela bai wanpela long ol bikpela konset tru long kamap insait long mun Mas. Yu ken lukim ol feivret atis bilong yu long TV. Tasol lukim ol i singsing laiv antap long stej em i narapela samting olgeta na bai yu pilim olsem graun i seksek na lek bilong yu bai i laik danis nating tru.

CHM Vidio Hits Laiv Konset em Panasonic i kamapim na bai i wanpela samting we bai i kamap long dispela yia. Ol dispela konset i bin stat 4-pela yia i go pinis na nau ol i save pulim planti manmeri tru i go long en.

Patti Potts Doi bai i singsing long dispela konset tu na bai yu ken lukim tru tru Tolai Rok. Maski yu no save laikim tumas singsing bilong Is Nu Briten, kam tasol na harim gutpela musik long ol dispela manki nogut.

I no ol manmeri long Mosbi siti tasol bai i gat sans long lukim ol. Ol lain manmeri long Goroka tu bai i gat sans taim namba tu konset bai i kamap long Goroka long helpim long resim mani bilong 2005 Netball tim i go long Arafura Gems.

Dispela konset long Goroka bai kamap long namba 11 na 12 de bilong mun Mas. Ol atis husat bai kamap long dispela konset em Luke Banag, tupela manki bilong Soul Harmony, Radlee na Baine Lavaiaamat, Straky na CHM Supersound Ben.

Long namba 19 de bilong mun Mas, bai i gat wanpela apinun konset bilong ol pikinini na ol famili na wanpela nait konset bilong ol pati lain long namba 24 de bilong mun Mas.

Dispela konset bai i soim tru kala bilong ol musik atis bilong Morobe we CHM bai soim bikman bilong yumi yet Oshen husat bai kirapim skin wantaim ol nupela singsing long albam bilong em Rising Son.

Nupela PNG regei masta Dadii Gii tu bai kukim ol nupela singsing bilong em long albam bilong em Dayz of Ma Life.

CHM Video Hits Laiv Konset i kamap gen long givim yu sans bilong lukim ol musik atis bilong yumi bai yu ken amamasim PNG musik long stat inap long pinis.

Sapos yu no inap kam lukim ol long mun Mas, bai yu mas wet inap mun Jun long neks yia. Olsem na sapos yu gat sans long kam long Mosbi long dispela wiken. Kam tasol. Bai mipela i bungim yu long hap!

## Loose Ends kamapim nupela albam

Paulus Tali i raitim

WANPELA manki nogut bilong Kerema i brukim banis i go insait long musik industri bilong PNG gen.

Eugene Laupa Miksy bilong Lese Hapa long Malalaua distrik husat i save kolim em yet "Loose Ends" i katim nambawan albam bilong em wantaim Chin H Meen studios long Pot Mosbi we em i kolim "Moraita Lareva" long tokples Kerema yet we i min olsem "Gutpela Pren bilong Mi".

Miksy i tok em i stat pilai na raitim ol singsing bilong em long 1995 yet i kam inap long 2004 we em i go insait long studio na rekod.

Dispela yia tasol long laspela wik bilong mun Jenuari em namba wan albam bilong Loose Ends i kamaut na em i gat bikpela amamas na gutpela tingting long dispela albam.

Planti ol singsing insait long albam bai yu harim long tokples Tuaripi bilong Kerema. Tasol i gat sampela singsing long tok pisin tu.

"Tokples i gat gutpela swit na nek bilong em bilong mekim ol manmeri i tingim bek ples na laip sindaun bilong nau," Miksy i tok.

Sampela ol singsing i gat gutpela sans long i kamap ol hit em taitol singsing Moraita Lareva.

Nau yet Miksy i tok Loose Ends i gat tingting long katim namba tu albam bilong em na me i wok long bungim na raitim sampela nupela singsing na musik i stap.

Planti ol singsing em Miksy yet i raitim tasol em i kisim helpim tu i kam long ol famili na ol poro bilong em olsem tupela brata bilong em Toni Eka na Albert Karahura husat em i givim tenkyu long ol.

Miksy i amamas long helpim bilong tupela na tupela yet tu i tok ol i amamas long givim helpim bilong ol long Miksy long dispela albam bilong em.

"Mipela i amamas tasol bilong wanem dispela em i fes taim bilong wanpela manki long Lese Hapa i kamapim nem bilong ples long sait bilong musik," Eka na Karahure i tok.

Miksy i givim bikpela sore tu i go long papa bilong em Thomas Laupa husat i lusim laip bilong em na tu em i tok amamas long ol wantok long Kerema ples na ol lain Morobosa skwad long trens haiwe, Ua Miri troops na olgeta strit sapota bilong Loose Ends - Mista Andrew Farisa na meri bilong em, Mista na Misis Kose na Mista na Misis Oipi na ol manki long Sabusa kantri sait long seven mail husat ol i gat wanpela singsing i stap insait long albam na tu i go long enjinia bilong em long CHM, George Luff.

SEKIM TV LONG  
DISPELA WIK:

### 7.30PM - FRAIDE NAIT - SURVIVOR PALAU

Ol long long pasin ol wait man i save mekim taim ol i tro-moi ol long wanpela ailan i kamap gen long EMTV. Survivor i kam bek gen long dispela yia. Nau ol i stap insait long Pasifik long Palau. Sapos yu bin laikim tru Survivor las yia, bai yu laikim gen dispela yia.

### 8.30PM - SANDE NAIT MUVI - LORD OF THE RING: FELLOWSHIP OF THE RING

Dispela em i namba wan long dispela piksa we i gat tripela hap long en. Em bai namba wan taim bilong em long kamap long EMTV. Wanpela gutpela muvi bilong famili i stori long ol liklik lain ol i kolim ol Hobbit na stori bilong raun bilong ol i go long traime kilim wanpela bikpela man nogut.



### 7.30PM - TRINDE NAIT - MACLEOD'S DAUGHTERS

Planti yangpela, lapun na man na meri wantaim insait long kantri i save laik lukim dispela TV we ol i mekim long Australia. Nau em i stat bek long EMTV long dispela yia. Yu ken lukim long olgeta Trinde nait long 7.30pm.



# CATHOLIC RADIO 103.5 FM

Fonde		Mande	
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	VATICAN RADIO WORLD NEWS	7:00	VATICAN WORLD NEWS
7:15	VATICAN ENGLISH PROGRAM	7:15	VATICAN ENGLISH PROGRAM
7:35	NON-STOP GOSPEL MUSIC	7:35	NON-STOP MUSIC
8:00	JOURNEY HOME (EWTN)	8:00	BEST OF JOURNEY HOME
9:00	VATICAN RADIO WORLD NEWS	9:00	VATICAN WORLD NEWS
9:15	VATICAN ENGLISH PROGRAM	9:15	VATICAN ENGLISH PROGRAM
9:40	KIDS SING-ALONG	9:40	KIDS SING-ALONG
10:00	CATHOLIC JUKEBOX	10:00	CATHOLIC JUKEBOX (EWTN)
10:30	GOSPEL MUSIC	10:30	NON-STOP GOSPEL MUSIC
11:00	NON-STOP GOSPEL MUSIC	11:00	NON-STOP GOSPEL MUSIC
12:00	ANGELUS	12:00	ANGELUS
12:05	VATICAN WORLD NEWS	12:05	VATICAN WORLD NEWS
12:20	VATICAN ENGLISH PROGRAM	12:20	VATICAN ENGLISH PROGRAM
12:40	REFLECTION MUSIC	12:40	REFLECTION MUSIC
1:00	LAMB'S SUPPER WITH DR. SCHOTT HAHN	1:00	AFTERNOON REFLECTION MUSIC
2:00	MUSIC	2:00	MUSIC
3:00	CHAPLET OF DIVINE MERCY	3:00	CHAPLET OF DIVINE MERCY
3:20	NON-STOP GOSPEL MUSIC	3:20	NON-STOP GOSPEL MUSIC
4:00	CATHOLIC JUKEBOX (ENCORE)	4:00	CATHOLIC JUKEBOX (ENCORE)
4:30	NON-STOP GOSPEL MUSIC	4:30	NON-STOP GOSPEL MUSIC
5:00	JOURNEY HOME	5:00	JOURNEY HOME
6:00	ANGELUS	6:00	ANGELUS
6:05	MADANG LOCAL NEWS	6:05	MADANG LOCAL NEWS
6:10	VATICAN ENGLISH PROGRAM	6:10	VATICAN ENGLISH PROGRAM
6:30	LAMB'S SUPPER WITH DR. SCHOTT HAHN	6:30	LAMB'S SUPPER WITH DR. SCHOTT HAHN
7:00	HOLY ROSARY	7:00	HOLY ROSARY
7:30	CATHOLIC INSIGHT	7:30	CATHOLIC INSIGHT
8:00	VATICAN WORLD NEWS	8:00	VATICAN WORLD NEWS
8:15	MADANG LOCAL NEWS	8:15	MADANG LOCAL NEWS
8:30	VATICAN ENGLISH PROGRAM	8:30	VATICAN ENGLISH PROGRAM
9:00	TOK STREET LONG HVAIDS	9:00	TOK STREET LONG HVAIDS
10:30	VATICAN ENGLISH PROGRAM	10:30	VATICAN ENGLISH PROGRAM



Motobaik Draiva?...Stail manki i traim helmet bilong motobaik.



Bel Isi...Wari na amamas wantaim long wanpela bel isi kaikai long Par-Wabag.



Isi Long Kaikai...Tupela boi Morobe mekimsave long kaikai long bondei las wiken. Foto: Yakam Kelo

## NATIONAL WEEKLY HIT PARADE

Sarere Sarere Februari 19, 2004 - Twisties i sponsa

Singsing	Musik Atis	Dispela Wik	Dimugura	Bits & Pieces	
Kande	Dadii Gii	1	Tropical Fine	O'shen	13
Mi No Bik Sol Yet	Dadii Gii	2	Poroman Lewa	George Telek	14
Rosie Marara	Sharzy	3	Kaspa	Rusty Oila	15
The Way	Soul Harmony	4	Lili	Itambu	16
Veauaku	Pune Kapa	5	Jombie Kunex	New Painim Wok	17
Kudougou	Vanessa Quai	6	Vereleku	Pune Kapa	18
Emsi	Dadii Gii	7	Na Wonde	Tom Lari	19
Sigi Mangi	Grumo Masalai	8	Towescop	Itambu	20
Meri Wantok	Sharzy	9	In	Kaspa	
Six Pocket	Pikinini Black Bokis	10	Out	Rusty Oila	
Iti Bayama	Armstrong	11		Sharon	
				Uralom ft Rokas	

## EMTV GAID

Fonde 3/03/05		Mande 7/03/05	
5:30	JOYCE MEYER MINISTRY	5:00	JOYCE MEYER MINISTRY
6:00	TODAY SHOW	6:00	TODAY SHOW
9:00	CREFFLO DOLLAR	9:00	CREFFLO DOLLAR
9:30	DR PHIL	11:30	CLASSROOM BROADCAST
10:20	EMTV PRIME TIME LINE UP	2:30	KIDS KONA
4:57	EMTV TOKSAVE	4:57	EMTV TOKSAVE
5:00	THE PRICE IS RIGHT	5:00	THE PRICE IS RIGHT
	\$100,000 SUPER SHOWCASE	6:00	NATIONAL EMTV NEWS
6:00	NATIONAL EMTV NEWS	6:30	A CURRENT AFFAIR
6:30	A CURRENT AFFAIR	6:58	TOK PISIN NEWS UPDATE
6:59	LOTTO DRAW	7:00	LOTTO DRAW
7:00	CHM SUPER SOUND	7:01	PRAYSE
7:57	EMTV TOKSAVE	8:00	INSAIT
8:00	SPORT SCENE	8:27	EMTV TOKSAVE
9:00	WITHOUT TRACE	8:30	WHO WANTS TO BE A MILLIONAIRE
10:00	RUBY WAX with Joan Collins	9:30	C.S.I CRIME SCENE INVESTIGATION
10:30	EMTV NEWS REPLAY	11:00	EMTV NEWS REPLAY
11:00	RENOVATION	11:30	CHM SUPERSOUND
12:00	NIGHTLINE	00:00	NIGHTLINE
0:30	STATION CLOSE	1:00AM	CLOSE

60 MINUTES IS BACK! 7.30 PM EVERY SUNDAY



**Laikim Penpren**

Nem: **Jennifer Tom**  
 Krismas: 16 (man)  
 Adres: PO Box 206, Tabubil, Western Province  
 Save laikim: Danis, kukim kaikai na pilai voli-  
 bot.

Nem: **Ireen Laka**  
 Krismas: 16 (meri)  
 Adres: PO Box 204, Tabubil, Western Province  
 Save laikim: Pilai spot.

Nem: **Finia Fraka**  
 Krismas: 16 (man)  
 Adres: KHL, PO Box 1374, Goroka, Eastern Highlands Province  
 Save laikim: Go hukim pis long wara wan-  
 taim ol mangi, pilai voli-  
 bol, go long lotu na  
 waswas long bikpela wara.

Nem: **Sanao Anthony**  
 Krismas: 15 (meri)  
 Adres: KHL, PO Box 1374, Goroka, Eastern Highlands Province  
 Save laikim: Mekim penpren, go lotu na go  
 waswas long wara na tu pilai voli-  
 bol.

Nem: **Mathew Binim**  
 Krismas: 20 (man)  
 Adres: IUK Anglican Centre, PO Box 112, Bialla, West New Britain Province  
 Save laikim: Pilai soka, voli-  
 bol, ragbi tas na  
 mitim ol prens.

Nem: **Janet Tom**  
 Krismas: 13 (meri)  
 Adres: PO Box 1374, Goroka, Eastern Highland Province  
 Save laikim: Penpren, go lotu, na tok pilai  
 wantaim arapela pren meri na salim presen i  
 go i kam.

Nem: **Tonny Teyok**  
 Krismas: 18 (man)  
 Adres: Tifalmin Secondary School, PO Box 61, Telefomin, Sandaun Province  
 Save laikim: Pilai soka, pilai gita na singsing,  
 pilai voli-  
 bol, basketbol na wokim fani, stori  
 tumbuna na go long lotu.

Nem: **Tiong Loukumun**  
 Krismas: 30 (man)  
 Adres: C/- Koboibus Community School, PO Box 97, Wewak, East Sepik Province  
 Save laikim: Wok gaden, pilai soka, mekim  
 fani, serim Tok bilong God wantaim ol prens.

Nem: **Marie-Jane Gonjuan**  
 Krismas: 18 (meri)  
 Adres: Mercy Secondary School, PO Box 580, Wewak, East Sepik Province  
 Save laikim: Pilai gita, harim musik, danis,  
 wokim pren na pilai voli-  
 bol.

Nem: **Franklin Hakaiwa**  
 Krismas: 20 (meri)  
 Adres: Mercy Secondary School, PO Box 580, Wewak, East Sepik Province  
 Save laikim: Harim musik, wokim fani, ridim  
 buk, go huk na waswas, lukim video, pilai ol  
 spot na raitim pas.

Nem: **Phebe Acquah**  
 Krismas: 26 (meri)  
 Adres: PO Box SW 659, Agona Swedru, C/R, Ghana, West Africa  
 Save laikim: Senisim presen na poto, raun  
 lukim ol ples.

Nem: **Rose Okyere**  
 Krismas: 20 (meri)  
 Adres: C/- Mohammed Adam Okyere, PO Box 176, Agona Swedru, C/R, Ghana, West Africa.  
 Save laikim: Lukim muvi, swimming na  
 senisim presen.



**STORI TUMBUNA**

**B**IPO tru, i gat wanpela man i stap bilong em yet. Dispela man nem bilong em Manihia. Na wanpela taim em i kisim spia bilong em na i go wokabaut long bus.

Taim em i go, em i no lukim wanpela traipela snek i hait gut i stap antap long diwai arere long rot.

Trangu man ya Manihia em i no lukim dispela snek tasol em i wokabaut i go stret long dispela snek. Na snek ya i smelim em, dispela snek i wet i stap na i putim nek bilong em i kamdaun klostu liklik long rot na i redi tru long kaikai dispela man.

Taim Manihia i kamap dispela snek i apim em kwiktai tru na daunim em long bel bilong snek.


Tasol trangu ya Manihia em i no indai. Em i stap orait tasol insait long bel bilong snek. Na dispela snek ya i ting olsem ating man ya i dai pinis.

Orait em i stap liklik taim tasol na em snek ya i trautilim bek dispela man Manihia i stap long graun na em i go pinis long bus long painim wel taro bilong mekim nek bilong em i wel.

Taim snek ya i go mekim ol dispela samting i stap man ya Manihia i opim ai bilong em nau na tingting bilong em i kambek. Olsem na em i save olsem pastaim snek i bin daunim em.

Olsem na em i ting, ating mi mas i go long ples na tokim ol pipel i kam na bai mipela i kilim dispela snek. Taim Manihia i redi long go ya, nogat dispela traipela snek ya i kambek kwiktai tru.

**Watpo Yangoru haus i nogat banis**



Trangu Manihia i no inap nau long ranawe. Olsem na em i kisim wanpela bikpela na longpela hap diwai. Taim snek i opim maus bilong daunim Manihia, kwiktai tru Manihia i sanapim stret dispela diwai namel long maus bilong dispela snek.

Orait dispela snek ya i no inap tru long opim maus o pasim maus. Long wanem

dispela man Manihia i bin putim diwai namel long maus bilong snek. Olsem na snek ya i no inap long kaikai o dring olsem na em i stap na indai.


Olsem tasol nau sapos yu go long hap bilong Yangoru, bai yu lukim olsem olgeta pos bilong haus i save sanap stret namel long haus. Na tupela sait bilong haus i save go na i tasim graun.

**Inap yu helpim mi long stretim hevi**

**Dia Laiplain**  
*Mi bin bungim boipren bilong mi taim mipela statim kolls trening. Mipela i gat bikpela laik long wanpela narapela na mipela toksave pinis long ol papamama bilong mipela long dispela. Tasol poroman bilong mi i bin wokim stil pasin na ol i rausim em long kolls na e mi go long narapela provins na painim wok.*  
*Em i save salim mani na ol arapela samting i kam long mi tasol mi tingting planti na mi laik lusim em.*

**BEWILDERED**

**Dia Pren**  
 Bikos boipren bilong yu em i go long narapela hap na yu laik brukim prensip wantaim em?  
 Em i salim mani na ol ara-



pela presen i kam long yu na dispela i soim olsem e mi gat bikpela tingting long yu.

Yu save tingim em tu na ol gutpela taim yutupela i bin gat wantaim?

Yu wari long narapela as na dispela em long skul i bin rausim em? Papamama bilong yu i save olsem dispela samting i bin kamap? Sapos yesa, wanem tingting bilong ol long dispela?

we yu ken trastim na taim samting olsem i kamap, yu bai

i no inap pilim o stap gut na yu pilim olsem poroman i daunim yu.

Na yum as was gut tru na sapos dispela prenpasin bilong yutupela bai go het yet o nogat. Yu no bin tokaut sapos yu bin toktok wantaim boipren long stil pasin we em bin wokim long en.

Sapos yutupela toktok na painim wanem as true m i wokim dispela, bai gutpela.

Sapos yu pilim olsem yu laikim yet poroman na em tu it ok sori long pasin em bin wokim long en, yu ken kisim em bek na luksave long em taim yu pogivim em long lewa bilong yu. Yumi olgeta i save wokim mistek o rong na i laikim laik pasin na sapot bilong narapela long helpim yumi na yumipela i ken abrusim dispela rong.

i moabeta tu long yu i raitim

pas i go long em na yupela i ken save wanem samting wan wan long yupela i wokim long en na tu, tingting bilong yutupela long wanpela narapela.

Bai i gat sans long lukim wanpela narapela long sampela taim, tasol long nau, bai yu stretim ol tingting na givim bikpela tingting long skul bilong yu.

Tasol sapos yu no pilim gutpela long stil pasin poroman bilong yu i wokim na yu egen-sim dispela na e mi as long yu i no0 luksave long en, tokim em na mekim klia long em watpo tru yu laik brukim pren pasin bilong yutupela.

Traim na toktok tu long papamama bilong yu long tingting bilong yu. Na wanem disissen o tingting yu wokim, ol bai luksave na sapotim yu.

**LAIPLAIN**



# PASIFIK NIUS

## Kondom promosen i no go gut

**SUVA** - PASIN kalsa na kastom i save wokim na wokim kempen agens HIV/AIDS awenes long Fiji i no go gut, wanpela ofisel i tok.

Helt ministra Solomoni Naivalu i tok non gavman ogenaisesen we i traim long promotim kondom na gutpela pasin i mas wok bung wantaim National Advisory Council of AIDS (NACAIDS) long helpim ol kempen.

Wanpela NGO grup bilong Australia Marie Stopes International i traim long promotim 'Try Time' kondom tasol kempen bilong ol i no go gut.

Wanpela stoa kipa long Fatty's stoa i tok olsem dispela promosen i no kisim planti manmeri kam lukim bikos planti lain i go lukim wanpela ragbi gem.

Promosen so i bin stat long 10-kilok long moning na pinis long 2-kilok long apinun. Dispela promosen i bilong lainim ol yangpela manmeri Laucala Bay soping senta klostu long Univesiti ov Saut Pasifik (USP).

Planti kastoma i kam long ol stoa i go sanap lukim ol samting ol i soim long promosen na bihain ronawe i go lukim ragbi na promosen i no bin go gut.

## Paitman bai sanap long kot

**HONIARA** - BIPO sinia paitman bilong Malaita Eagle Fos (MEF) Andrew Nori na Leslie Kwaiga bai sanap long sentrel mejistret kot bihain long ol i kisim sas long askim na kisim sampela mani bilong Malaita provinsol Gavman.

Dispela sas em i bung wantaim SBD\$ 5 milien (klostu osiem US\$687,000) peiaut i bin kamap long dispela bikpela hevi bilong yia 2000.

Ripot i kamap olsem dispela SB\$5 milien em peiaut bilong nesinol gavman long makim Guadalcanal provins long ol kros pait na tok nogut i bin kamap long ol paitman.

Mista Nori em bipo wanpela loya na mausman bilong MEF i kisim tupela asua long Mista Kwaiga bai sanap long 3-pela rong long bikhet na kisim mani. Kot i lukim olsem long dispela SB\$5 milien, 4-milien em i bilong ol Malaita pipol na 1-milien i bilong kaunsol sif mekim haus bilong ol.

## Nupela Balus ron sevim Niue, Tonga, na Fiji

**ALOFI** - WANPELA ripot i stap pinis long kamapim balus sevis namel long Niue, Tonga na Fiji na bai ol i kolim Reef Air.

Long wanpela ripot i kam long Tonga niuspepa Taimi'o Tonga i tok Reef grup bilong Niue i bin gat wanpela miting wantaim narapela Tonga balus indastri 'Ea Peau'o Vava'u.

Dispela miting em long toktok long wei we dispela balus indastri can kirapim moa spes long kago na pasindia sevis long ol dispela kantri.

Nau yet, Reef grup i plen long karim aut sevis long Niue i go long Fiji yusim wanpela Chatams Air Convair balus we bai i karim 7 tons kago na pasindia.

Narapela balus bisnis 'Ea Peau'o Vava'u bai givim wanpel bikpela na nupela balus dispela yia long givim spesol sevis i go long Niue, Samoa na Fiji.

Tupela kru kebin bilong Niue i nau stap long New Zealand long wokim trening long wok insait long balus. Royal Tongan Airlines i save kamapim olgeta dei ron long Nuku'alofa i go long Niue, i pundaun long las yia, lusim bikpela maunten dinau i stap nau long Tongan Gavman.

### WOL NIUS WOL NIUS WOL NIUS



### WOL NIUS WOL NIUS WOL NIUS



## 'Kar bom'

**Iraq:**

Ol polis bilong Iraq i lukluk long wanpela kar long rot sait bihain long wanpela bom long westen Baghdad. Wanpela polis ofisa i kisim bagarap long dispela hevi. (REUTERS/ Thaler Sudani)

## 'Pis o wel pusi'

**China:**

Wanpela kap pis we pes bilong em i luk wankain olsem wel pusi stret i swim long wanpela pak long Jinan, Is China. Dispela pis i pulim planti asples man na visita long narapela hap i kam long dispela hap long lukim em. Ol wokam bilong dispela pak i tok sampela lain bilong kaikai pis i traim long baim em long bikpela mani tru.



## 'Kisim taim long kot'

**United States of America (USA)**


Michael Jackson wantaim defens toya bilong em Brian Oxman i lusim Santa Barbara County kot bihain long nabawan dei bilong em long trial. Ol prosekyuta na defens tim i presentim opening toktok bilong i go long jas na juri long dispela dei. (AP Photo/Damian Dovarganes)



## 'Monki kam fes

**Indonesia:**

Ol manmeri i lukim ol Monki i resis long wanpela resis long wanpela stet palas long Jarkata. Turangu bai nogut pulim kago long baksait na givim long kona. (AFP/Bay Ismoyo)



## Strongpela win long pasifik

**Cook Ailan:**

Piksa i soim long spes olsem bikpela win i kamap long pasifik. Planti manmeri bilong noten Cook Ailan i ranawe long haus bilong ol bihain long dispela liklik ailan i kisim namba 4 saiklon long dispela mun. (AFP/NASA)



## "Ami helpim"

**Japan:**

Poto o soim ol Japanese soldia rolim ol haus sel we ol i save yusim olsem medikol senta long taim sunami bagarapim Banda Aceh. Ol Japanes ami we i kam long helpim ol lain kisim bagarap long hap i wok long lusim isi na i luk olsem bai olgeta i go bek bihain long dispela mun. (REUTERS/ Supri)

## Lapun na ekt yet'

**'Hollywood - USA:**

Dairekta bilong dispela biknem muvi 'Million Dolla Babay' Clint eastwood i kisim prais long best piksa na dairekta long dispela Oscar awards long Holly wood long wiken. Dispela muvi i kisim prais sapoting ekta na lid-ektress we Hilary Swank i kisim. Narapela biknem muvi 'The Aviator' i kam fes long kisim 5-pela awod long dispela 2005 Oscar Awards. (AP)





**Bisnis bilong Groim Diwai insait long PNG - Ol hevi bilong planim samting long ol renfores ples**

Ol hevi bilong lukautim ol samting insait long ol renfores ples

**TENDING**

Tending em i wok bilong lukautim ol sidling bihain long yu planim ol insait long graun. Wok bilong givim wara, givim malsing o ol sting lip na gras samting, wok bilong rausim ol gras nogut, givim pekpek bilong kakaruk, katim ol pikinini diwai, banisim ol long ol binatang nogut na sik em ol bikpela wok long laip bilong diwai. Olgeta i stap wok bung wantaim na olgeta i mas kisim wankain skelim.

**Widing o rausim ol gras nogut**

Ol gras nogut i save resis wantaim ol diwai bilong kisim gris o kaikai insait long graun, spes na san. Widing em i mas i kamap long lukautim gut groa bilong ol sidling o pikinini diwai.

Groa bilong ol gras nogut i save winim groa bilong ol diwai sidling, olsem na ol foresta i save yusim tripela kain rot bilong rausim ol gras nogut bai ol i noken resis wantaim groa bilong ol sidling.

Long kamapim plantesen eria, wok i mas kamap long rausim olgeta gras nogut i kamap long olgeta hap bilong ples gaden.

Taim mipela i planim pinis ol diwai, ring tending o wok bilong rausim olgeta bus, gras o sayor i stap inap long 50 cm raunim as bilong diwai o sidling. Dispela wok i mas kamap 3-pela taim long nambawan yia, tupela taim long namba tu yia na wanpela taim long namba tri yia.

Ol gras nogut i save groa insait long ol lain o hap spes namel long ol gaden olsem na wok bilong lain widing i mas kamap tupela taim insait long wanpela yia, tupela taim insait long wanpela yia na wanpela taim insait long namba 3 yia.

Insait long ol renfores eria, ol bus rop i ken kilim ol plaua, olsem na bus rop tending o wok bilong rausim ol bus rop i

stap insait long ples bilong planim i mas kamap inap long tripela taim long namba wan yia, tupela taim long namba tu yia na wanpela taim long namba tri, fo na faiv yia.

**Rot bilong rausim gras nogut**

- Yu mas rausim ol gras nogut long olgeta tripela mun long namba wan yia.

- Long namba tu na namba tri yia, yu mas rausim ol gras nogut tupela taim long wanpela yia inap ol lip na han diwai i stat long pas.

- Sapos wok em i bikpela wok tumas, yu ken rausim ol gras nogut wantaim baira o busnaip samting.

- Long ol bikpela plantesen, ol i save yusim ol bikpela masin olsem trakta na slesa o trakta na masin bilong brukim graun.

- Sapos ol gras nogut i kamap ol bikpela hevi tumas, bai yu mas yusim ol marasin bilong kilim ol gras nogut long daunim. Kos bilong ol dispela marasin i antap tru tasol ol i save daunim mak bilong taim na hat wok. Gutpela taim bilong yusim ol dispela marasin em taim ol gras nogut i wok long karim plaua na yu mas yusim pastaim long yu planim samting na bihain long yu mekim redi graun bilong planim.

**Malsing**

Malsing o wok bilong putim ol drai gras na lip samting long as bilong diwai i save pasim san long go long ol gras nogut bai ol i no inap long groa. Long wankain taim malsing i save holim bek wara insait long graun. Yu ken yusim kain kain samting bilong wok malsing olsem stro, so das, skin diwai, ol hap gras na wud sip.


Taim yu yusim mals, em i noken go pas long as bilong diwai o plaua bilong wanem em i ken kamapim sik bilong diwai.

\*Neks wik bai mipela i

MCCARTHY & ASSOCIATES (FORESTRY) PTY, LTD.  
National & International Forest Consultants  
mccat@data.ec.net.pg

"Long kisim tok stia long olgeta wok diwai"

# Gavman i no tok klia long Napa Napa i pas



• Napa Napa. FAIL POTO

WANEM as na bikpela wel bisnis long Napa Napa i tokaut long pasim wok long sampela taim pastaim?

Dispela em bikpela askim bilong memba bilong Laigap Porgera Karpa Yakka long Palamen i go long Ekting Praisim Minista Sir Rabbie Namaliu.

Mista Yakka i tok taim dispela toksave bilong InterOil kampani i kamap olsem ol bai stopim operesen bilong ol long Napa Napa long sampela taim pastaim, dispela kain nius i mekim ol pipel i bel kirap.

Em i tok kain bikpela nius olsem inap daunim wanbel na strong bilong ekonomi bilong kantri bikos ol bisnis inap lusim laik long PNG taim

bikpela projek olsem i tok em i pasim wok.

Mista Yakka i askim gavman long tokaut long dispela bai ol pipel bilong PNG na tu ol bisnis i ken save long ron bilong dispela bikpela projek.

Tasol eking Praisim Minista Sir Rabbie Namaliu i tok em i no klia yet long as bilong dispela samting na tu em i no harim yet dispela ripot olsem na em bai painimaut pastaim na tokaut long palamen long bihain.

Napa Napa em wanpela bikpela wel projek long Mosbi tasol we ol sip i save karim wel long Kerema nambis we i kam daun long paip long Kutubu. Long Napa Napa ol bikpela sip i save kam karim ol dispela wel i go gen long ovasis maket.

## PNG i gat poroman wantaim Kanada

PAPUA Niugini i gat gutpela wok poroman o pren wantaim Kanada longpela taim i kam.

Dispela em tok klia bilong eking Praisim Minista Sir Rabbie Namaliu long dispela wik taim em i kisim askim i kam sapos PNG i ken kamapim poroman namel long Kanada.

Sir Rabbie Namaliu tok longpela taim yet i gat ol program na wok helpim we Kanada gavman i save givim long PNG olsem ol skolasip program we em yet i bin kisim long go stadi long ovasis yunivesiti na nau ol i wok long surikim i go yet long sampela liklik sapot na helpim.

Memba bilong Ambunti Drekkia, Tony Aimu, i


askim Sir Rabbie bikos em i tok i nogat opis bilong Kanada long PNG tasol ol i gat bikpela wok olsem wok painimaut long ol wel na gol, kopa nabaut.

Mista Aimu i tok Kanada tu i gat ol liklik sapot program bilong helpim wantaim ol liklik wok helpim insait long komyuniti olsem na gavman i mas luksave long dispela na strongim ol long sanapim opis hia long PNG.

Tasol Sir Rabbie Namaliu i tok Kanada i gat opis long Kenbera we i lukluk tu long PNG long Pasifik na sapos ol i laik kam sanapim opis long hia, em laik bilong ol yet long mekim long wanem taim ol i redi long en.

### Cat 'C' Series Hydraulic Excavators

- 305C, 307C,
- 308C, 311C,
- 312C, 314C,
- 315C, 318C,
- 320C, 322C,
- 325C, 330C



*Caterpillar 'C' Series Hydraulic Excavators incorporates innovations for improved performance and versatility.*

- **Engines and Hydraulics** - Cat® engines combine with proven hydraulics to give consistently high power and control in the field.
- **Structures** - Rugged Caterpillar® undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

### Hastings Deering



PORT MORESBY  
Phone: 300 8300  
Fax: 325 0141

LAE  
Phone: 472 2355  
Fax: 472 1477

TABUBIL  
Phone: 548 9045  
Fax: 548 9155

RABAUL  
Phone: 982 1244  
Fax: 982 1129



# Tok pilai wantaim Kanage olgeta wik!!

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sapatim raitman bilong yumi, Kanage!!

**K**anage em bilong Bogenvil long asples Kunua stret. Wanpela taim Kanage sindaun na i wok long skelim ol manmeri i save trip long solwara na kamap long narapela kantri.

Em skelim i go na em interes long traim trip na tu kamap long narapela kantri olsem na Kanage kirap na rereim olgeta samting olsem wara, kaukau, kumu, kolos na laspela samting em wokim em go long as kokonas na pulim olgeta kuru kokonas long kaikai long taim bilong trip.

Orait na em kirap kisim olgeta kago na putim insait long kanu na stat long pul i go antap long biksolwara

stat long 6 kilok moning i go inap long 6 kilok apinun.

Kanage i no lukim moa bikples olsem na em stat long slip.

Orait liklik kolwin bilong nait i stat long kisim em i go antap tru long biksolwara.

Long dispela nait i bin wanpela gutpela nait tumas olsem na mun na sta i bin wok long lait na em bin amamas tumas lng gat gutpela taim bilong slip na trip i go long narapela kantri.

Orait i no long taim klaut i kam na pasim mun na sta em i no lukim em slip yet.

I no long taim win i tanim bek i go long bikples. Trangu Kanage i no pilim em karamap yet long blanket i stap antap long kanu.

Taim win i kamap strong tru, win na solwara i wok long pusim kanu bilong Kanage i

kam bek long asples bilong en long bikples Kunua.

Long samting olsem 4:30 long bikmoning tru kanu bilong em i kam pas bek long ol rif bilong ples bilong en long Kunua.

Kanage amamas nogut tru em ting olsem em stap long Solomon Ailan.

Orait han i go antap em askim ol, 'waswei no more, yufala orait no more? Hem wanem fles no more?'

Ol manmeri lap nogut tru bikos ol save gut tru long Kanage na ol givim tok pilai long Kanage olsem, "sapos yu wokabout i go long hapsait bai yu lukim ol pikinini wantaim meri na haus bilong yu i sanap i stap yet.

Yu no stap long Solomon Ailan yu stap long Kunua".

Man trangu Kanage

em sem pipia stret olsem na em ron i go hait long bus inap wanpela nait.

### ALIA BAR SOHANA AILAN BOGENVIL, NSP

Kanage bilong Wes Yangoru insait long bikbus. Bipo tru Kanage i no save long rais, em i save harim nem rais tasol na tu em i no save long swit bilong rais o lukim rais long laip bilong em.

Wanpela taim bubu bilong em i go long skul na baim tupela plastik rais na karim i kam long haus na givim long em.

Kanage i lukim na amamas tru long bubu bilong em na i tok 'bipo mi no save teistim rais nau bai mi kukim na traim'.

Nau Kanage i boilim long wanpela bikpela sospen na em i teistim

rais na rais i swit nogut tru.

Nau i no long taim Kanage i pilim pekpek na em i les long pekpekim rais na em i ron tasol i go katim pangal bilong saksak na rausim bun bilong pangal na kisim bel bilong pangal na katim sot na subim i go antap long as pekpek na blokim nogut rais i kamaut.

Tupela mun i go pinis bel bilong Kanage i solap na em i laik indai na ol lain i kam bung raunim Kanage na tok tok long sik bilong em i stap. Kanage i no tokaut olsem em i blokim as pekpek bilong em bikos em i les long rais bai kamaut na i go.

Na anti bilong lewa Kanage ya bosim tupela iek bilong em na sindaun i stap.

Poro meri bilong Kanage i harim olsem bel bilong Kanage i

solap na em i kra i wantaim na kam i go antap long bel bilong Kanage.

I no long taim pangal i wok long suruk suruk i kam isi isi kam autsait na trangu anti meri i no save kirap nogut pangal i kam autsait pekpek i sut na wasim nus pes bilong anti bilong em.

Bel bilong Kanage i slak hariap tasol na bagap kirap na ronawe i go hait.

### GABIE JOMBOX YAWASORO IS SEPIK PROVINS

Kanage em bilong Ane Bay long Banz yet. Em fada man tru tru bilong K3.50 botof long Waibune Nol Guest Haus.

Em save 7-pela de i wokim wanpela wik, 24-pela aua i wokim wanpela de.

Long 2004/2005 nu yia em i stap i go tulait

bruk long Sarere 01/01/05 na em slip tanim tanim long as bilong kokonas i stap.

Hap lek i go insait long graun malomalo na hap i stap antap long pekpek bilong dok.

Ol manmeri i kam lukim na lap tasol na wanpela kasmeri i kam na isi tasol putim wanpela anis i go insait long trausis bilong Kanage.

Isi tasol anis i go na kaikaim gia bokis bilong Kanage na bagaros kirap nogut i go pundaun antap long sipsip fraim bilong meri tambu bilong Kanage.

Ol planti i lap tasol tambu meri bel hat na wilwilim kasmeri na tupela rausim tit long Ane Bay long nu yia 2005.

MATT DEDEBOH HOLEYAH BANZ ISTEN HAILENS



# KANAGE Raitman long TOK PILAI

Kam na tok pilai wantaim mi olgeta wik!!



LONG NAIT KANAGE EM SPAK NA WOKABAUT LONG BUS TREK I GO LONG PLES BILONG EM...

SORI KANSOLO OJ GAWI BAGARAP.. YU KAM HARIAP..!!



LONG HAP ROT NA OL RASKOL I HENSA-PIM EM NA ASKIM EM LONG MONI...

SANAP!! MONI BILONG YU IKAM!!



OL RASKOL I NO SAVE OLSEM KANAGE I GAT PLANTI TRIK TRU... EM PUTIM HAN I GO INSAIT LONG BILUM...

YUPELA WET LIKLIK..(hic!) MI SEKIM SAPOS MI GAT SAMPELA MONI I STAP..

HARIAP!



TASOL NOGAT, EM RAUSIM BUN BILONG BILAK PUSI, KAWAR, KAMBANG NA BUN BILONG BILAK BOKIS...

ORAIT, HUSAT LAIK KROL OLSEM SINEK NA ASS BILONG EM I KAM PAS LONG MAUS BILONG EM NA BEL I TANIM OLSEM ROKROK NA AI BILONG EM I PAS LONG ASS BILONG EM..

PUFF!



OL RASKOL I LUKIM OLSEM KANAGE EM SIRIES STRET... OL I NO WET LONG PAINIMAUT BLAK PAWA BILONG KANAGE... OL I LUS LONG HAP TASOL...

GOAN! SANAP NAU! OL RASKOL WE!?! YULAIK LUKIM BLAK PAWA BILONG GAWI?!

DISAPIA!



• Ol pilaia na opisel bilong Taunaimato Breeze soka klab bilong Samoa i redi i sanap long lain long Jackson Airport long kisim balus i go long Lae.



• Kosa bilong Taunaimato Breeze Isaia Iona i no man bilong planti toktok olsem yu ken lukim. Em i kam long pilai na win gut.



• Teknikol soka dairkta bilong Samoa soka David Brand husat i wokabaut wantaim Tuanaimato Breeze long givim sapot. Brand i tok Tuanaimato i redi.



• Ol pilaia na opisel bilong Tuanaimato Breeze soka klab.



• Ol pilaia na opisel bilong Tuanaimato Breeze soka klab was harim singaunt bilong balus long Jackson Airport long go long Lae.



• Ol pilala na opisel na sampela pasindia i wokabaut i go long kisim balus long Jackson Airport. Ol foto: PAUL ZUVANI



**Pot Mosbi Soka Asosiesen soka dro**

**Sarere 5 Mas, 2005**

**Bisini Wan**

**Taim Division**

08:00 MP1  
09:20 MP3  
10:40 MP1  
12:00 MP3  
13:20 WP  
14:40 MP2  
16:00 MP4

**Tim**

Oduka vs United PS  
BE Pirates vs DOM 121 Ela Utd  
University (1) vs Souths Utd (2)  
Cosmos (2) vs LBC Defence (1)  
Telikom vs Souths Utd  
PS Rutz vs Mirel Momase  
Guria vs EVFC

**Bisini Tu**

08:00 MP2  
09:20 MP3  
10:40 WP  
12:00 MP3  
13:20 MP2  
14:40 MP4  
16:00 MP2

**Tim**

University (2) vs Namu  
Yawata vs Raitman  
University vs PNG Gardener  
Souths Utd (1) vs YMC Kareko  
Rosaints vs Mungkas  
Rapatona (2) vs Mopi Soweto  
Cosmos (1) vs Rapatona (1)

**Sande 06 Mas, 2005**

**Bisini Wan**

08:00 MP4  
09:20 MP3  
10:40 WP  
12:00 MP1  
13:20 MP2  
14:40 MP1  
16:00 MP1

**Tim**


UBOG vs Verave  
Bomana P/Coll vs Kurti Andra  
Cosmos vs LBC Defence  
MBS vs KB United  
Boregaina vs Sunset  
Bavaroko vs Modreams  
LBC Defence (2) vs Mirel Momase (2)

**Bisini Tu**

08:00 MP2  
09:20 MP1  
10:40 WP  
12:00 MP4  
13:20 WP  
14:40 MP4  
16:00 MP4

**Tim**

Gagala vs Telikom  
Maset vs Manambu  
Lamana GFN vs Rapatona  
KG United vs Blue Kumuls  
Sunset vs Momads  
UBOG vs Singkin  
Verave vs Markham Yarangs



• Em nau! Taim bilong basketbol eksen Hohola kot.



• Airways Bears pilaia traim ronowe long Chebu pilaia long ran hom seif long Pot Mosbi meri sofbol.



• Manki tu i mas lainim long pilai taim em i yangpela yet. Snuka eksen.



• Alphonse Pu, presiden bilong Mount Hagen ragbi lig. Strongpela sapota bilong ragbi lig.

# Ol hevi na traim long Nesenel Ragi Lig pilai

**Bulldogs** kaikaim South Sydney 40-16, Perth MEMBA Ekuiti Stedum long Perth long las Fraide i lukim Bulldogs kaikaim South Sydney 40-16. Bulldog faiv-eit Braith Anasta i sikirapim het bilong em yet long wei em i putim gutpela trai bihain long em i kism bal long Sonny Williams. Long 16 minit ol pilaia bilong South Sydney i holim pasim William na planti lain i wok long wet long William long pundaun tasol Anasta i kirap nogut long lukim bal i pas long brus bilong em we em i ran i go na putim trai. "Mi ting tingting bilong em long tromoi bal long mi i pinis bihain long mi lukim olsem ol birua pilaia i holim pasim em pinis na olsem em bai i no inap long tromoi bal gen tasol abrus bal i kam long mi," Anasta i tok. "Ol Souths i tok mi kism bal long graun tasol dispela em William i tromoi long mi.

**Melbourne Storm** waraim Nth Queensland 30-18, Cairns Gutpela ron bilong Melbourne Storm long ol prisisen pilai i kism mak nogut bihain long nupela pilaia bilong ol Jamie Feeney i kism bagarap long baksait bilong em na bai malolo long narapela sikspela wik. "Em i kism bagarap taim em i pilai long wiken wantaim North Sydney," Melbourne kosa Craig Bellamy i tok. "Jamie i bikpela pilaia bilong mipela." Long Fraide taim em i pilai wantaim North Queensland, winga Steve Turner tanim lek bilong em na i luk olsem bai i no inap pilai olgeta long dispela sisen. Dispela i mekim na olsem Jake Webster bai kism ples bilong em. Ol bai mekim namba wan sisen propa pilai bilong ol wantaim Newcastle. "Long mipela i win dispela i no bikpela samting tasol mi amamas long wei mipela i pilai na win," Bellamy i tok.

**Penrith** brukim wing bilong Sydney Roosters 34-12, Gold Coast Panthers kosa John Lang i painim hat long husat tu em bai kism long pilai bihain long tim bilong em i pinisim tru Roosters long pilai bilong ol we skipa Craig Gower na wan intenesenel pilaia Luke Lewis na Luke Rooney i no bin pilai wantaim ol. Ben Rogers husat i mekim namba wan pilaia bilong em long NRL wantaim St George Illawara las sisen, soim Lang long dispela pilai olsem em



• Em bai go oh? Knights kepten Andrew Johns i askim. Foto: SMH

inap pilai long hapbek na bipo Cronulla Sharks senta Paul Franze na ruki Michael Gordon i kamapim tu gutpela pilai. "Em ples mi bin wari long en tasol mi ting ol yangpela pilaia bilong mipela i pilai gut." Lang i tok. Queensland Orijin prop Ben Ross i mekim strongpela kam bek bihain long em i no pilai long nainpela pilai long kism saspensen. Ol Rooster bai gat Michael Crooker na Luke Ricketson long stap long namba wan pilai bilong ol long propa sisen maski ol pilai olsem Craig Wing husat i gat hevi long amstring na Ned Catic husat i gat bagarap long sait bun bilong em. Ol Rooster bai pilai wantaim South Sydney.

**Cronulla Sharks** katim Newcastle Knights 32-28, Gosford Stedum Newcastle faiv-eit Kurt Gidley na prop Josh Perry i gat tupela tingting long pilai bilong ol wantaim Melbourne Storm long dispela Sande. Gidley kism bagarap long bel bilong em na Perry i kisi bagarap long han bai kism tok orait long dokta bilong ol pastaim bipo long ol go het na pilai. Maski long Andrew Johns long gutpela pilai bilong em long wiken Knights bai kism tu

sapot long Anthony Quinn, Riley Brown na George Carmont bihain long ol i kism malolo long kism bagarap. Ol Shark i nogat bagarap long sait bilong ol.

**Manley Sea Eagles** daunim St George Illawara 26-16, Centenary Pak Sea Eagles opisel bai sindaun wantaim gutaim pilaia bilong ol Terry Hill long dispela wik long skelim toktok wantaim em bihain long em i putim tripela trai long wiken. "Yumi ken tok olsem, em i mekim olgeta samting stret," bipo top Sea Eagles pilaia na nau kosa Des Hasler i tok.

**Brisbane Broncos** kalapim Canberra Raiders 26-20, Toowoomba Raiders rikrut Jason Smith i tok em wantaim ol wan pilaia em ting em i "olpela blut" taime i em kamap long prisisen trening. "Taim mi kamap long klab planti bilong ol i ting olsem, 'Olsem wanem mipela i kism dispela stupid lapun man long pilai?' Smith, 32, i tok bihain long sapot bilong em we i lukim ol i no lus long Broncos long bikpela skoa. "Tasol mi bin wok long tren wantaim ol long sampela mun nau na olsem mi hop ol bai save olsem mi ken pilai gut yet. Brata bilong Smith Darren, 36, i bin pilai wantaim Broncos bihain long em i regista long pilai wantaim Orijin long taim em i kism ples bilong bipo All Black Brad Thorn husat i mekim kam bek long mekim 13-man tim. Na oposit namba bilong Smith em Darren Lockyer husat i setim tupela trai na i skorim mes wining trai. Kosa Wayne Bennett i tok senta Brent Tate i kamapim gutpela pilai long las 12 mun em i lukim.

**New Zealand Warriors** holim pasim NZ Presiden XIII 58-6, Auckland NZ New Zealand Warriors kosa Tony Kemp i tok em i painim hat long makim husat tu bai pilai long namba wan Warriors 13 sait bihain long ol pilaia i kamapim gutpela pilai bilong ol winim tupela prisisen pilai. Ol bai mekim namba wan propa sisen pilai bilong ol wantaim Manley Sea Eagles. Kemp i tok em bikpela laik bilong em long lukim tim i mekim gut long ol prisisen pilai bilong em na dispela i karim kaikai. Long ol pilaia yet Francis Meli na Brent Webb i ronim tripela trai wantaim na Lance Hohaia i skorim tupela trai. Na bipo Australia Kangaroo prop Richard Villasanti i kism bagarap long nek bilong em na bai i no inap pilai.

**Ireland** Brian O'Driscoll i lusim Inglan pilaia Charlie Hodgson i slip i stap long go na skoa. Ireland win 19-13. Foto: SMH

**INGLAN:** Brian O'Driscoll long kam bek bilong em long union bihain long em i malolo long kism sampela bagarap i helpim gut Ireland long bagarapim sindaun bilong Inglan 19-13 long wanpela strongpela pilai long wiken. Dispela win i wanpela win long ol narapela we Inglan i go long bungim bihain long planti arapela tim i winim ol long Siks nesenel tonamen. Dispela siks nesenel kantri em Inglan, Frans, Ireland, Wales, Skotten, na Saut Afrika. Tasol dispela win i gutpela win bilong Ireland we em bai bungim Wales long gren fainol long Mas 19 long Cardiff pilai graun. Irelan i no bin go long wanpela gren fainol long las 20-ya olgeta. Na long Inglan dispela em i 9-pela long ol pilai ol i tus long ol long 13-pela pilai ol i kamap long em bihain long ol i winim Wol Kap long 2003. Top kipa na pilai bilong ol John Wilkinson i no save pilai tumas wantaim ol bihain long em i gat hevi long nek bilong em.

**Chelse** bai go yet long fainol olpisel i rausim em long tok pait bilong ol sapota bilong Liverpool. Em i soim han long amamas long pilai bilong ol na ol sapota bilong Liverpool i ting olsem em i mak nogut long han bilong em na soim long ol na olsem ol i tok pait na tokim ol opisel i rausim em. Billionair man bilong Rasia, Roman Abramovich, husat i baim Chelsea long 2003 we long dispela taim stap bilong klab long dispela taim long sait bilong mani i nogut tru i stap tu na lukim pilai. Chelsea i bin go pas wantaim 10 poin long namba tu ples tim Manchester United tasol poin bilong ol kamdaun bihain long ol i go daun long Barcelona 2-1 na Newcastle United long pilai 1-0. Liverpool husat em ol sapota i no bin amamas long ol long lusim pilai bai i nogat sans moa long go insait long fainol. Long ol narapela pilai Southampton i dro wantaim namba tri ples na difening sampion Arsenal 1-1, Everton winim Aston Villa 3-1, Crystal Palace nilim Birmingham City 2-0, Manchester United pinisim win bilong Portsmouth 2-1 na Tottenham Hotspur pairapim Fulham 2-0.

## Chelsea bai go yet long fainol

**LONDON, Inglan:** Straika Didier Drogba na Mateji Kezman i skoa gut long ekstra taim long lukim Chelsea i go pas yet long Inglan primia soka. Wantaim sapot bilong tupela Chelsea winim namba faiv ples Liverpool 3-2. Tasol wining gol bilong ol i kam long midfila bilong Norway John Arne Riise husat i mekim volibol stail long putim go bilong Chelsea. Dispela lida bilong primia soka i bosim olgeta hap bilong pilai long dispela taim tasol long sampela as ol i no pairapim umben bilong Liverpool inap long taim i kamap taim Drogba i putim namba wan gol bilong ol. Drogba husat klab i baim long traipela mani long K100 milien (Aus\$45.84m) las ya i putim isi bal i go long sait bilong Liverpool kipa Jerzy Dudek. Dispela em bihain long Liverpool i mekim krangk long i no bin traim putim gol long wanpela gutpela intasep ol i mekim long pilai bilong Chelsea. Chelsea kosa Jose Mourinho husat i



• Chelsea pilaia soim amamas long hapim kap bihain long ol i winim Liverpool 3-2. Foto: SMH


bilong Portugal i stap isi bilong em yet long Millenium Stedum bihain long em i

### Haphap Spot

#### Wayne Arthurs brukim kiau

**AMERIKA:** Australia man Wayne Arthurs i kamap namba wan long em i olupela man long winim ATP Tua kap long Tennis Channel Open tonamen long Scottsdale, Arizona, Amerika. Em i kism dispela kap bihain long em winim Croatia man Mario Ancic 7-5, 6-3 long las Sande. Dispela 33-ya lephan pilaia long 128 ATP pilai bilong em i wilwilim gut yangpela 20-ya man. "Mi pilim gutpela tru na amamas," Arthurs i tok. "Moa olsem mi lapun nau, mi ting em i moa gutpela long winim tonamen long kain krismas bilong mi long profesinol pilai. Mi bai amamas olgeta taim long tingim dispela tingim dispela win. Arthurs husat bai tanim 34 long Mas 17 i namba tu olupela man long pilai yet long ATP tonamen bihain long 34-ya Amerika man Andre Agassi. Arthurs i namba wan 33-ya Australia man long win bihain long Tom Gullickson i win long Newport, Rhode Island long 1985.

#### ragbi yunion



**Ireland** Brian O'Driscoll i lusim Inglan pilaia Charlie Hodgson i slip i stap long go na skoa. Ireland win 19-13. Foto: SMH

**INGLAN:** Brian O'Driscoll long kam bek bilong em long union bihain long em i malolo long kism sampela bagarap i helpim gut Ireland long bagarapim sindaun bilong Inglan 19-13 long wanpela strongpela pilai long wiken. Dispela win i wanpela win long ol narapela we Inglan i go long bungim bihain long planti arapela tim i winim ol long Siks nesenel tonamen. Dispela siks nesenel kantri em Inglan, Frans, Ireland, Wales, Skotten, na Saut Afrika. Tasol dispela win i gutpela win bilong Ireland we em bai bungim Wales long gren fainol long Mas 19 long Cardiff pilai graun. Irelan i no bin go long wanpela gren fainol long las 20-ya olgeta. Na long Inglan dispela em i 9-pela long ol pilai ol i tus long ol long 13-pela pilai ol i kamap long em bihain long ol i winim Wol Kap long 2003. Top kipa na pilai bilong ol John Wilkinson i no save pilai tumas wantaim ol bihain long em i gat hevi long nek bilong em.

#### kriket- Saut Afrika winim Zimbabwe

**GRAEME** Smith i skorim 117 long lukim Saut Afrika i win isi long kasen bilong ol Zimbabwe long wanpela-de intenesenel pilai long las Sande. Saut Afrika i bihainim tasol namba wan win bilong ol we ol mekim long Fraide 6-329 we Zimbabwe i ol aut long 7-198 long 50 ova bilong em. Zimbabwe i lus 131 ran. Na las Sande ol i no kirap nogut long lukim wankain win. Saut Afrika Justin Kemp i paitim faivpela foa na wanpela siks we em i no go aut bihain long em i me 53 ran long 21 bal. Em i pasim rekod bilong em long mekim 50 ran long 19 bal tasol em i wankain long wantok bilong em Mark Boucher em i mekim long 2001 taim Saut Afrika i pilai wantaim Kenya. Kemp i no save wanpela samting long dispela rekod. "Mi nogat save tru long dispela," em i tok. "Mi wok long tingting tasol long pairapim olgeta bal long traim mekim siks. Long Zimbabwe ol i wok long painim hat long pilai gut. "Em i bin gutpela nius long Zimbabwe kriket olsem mipela i laik pilai gut gen," kepten Tatena Taibu i tok. "Mipela bai traim yet.

# Isi isi kriket go insait long wanwan ples

Andrew Molen i painimaut olsem kriket maski planti manmeri i no save gut yet long en em i wok long go insait isi isi long wanwan komyuniti long kantri na i laik traim kisim biknem olsem ragbi na soka.

**N**AMEL long ol narapela spot we i wok long putim Papua Niugini long wol mep na mekim ol narapela kantri i luksave long PNG em Kriket.

Las wik tasol PNG Kriket tim i pilai gut tru na winim dispela Is Esia kap long Malaysia taim ol i rausim tiket bilong Fiji na dispela i lukim ol kwalifai long go pilai long Intenesenol Kriket Kausel (ICC) trofi long Ireland long Julai dispela yia.

Dispela i mekim PNG i stap yet olsem namba wan long kriket long Saut Is Esia na Pasifik rijn.

Sapos ol i win long ICC trofi bai ol i kwalifai long go insait long wol kap we ol bai pilaim ol biknem kantri na Kriket Tes kantri pilaia olsem Australia, Pakistan, Ingran, Sri Lanka, Saut Afrika, Bangladesh na West Indies.

Dispela em i wanpela bikpela



• Jamie Brazier: top PNG batman traim tu golf. FAIL POTO

samting long spot na tu long kriket long PNG na yumi olgeta manmeri bilong PNG i mas amamas long PNG kriket tim na ol lain i wok hat long kisim dispela spot we i nogat planti lain long kantri i save pilai long en.

Kriket i bin kamap namba wan taim long PNG long 1950's taim ol London Misinari i kam stap long ol ples bihainim nambis i go Is long Pot Mosbi.

Planti ol yangpela na ol lapun man na meri wantaim long ol dispela ples na i no long taim ol kompetisen bilong ol man na meri wantaim i kirap long dispela ol ples.

**L**ong ol ples i go insait moa ol manmeri i pilai kriket inap 10-pela ples long Hula i bung wantaim long 1968 long ronim wanpela bikpela kriket kompetisen stret insait long kantri. Dispela kompetisen i pulim ol pilaia bilong ol ples olsem Keapara, Alukuni, Karawa, Kalo, Kamali, Makerupu, Babaka, Hula, Irupara, Alewai na Kaparoko.

Ol pilaia i save wokabaut longpela rot tru long ol ples bilong ol i go i kam long pilai kriket bilong wanem long dispela taim i no bin i gat gutpela rot.

Dispeal kompetisen i lukim kriket i stap strong long dispela ol ples na em i wanpela as tu bai yu lukim planti ol pilaia long taun kompetisen nau i

kam long dispela ol ples tu.

Long pinis bilong 1960's na 1970's, kriket i kamap wanpela spot long ol taun we planti tim wantaim planti waitman na wanwan as ples i pilai insait. Ol lokol pilaia i kam long ol ples olsem Hanuabada, Kilakila, Vabukori na Korobosea. Dispela kompetisen nau i kamap olsem Pot Mosbi Kriket Asosiesen.

Kriket i bin i go insait long ol narapela senta olsem Rabaul, Bougainville, Mt Hagen, Goroka, Mendi, Madang na Lae. Ol kompetisen i save gat planti ol waitman i pilai na wanwan lokol o as ples lain we planti i bilong Papua o Sentrol provins.

Ellis sil bihain i kamap Don Fox sil we i save kamap long Hailans i mekim kompetisen long hap i kamap strong tru na planti tim i save pilai. Tasol taim kantri i kism Independens long 1975, planti ol wokmanmeri bilong Australia i lusim dispela ol ples na i go bek na dispela i mekim bikpela spes i stap long kriketi long dispela ol ples we i lukim strong bilong kriket i go daun.

Ol wanwan lokol husat i save pilai i traim long holim strong na ronim dispela spot bilong ol tasol taim ol gavman rifom i kamap ol tu i lusim ples na em i mekim kriket i pinis olgeta long ol Hailans rijn.

**L**ong 1992 PNG Kriket Bod wantaim Sentrol Provinsol Gavman i kirapim kantri kap kompetisen bilong planti long ol lain long Sentrol provins husat i save laikim dispela spot na nau dispela i kamap olsem nesanel sempionsip.

Yu ken lukim nau olsem kriket long PNG i kam long we tru na long go kamap long kain bikpela tonamen olsem wol kap kwalifaia em i wanpela bikpela samting.

Yumi i mas sapotim kriket na ol narapel spot tu we i mekim nem bilong kantri pinis bai yumi i ken i go moa yet. Planti ol narapela kantri husat i gat biknem long dispela spot i kirap long wankain rot, long daunblo yet i kam antap nau nau ol i stap long dispela level.



• PNG kriket tim we i winim ICC Wol Kap Kwalifaing pilai divison 2 tonamen long Malaysia. PNG winim Fiji long 30 ron.

PNG i gat planti gutpela pilaia nau olsem Jamie Brazier, Mahuru Dai, Rarua Dikana na Inoa Baeau husat ol i ken helpim wantaim ol kosing klinik. Ol spesel trening kemp tu i mas kamap long helpim na developim ol skil bilong gem namel long ol yangpela pilaia.

Antap long dispela na moa long en yumi olgeta i mas i gat ol gutpela ples bilong pilaia. Em tasol bai yumi inap kisim level bilong pilai i kam antap na kamapim ol gutpela pilai.

**K**riket em i non-kontek pilai olsem soka, vollbol, sofbol na basketbol tasol em i wankain olsem sofbol we ol i save tromoi bal na yusim bet long paitim dispela bal.

I gat 12pela pilaia long wanpela kriket tim. Taim wanpela tim i bet o paitim bal, narapela i save tromoi na was. Tupela betsmen o ol lain bilong paitim bal i save sanap long "kris" o ples bilong paitim bal na ron na taim wanpela i paitim bal bai tupela i ron i go i kam long dispela kris na ol i save kisim poin long amas taim ol i ron i go i kam namel long ol wicket stik.

Sapos tim husat i fil na sutim wicket stik bipo long pilai i ran hom seif dispela i min olsem pilaia i aut.

Yumi olgeta nau i mas sapotim kriket tim long pilai long ICC trofi long

Ireland na go moa yet long Wol Kap Em tasol na GOOD LUCK!

Wei bilong kisim save bilong PNG Kriket Kausel  
Kain stap wantaim ICC: Asosiet Nesanel Bodi: Papua Niugini Kriket Bod

Adres: P.O. Box 168  
Boroko, N.C.D.  
Pot Moresby  
Papua New Guinea

Telepon: +675 325 5411  
Fax: +675 325 5102

Email: cricketpng@daltron.com.pg

Kapitol Siti: Port Moresby  
Populesen: 5,420,280

Bikpela tokples: Inglis, Pidgin na Motu

Moni: Kina

Taim pilai i save kamap: Namel long Septemba na Epril

Namba bilong ol manmeri i pilai kriket - 3,202

Ol pilai graun: 20

Namba bilong Kwalifai kosa: 265

Namba bilong Kwalifai ampaia: 331.



• Pot Mosbi Mariner tim husat i redi long go insait long failol bilong 2004-2005 kompetisen i sanap harim toktok bilong kosa bilong ol long Coits pilai graun. Poto: PAUL ZUVANI.

# Kabwum memba salim spot tim long Morobe Gems

## Yakam Kelo i raitim

KABWUM distrik long Morobe provins bai salim soka tim bilong ol man na basketbol tim bilong ol meri i go salens long bikpela spot tonamen bilong Morobe provins long dispela mun Mas.

Memba bilong Kabwum Bob Dadae i tokaut olsem em yet bai go olsem wota boi wantaim ol pilaia bilong em i go long go dispela spot tonamen long Lae siti.

Dadae i tok em i makim pinis K20,000 bilong sapatim dispela tupela tim bilong Kabwum na ol bai kamapim tupela top tim bilong traime dispela salens long Morobe provins.

Em i tok em i laik lukim spot i bikpela samting insait long Kabwum distrik. Em i sanapim bikpela tingting olsem ol pikinini Kabwum i mas soim ol yet long spot long apim na kirapim nem bilong Kabwum.

I gat ol gutpela spot manmeri bilong Kabwum i stap na rot i mas op long ol i kam aut na salens insait long ol bikpela spot tonamen na stap insait long provinnsal na nesanel tim bilong Papua Niugini. Kabwum i gat nem pinis long PNG na ol i mas kirapim na soim aut moa Kabwum spot manmeri long kantri.

Narapela bikpela tingting em Dadae i bilip spot tasol inap holim bek ol yangpela long ples na ol i ken sindaun amamas na pilai spot.

Dispela tu inap mekim ples i kamap nais na smat bai ol manmeri amamas long bung na pilai spot.

Dadae i tok tu olsem em i laik lukim spot i strong long Kabwum bai olgeta yangpela pikinini Kabwum i mas kam bung na pilai spot na save long narapela narapela na kamapim gutpela pasin pren namel long ol yet.

Em i askim ol arapela lida tu long sapatim spot insait long distrik bilong ol na salim tim bilong ol i go salens long provinnsal tonamen na tu long nesanel sempionsip.

Dispela inap kamapim trupela PNG tim we i gat ol pilaia bilong olgeta distrik na provinnsal i stap long en na i no long Lae na Mosbi tasol i makim PNG long ovasis spot tonamen.

Dadae i tok em i makim pinis K20,000 bilong sapatim soka na basketbol tim bilong Kabwum long dispela Morobe Gems na dispela bai lukautim ol long trenspot, yunifom, ol kaikai na haus slip long Lae siti taim ol i stap long Lae long tonamen. Em i tokim ol yangpela bilong em long Kabwum olsem em yet bai i ron long sip wantaim ol long Wasu i go long Lae na stap wantaim ol olsem wota bol bilong ol.

# Malagan sempion bilong Madang sofbol

## Andrew Molen i raitim

Nau ol i kamap long pilai na autim ol fevret long win na maina primia Agmark Kopex 4-2 long gren fainol bilong Madang sofbol long las Sarere.

Dispela strongpela pilai i kamap na i lukim pitsa bilong Malagan lan Sammy na bilong Kopex Esau Vinarang i givim hat taim long ol beta bilong narapela tim taim ol i salim ol bal we i hat long paitim isi.

Dispela i lukim fes tupela inings bilong gem i nogat wanpela skoa.

Tasol ol beta bilong Sammy i gutpela moa na ol i soim taim ol i skorim dispela foa poin long win insait long namba tri ining.

Nigel na longtaim pilaia Tony Seeto, Eremas Leslie na Alex Bunbun i skoaim ol poin bilong ol na ketsa Chris Karl na Wilson Nagas i kam long hom bes bilong tim bilong ol, Kopex.Kopex i skoa pas

long antap bilong namba tri inings taim pilaia na kosa bilong Kopex Warren Kakat i stretim han bilong em na kisim gut wanpela bal bilong Sammy na salim i go long rait aut fil we i givim sans long Karl long kam long hom bes.

Bihain long dispela Nagas i stilim bes i go long ted bes taim Malagan i no was gut long fil na bihain em i ron i kam long hom bes taim Vinarang i paitim wanpela bal na dispela i givim tu poin bilong ol tasol insait long gem.

Kopex i gat sampela moa sans long tupela moa beta bilong ol tasol ol i no i nap na Sammy i stretim han bilong em long stopim ol long hap.

Long hap nau Malagan i kirapim enjin bilong ol long paitim bal.

Leslie, Tony na Nigel i pasim tingting olsem nogat moa straik aut bai i kamap na ol i go aut mekim save wantaim bet we i lukim ol beta bilong ol i go sanap long ol

bes.Na taim Bunbun i kam sanap long bet, wara i ron taim senta aut filda bilong Kopex, Willie Rasta i pundaunim wanpela bal we em inap long holim.

Ketsa na kepten bilong Malagan Danny Mong i surukim pilai i go long helpim Bunbun i kam long hom bes.

Vinarang i kirapim paia bilong em tu long fainol ining stopim ron bilong Malagan tasol ol beta bilong Kopex i no helpim hatwok bilong pitsa bilong ol.

Gem i bin i nap long tanim i go long sait bilong Kopex long antap bilong namba siks inings taim i gat olgeta pilaia i sanap long wanwan bes tasol ol i paitim bal gut na Vinarang yet i kisim straik aut long lusim George Petau na Nara Kakat i sanap nating long ol bes.

Kepten bilong Malagan, Mong i tok hatwok bilong ol i no go nating bilong wanem ol i pas long gem plen bilong ol long sait bilong bet o paitim bai gut.

# Morata lig salim tim i go insait long Pot Mosbi ragbi lig kompetisen

MORATA ragbi lig i kisim wanpela bikpela mak ken long hapim ol pilaia bilong ol long ragbi lig insait long Pot Mosbi na tu long kantri.

Dispela bai i kamap long dispela wiken taim ol i salim tupela tim bilong ol i go insait long Pot Mosbi ragbi lig 9's we bai kamap long Lloyd Robson pilai graun stat long Mas 4-6.

Tupela tim ya em Morata Swans we David Nul i kosim na Morata Bullets husat ol i kam aninit long kosa Jeffrey Luso.

Vais presiden na kodineta bilong Morata ragbi lig John Mauwi i tok tupela tim em ol i kisim long ol gem bilong ol we i save kamap olgeta wiken long Morata lig kompetisen bilong ol yet.

"Dispela ol pilaia em ol manki bilong mipela yet long Morata lig na mipela i kisim ol long gutpela pilai bilong ol long makim lig bilong ol insait long Pot Mosbi na traime bun wantaim ol sampela biknem klab long siti," Mauwi i tok.

Mauwi i tok planti bilong ol pilaia insait long tupela tim em ol nupela manki na dispela bai namba wan taim bilong ol long traime bun long bikpela resis.

Em i tok ol i luk fowet long salens wantaim sampela ol biknem pilaia na ol klab insait long Pot Mosbi ragbi lig. "Ol i wok long redi long dispela lig 9's salens na mi gat strongpela bilip olsem ol bai ron gut



• Pilaia bilong Kange Tigers i kisim taim nogut long han bilong Angra Warriors long Morata lig. Tigers win 13-6. Foto: ANDREW MOLEN.

long dispela wiken pilai," Mauwi i tok. Dispela sisen i lukim planti bikpela samting i kamap long Morata lig we i soim laik na spirit bilong ragbi lig na spot na tu long ol sapatim bilong en. Ol i kirapim Morata Orijin we i wankain olsem stet ov orijin

pilai bilong Australia na taim bikpela hevi bilong solwara long Esia na mauntan paia long Manam i kamap, ol i holim pilai long nem bilong sariti na givim olgeta moni ol i kisim long dispela pilai. Dispela wiken bai lukim laspela raun bilong semi fainol.

## Haphap spot

### Bougenvil boksing

OL lain long Bougainville i gat plen i stap nau long kirapim wanpela sku bilong ol boksa long Buka. Dispela sku bai lukim olgeta namba wan paitman bilong ol klab long Bougainville husat i afiliat i go long Bougainville amata boksing asosiesen (BABA) bai i stap insait long en. Ol dispela paitman bai ken kam long ol junia na sinia level long olgeta divison. Man husat i go pas long dispela tingting bilong kirapim sku bilong boksing em presiden bilong BABA Ernest Lessie. Em i tok as tingting bilong long statim dispela sku em long helpim long kisim ol top boksa bilong wanwan klab, putim ol i go insait long dispela sku na mekim ol i kamap olsem ol paitman husat ol bai i gat sans long makim kantri. "Dispela bai mekim isi long ol mensmen na ol eksekutiv long makim ol trening skwat long makim provinnsal long ol sempionsip na ol tonamen long kantri na long ovasis," Lessie i tok. "Mipela bai lukluk gut long ol boksa husat i stap long sku na save bai i stap long ol yet long soim olsem ol inap long tren na stap fit na tu long disiplin," em i tok. Em i tok sku bai i no inap paulim wok bilong kamapim na oganaisim ol tonamen we Asosiesen i mekim. Lessie i singaut i go long ol pipel husat i gat save long boksing na trening o long ol narapela samting we inap long helpim ron bilong sku long ol i mas kam long ol bisnis haus long bikpela sapat bilong ol.

### Pot Mosbi rot rana

LAS wik Sarere ol rana bilong Pot Mosbi Rot Rana i bin bung long nupela stat long Apex Pak long Boroko. I gat ripela nupela resis sta logn dispela pak, olsem 2 km, 5 km na 10 km. Kos bilong sampela resis i no klia tumas na planti rana i no bin iusim rot. Olgeta resis i stat long raunim pak na go long bikpela ro inap long raunim blok na kam bek raunim pak gen. 2 km resis i pinis long pak. 5 km resis i go olgeta long Bisini Parade na kam bek long Angau Draiv. Longpela resis i go olgeta long 5 Mail Raunabaut na go raunim Henau Draiv long Gordons. Sampela rana i no klia long dispela kos na i go long Courts Raunabaut olsem kos bilong ol i sot liklik. Sampela rana i bin lus long Henau Draiv na go olgeta long 6 Mail stua. Wina bilong 2 km resis em Francis Xavier (6.28) na Simon Pinampio i winim 5 km resis (16.37). I gat 36 rana i bin pinisim 5 km resis. Long 10 km resis mipela i no inap long soim taim bilong ol olsem ol i no bin ronim dispela kos. Bikos longpela bilong ol resis i no bin klia tumas, dispela ol resis i no inap long go insait long Must Run Challenge. Ingap long Februari pinis James Gurumi i stap long namba wan ples long Challenge (65.2km), Paulus Opus i stap long namba tu ples (55.8km) na Pam Christied na Mark Hitchcock em tupela i stap long namba tri ples (55.8km). Dispela Challenge bai i go inap long Disemba olsem bai i gat planti taim yet long kisim gutpela ples long Challenge.

### Hebou kampani givim sapat

HARLEQUINS ragbi union klab long Pot Mosbi i kisim bikpela helpim long Hebou Konstraksen kampani wantaim K15,000 sponsasip. Insait long dispela sponsa pasol tu i lukim ol i kisim nupela yunifom we i stap long ol kala bilong ol yelo, blu, grin na red. "Dispela sponsa i mekim Hebou i kamap olsem meja sponsa bilong mipela long dispela yia," Harlequins klab presiden Robert Doko i tok. "Mi laik tok tenkyu na amamas i go long Hebou Konstraksen kampani na mi luk fowet long wokbung wantaim kampani na tu long klab i pilai strong na karim gutpela nem bilong kampani," Doko i tok. Klab i givim wanpela jesi i go long papa bilong "Constantinou group of companies" we Hebou i stap aninit long en, Sir George Constantinou. Doko i tok dispela jesi i makim amamas bilong klab i go long Sir George olsem namba wan sapat bilong ol. "Mi amamas long helpim klab na mi laikim bai dispela i nap long givim yupela strong long pilai gut na win," Sir George i tok. "Mi laik putim moni long helpim na sapatim spots insait long kantri bai ol i pilai gut na taim ol i go ovasis bai ol i apim nem bilong spots na tu bilong kantri," em i tok. Long wankain taim kepten bilong Harlequins, Carl Hoot i tok amamas tu long nupela sponsa na em i tok dispela bai givim strong long ol pilaia long pilai strong. "Em bai i stap long het bilong mipela na givim mipela amamas na strongpela tingting long pilai.



# WANTOK SPOTS



## PNG trainim Samoa ...2005 OFC klab sempionsip

Paul Zuvani i raitim

SOKA i bikpela pilai bilong kantri. Em i stap long kantri longpela taim na planti ol ples i save long em.

Tasol bihainim histri na stap bilong em kantri i wet yet long lukim kain mak em PNG soka i ken solm olsem i tru soka i stap.

I luk olsem pinis bilong 1980s i lukim nem bilong soka i go daun long Melanesia maski long Pasifik rijon o Australia na Niu Silan ol i bikpela tumas long dispela taim.

Nau PNG i stap namba 8 ples danbilo long ol arapela Pasifik Ailan tim.

Askim nau em inap PNG soka i kamap strong gen?

Tumoro na Sande em bai yumi lukim top soka klab bilong PNG Sobou bilong Lae i trainim strong wantaim Tuanaimato, namba wan soka klab bilong Samoa.

Sobou i no nesenel tim tasol em i go insait olsem sempion klab long makim kantri.

Sobou tim menesa Luke Wangi long bekim askim bilong Wantok i tok: "Long nem bilong kantri mipela bai pilai, mipela i gat bikpela tingting long pilai gut na winim."

"Mipela i nogat planti tingting long longpela o long bikpela bodi bilong ol. Mipela i laik kamapim tasol gutpela pilai bilong mipela."

"Mi gat sampela intenesenel pilaia olsem kepten Richard Daniel, tupela Kamake brata Harrison na Alu, gol kipa David Aua, John Laskama na Lauries Skulas."

"Dispela ol lain i ken go pas long ol narapela pilaia na pilai gut na winim pilai."

"Mipela i hop long lukautim bal na winim ol long tingting (saikologi)."


"Toktok bilong mi long ol pilai em olsem pilaim bal long graun."

Tasol long wankain taim teknikol opisa bilong Tuanaimato David Brand em i tok Samoa tu i kam long winim pilai.

"Yes mipela i redi na mipela i kam long kamapim gutpela pilai na win," Brand i tok taim em i pundaun long Jackson Airport na wokabaut i go long kisim balus na go long Lae.

"Ol manki bilong mipela i yangpela man tasol na i nogat intenesenel save tasol mipela i kisim gutpela trening," em i tok.

Pastaim long Tuanaimato tim i kam ol i bin holim wantaim giaman pilai wantaim Sunshine Coast long Australia we ol i dro 3-3 na dispela em i givim gutpela tingting long Samoa tim. Em dispela tim aninit long lukaut bilong Brand i bin givim planti het pen long ol wantok bilong PNG tasol ol



**Harim....** Newcastle Knights kepten Andrew Johns i toktok long ol pilaia bilong em long redim ol yet long namba wan 2005 propa sisen pilai bilong ol wantaim Melbourne Storm long dispela Sande. Las prisisen pilai bilong ol ol i lus long Cronulla Sharks 32-28. Lukim moa stori long pes 29.

*Foto: SYDNEY MORNING HERALD*

strongpela soka ailan kantri olsem Vanuatu na Solomon Ailan. Tupela tim bai holim namba wan pilai long tumoro na namba tu long Sande long Sir Ignatius Stedum.

Sobou i stap long Unitech na redim ol yet. PNG tim em David Aua gol kipa, Charles Somasi, Tony Kepo, Harrison na Alu Kamake, Dugi Deno, Mapi Bigilam, Lauries Skulas,

John Laskama, Andrew Kassam, Charlie Kwanteki na Thomas Mamae. Menesa em Luke Wangi.

Wina bilong dispela pilai bai go pilai pilai wantaim narapela ol Pasifik ailan tim long pilai na painim fainol bilong 2005 OFC Klab sempion. Dispela pilai bai kamap long Tahiti long Mei 10- Jun 10.



Coleman cooler istop long olgeta Brian Bell stua no Authorized Dealer